

# Yone

## **Yone sawi one mahemakapukusa someane oyapo.**

Yasumo aporo hakāsa purane hakāsa metane Yonepo. Yonemo Yasumo makata somesane kaikia, arirakano Yasumo makata rakisiane soko asesapo. Asiasamo aporo hinamomo Yasuaki himu hakāsaraka hemakapusimo sawi one Yonemo popasapo.

Yonemo ipi yanoane faremarekea, aporo hakāsa pura Yasumo himu tumurumo hemakapusua aporoane Yone ipipo, aiyaka taku meaka popasapo.

Yasu turikia pukua hepene yapura hisiakipoko, keremisi 60 faraka Yonemo sawi one popasapo.

## **Yone sawia some kepo parakuraka popasane oyapo.**

1:1-18 Yasu hauaka wo peasiraka, fana e Kotiyaki hakāsa yaiya reapo.

1:19-51 Yone he tapukumareramo makata rakisiakipoko Yasumo ipi aporo hakāsa pura metakirane murikimasapo.

2:1-24 Yasumo namo heane waene he maparisapo.

3:1-36 Ereamo Nikitimasemo Yasuaki somehoko pesapo.

4:1-54 Yasumo Sameria hinamoaki somesapo.

5:1-47 Yarusarame sitia hokono kesakipoko Yasumo some kasapo.

6:1-71 Yasumo aporo fae taoseneaki (5000) farawa nasimo kasapo.

7:1-8:59 Yarusarame sitia hokono kesakipoko Yasumo efera hunia some kasapo.

9:1-41 Aporo hi mesane Yasumo mafasapo.

10:1-42 Saro sipi asekea rera aporoane Yasupo.

11:1-57 Rāsarase kusuane Yasumo maturikia taesapo.

12:1-11 Yasu kukusa maiyane makerakano Mariamo Yasu korakea makata wape yamonamo hokesapo.

12:12-50 Yasu saru toki matia ripaka Yarusarame sitia perakano, aporo hinamomo eane makārarakano Yu aporo sisimamo Yasuaki hisiraka risiapo.

13:1-16:33 Yasu Yarusarame sitia hinaka ipi aporo hakāsa puraki some kasapo.

17:1-20 Yasumo ipi Ataki kurikurisapo.

18:1-19:42 Yasuane parakeraka hukurukua ira matopesa paremarekea kusuapo.

20:1-31 Yasu turikia purakano Yarusarame sitia aporo hinamo metakiramo asesapo.

21:1-25 Yasu he Kariri fua pekea ipi aporo hakāsa puraki tarisiapo.

**Yasu ipi yano motosa metane Somepo, aisane oyapo.**

**1** <sup>1</sup> Makata su kepomaresa maiya amo, ipi yano motosa Someane<sup>a</sup> wate yaiya reapo. Someane Kotiyaki hakāsa reapo. Someane ipi Kotipo. <sup>2</sup> Makata su kepomaresa maiya amo e Kotiyaki hakāsa yaiya reapo. <sup>3</sup> E aeyaka makata suane kepomaresapo. E metakarikia makata su kepomaresafapo. E aeyaka kepomaresapo.

<sup>4</sup> Yaiya reramo kepoane e ipipo. Yaiya reramo faesane aporomanoaki karápo. <sup>5</sup> Faesa amo katosa arakaru tipia kára faeraka rekenapo. Katosamo faesane kopakataenafapo.

<sup>6-7</sup> Asiamo faesane somehoko aporo hakāsa meta Kotimo pusiesapo. Pusierakano pesane ipi yano motosa Yonepo. Aporo suamo kakimakasimo epo somehoko pesapo. <sup>8</sup> Faesane éfapo. Faesane epo somehoko pesapo. <sup>9</sup> Arirakano kakaro faesamo kepoane Yasu ipipo. Ipi hauaka wo aporo suane mafaehoko pesapo. <sup>10</sup> Arirakano wate fana epo hauaka one soko aporomano ane soko rakisiapo. Epo ipi rakisia nine e hauaka kara wo pesa maiya amo aporo hinamomo eane himetesapo. Kotimo eane pusierakano, pesane aporo hinamomo hemakapusuafapo. <sup>11</sup> Ipi aporo iramo apea perakano ipu eane teresafapo. <sup>12</sup> Asiane aporo hinamo metakiramo eane tereraka epo ipi yano motosa paoraka eaki himu hakásaraka hemakapurakano iaki epo someraka, “Re Kotimo hokosapo,” aiyaka somesapo. <sup>13</sup> Kotimo hokosapo, aisane aporomo hinamo arumaka hokosa hokono amarera ayafapo. Aporomo hinamo arumaka hokosa hokono maresa hokosane aporomo ipi hemakapusua ayapo. Kotimo hokosa risikiasimo Kotimo ipi hemakapukua someraka, “Neane nōmo nī hokosapo.” Aiyaka ipi hokosa risikiasimo murisiapo.

<sup>14</sup> Arirakano Somemo isiapo aporomanomo kauane maka, hauaka wo pekea isuyaki reapo. Epo isu hemakapuraka arareraka, kakaro someane some kasapo. Some akaramo Yasumo wakapu faesane isiapo asesapo. Ipi wakapu faesane ipi Kotimo hokosa hakāsa yinesasamo Kotimo wakapuane faesa ayapo.

<sup>15</sup> Arirakano Kotimo hokosa ane Yonemo somesapo. Yonemo paroaka someraka, “Aporo keseke peakosane e ipi namo kakaro fanapo. Ano

---

<sup>a</sup> **1:1** Wate fana Yu aporoane namoraka risike Kotimo yano motosane hufitaeraka kakama somesafapo. Ipu takumeaka yano motoraka Someane aiyaka somesapo. Asiamo Yonemo sawi one poparaka Yasu ipi yano motosa metane Somepo, aiyaka poparakano Yu aporo suamo hemakapuraka Yasuane Koti hakāsa yiyapo.

takapeasiraka e fana yaiya reapo. Fana yaiya reasasamo e ipi namo kakaro kárapo. Ano wakasemapo,” aiyaka Yonemo somesakipoko aseane Yasu perakano asesapo.

<sup>16</sup>Yasumo isu su yaku kára araresapo. Efera hunia soko, efera hunia soko yaku arareraka rekeakosapo. <sup>17</sup>Kotimo somemaneane Mosesemo aporoaki some kasapo. Arirakano yaku ararenane soko, kakaro somerane soko, Yasu Keresomo isuaki kasapo. <sup>18</sup>Aporomo Kotiane aserafapo. Asiāne ipi hokosa hakása yine tati hakása risiasamo, hokosa amo Kotimo ainane tariako pesapo.

**Yone he tapukumareramo somesane oyapo.**

*Matiu 3:1-12; Maka 1:1-8; Ruki 3:1-18*

<sup>19</sup>Yu aporo sisimamo pirisiti aporoaki soko, Rifai aporoaki soko someraka, “Re Yarusarame siti metakarikia Yoneaki makata kaiyako punie.” Airakano i pukua Yone rea pekea someraka, “Ne epare? Kotimo pusiesa aporoane nere?” <sup>20</sup>Airakano Yonemo mahamesafapo. Epo hufitaeraka someraka, “Ano Keresofapo. Aporo Unihaeaka rekeasimo murikimasa aporo keresoane anofapo.” <sup>21</sup>Airakano ipu someraka, “Ne eparakapo. Ne Iraíyare?”<sup>b</sup> Airakano epo someraka, “Wae, ano Iraíyafapo.” Airakano ipu someraka, “Porofete aporo kárane nere?” Airakano epo someraka, “Anofapo,” aisapo.

<sup>22</sup>Airakano ipu someraka, “Ne epare? Isu pusiesa aporoaki isiapo somehokosakipoko nómo somesie.” <sup>23</sup>Airakano epo someraka, “Ima yaoa sakepamo somehokosa aporoane anopo. Unihae peakosane ikia kara hahaesekeno maereketahoanie aihokosa aporoane anopo. Anoane Aesayamo popahoareapo,” aisapo. *(Aisaia 40:3)*

<sup>24</sup>Airakano Ferese aporomo pusiesa aporoamo someraka <sup>25</sup>“Keresoane soko, Iraíya ane soko, arirakano porofete aporo karane soke nefareapo. Asiamo marirakano nómo aporo hinamoane hea tapukumurirakanare?”

<sup>26-27</sup>Airakano Yonemo someraka, “Re nómo hea hákasa tapukumurirakanapo. Ano reakipoko aporo hakása meta peakosapo. E peakosane reyaki rekenapo. Ayiáka repo eane hemakapurakanafapo. E aporo kárasasamo aporo raipamo epo tamaka ane fisina ayiáka nómo fisihoane siahoasifareapo. E aporo kárasasamo nómo epoko raiparaka rakiako ayiane soko ano wakasemasasamo nómo rakiane siahoasifareapo. Ano eyaki siasafapo.” Aiyaka Yonemo Petene apea somesapo. <sup>28</sup>He Yotane taku ra Petene ape rekenapo. He Yotanea Yonemo aporo hinamo hea tapukumuriapo.

**“Kotimo saro sipi mano apere,” aisane oyapo.**

<sup>29</sup>Ere hakása waka, mituru Yonemo aseane Yasu perakano aseraka someraka, “Kotimo saro sipi manoane apere. Aporomo himua makata

<sup>b</sup> 1:21 Iraíyane wate fana porofete aporopo.

watikisane epo mafahokosakipoko saro sipi arura ayiáka e rukusapo.

<sup>30</sup>Fana eane nōmo reaki somerakasu ayapo. Asiamo ano fana pesakipoko aporo meta kesekea peakosaposane apera ayareapo. Asiamo aporoane ano hokono mareasiraka e ipi wate fana yaiya reapo. Asiamo aporoane ipi namo kakaro fanapo.

<sup>31</sup>Fana aporo meta Kotimo pusiehosakaposane nōmo kairaka epa peanarakapo, aiyaka hemakapukua ano himetesapo. Asiane Isiraya aporo hinamo repo eane hemakapusimo reane nōmo hea tapukumurirakanapo. Hea tapukuamuriramo eane atarira ayiáka tarirakanapo,” aiyaka Yonemo somesapo.

<sup>32-33</sup>Aiyaka efera hunia Yonemo someraka, “Fana Kotimo anoaki hea tapukumuriako pusiesapo. Kotimo some kasa yiamo someraka, ‘Ho Kotesa pekea aporo hakása meta á karaporakano epo ipi yiamo Ho Kotesane aporo hinamo suaki muriakosapo.’ Aiyaka Kotimo somesakipoko aporoane fasere perakano fana e nōmo himetesapo. Himetesane Ho Kotesa mena nume asia ea karaporakano aseraka nōmo hemakapuraka, ‘Kotimo fana somesane ereapo,’ aiyaka nōmo hemakapusuapo. <sup>34</sup>Hemakapukua eane nōmo himo asekea someraka, ‘Eane kakaro Kotimo hokosapo. Kotimo murikimasa aporoane ereapo,’ aiyaka nōmo someraka rekenapo.” Aiyaka Yonemo somesapo.

#### **Yasumo aporo hakása pura fana murikimasane oyapo.**

<sup>35</sup>Ere hakása waka, mituru Yone ipi aporo hakása pura tetáyaki risike, epo aseane <sup>36</sup>Yasu purakano asekea wáraka someraka, “Asesie. Kotimo saro sipi mano e apure.” <sup>37</sup>Aiyaka wárakano Yonemo aporo hakása pura teta amo kaikia Yoneane metakarikia Yasuane kekemarape pusuapo. <sup>38</sup>Kekemarape perakarakanano Yasumo patera pariaseane tetā kekemarape perakano asekea someraka, “Teto yakapa aseako perakanare?” Airakano tetapō someraka, “Tisao,<sup>c</sup> né ape ma warakánare?”

<sup>39</sup>Airakano Yasumo someraka, “Aseako peae.” Airakano tetā Yasuyaki hakása pukua epo ape waráne asesapo. Asesa sere yiamo Yasuyaki hakása risiapo. Yasuyaki hakása risia sere ane samapu maiya kitafapo.

<sup>40</sup>Yonemo someane kakimaka Yasu kekemaraka pusua aporo tetāne meta yano motosa Enitupo. Enituane e Saemone Pitamo mamaneapo. <sup>41</sup>Fana Enitu ipi mamanea Saemone ane kope pusuapo. Pukua e kokoa asekea someraka, “Aporo Kotimo pusiehosakaposane Kereso perakasapo. Isiapo asesapo. Keresoane Kotimo Unihae murikimaka maresa ayasesapo.”

<sup>42</sup>Aiyaka Enitumo Saemone ane karikia Yasu rea pesapo. Perakano Yasumo e asekea someraka, “Né Yonemo hokosa Saemonereapo. Yumo

---

<sup>c</sup> 1:38 Namina meaka Rapae, airapo. Isiapo meaka Tisa, airapo.

nōmo neane yano motoraka Sifase yano motorakanapo,” aiyaka Yasumo somesapo. Arirakano Sifase yano motosane Kiriki meaka Pita yano motosapo. Namō meaka Eke, aiyaka yano motosapo.

**Firipipe Natanio tetāki Yasumo peaesane oyapo.**

<sup>43</sup>Ere hakāsa waka, mituru Yasu Kariri hauaka pusuapo. Pukua Firipi aseraka someraka, “Ano patera asesie,” aisapo. <sup>44</sup>Arirakano Firipi ipi Pesaita taonea reapo. Enitu soko, Pita soko i Pesaita taonea hakāsa risiapo. <sup>45</sup>Firipi pukua Natanio asekea eaki someraka, “Mosesemo somemane sawia poparaka maresa aporoane isiapo asesapo. Porofete aporomo soko eane popasane isiapo asesapo. E Yosefemo hokosa Yasupo. Epo apeane Nasare apepo.”

<sup>46</sup>Airakano Nataniomo someraka, “Nasare ape aeyaka aporo kotesa perafapo.” Airakano Firipimo someraka, “Aseako peae,” aisapo. <sup>47</sup>Aiyaka tetā pukua Natanio perakano Yasumo asekea someraka, “Isiraya aporo kotesane ereapo. Epo makata kotafe somerapapo.” <sup>48</sup>Airakano Nataniomo someraka, “Nōmo ano mayiāka hemakapukua asekea somerakanare?” Airakano Yasumo someraka, “Firipimo néaki peahoasiraka né ira foke kepoa kakeno nōmo né asesapo.” <sup>49</sup>Airakano Nataniomo someraka, “Tisao, Kotimo aporo hokosane nereapo. Né Isiraya aporomo unihaereapo.” <sup>50</sup>Airakano Yasumo someraka, “Né ira foke kepoa kakeno nōmo asesapo. Asiasamo nōmo anoaki himu hakāsaraka hemakapurakanapo. Asiane nōmo makata someana one wakasemapo. Keseke makata kára meta nōmo aseakosapo.” <sup>51</sup>Aiyaka efera hunia Yasumo someraka, “Nōmo kakaro somerakaripo. Ti kikisi akaraka, kikisi roraka, Aporomanomo Táke ano unia kima yapura Kotimo hepene aporoane pekea parihinakano repo asekeakosapo,” aiyaka Yasumo somesapo.

**Kena taonea aporo metamo hinamo arumaraka hokono kesane oyapo.**

**2** <sup>1</sup>Sere teta faraka, sere isiamo aporo metamo hinamo arumaraka hokono kesapo. Kariri hauaka á Kena taonea hokono kesapo. Hokono akera apea Yasumo ipi kaīyia pukua kayapo. <sup>2</sup>Arirakano Yasu soko, ipi aporo hakāsa pura soko, iaki aporo meromo peakerakano i pukua á risiapo.

<sup>3</sup>Arirakano aporo hinamo su risiamo waene heane nekea farakano, Yasumo ipi kaīyiamo eaki someraka, “Waene heane ipu suamo nekea fahoareapo.” <sup>4</sup>Airakano Yasumo ipi kaīyiaki someraka, “Amao, marirakano nōmo anoaki somerakanare? Nōmo maīyane<sup>d</sup> harufapo.”

<sup>d</sup> 2:4 Amo kepoane oyapo. Nōmo atamo ano pusiesamo aporo hinamo suaki tarikia rakiakosa maīya ane haru faserepesafapo.

<sup>5</sup>Airakano Yasumo ipi kaiyiamo aporo meromo aporo raipaki someraka, “Yasumo reaki makata rakisimo somerakano, hakāsa yine kakimaka rakinie,” aisapo. <sup>6</sup>Airakano aseane petoro namasu tarāmo kára asia toane asesapo. Arirakano Yu aporo sisimamo hemakapuraka, “Kotimo isuaki sesehoasimo isiapo hokono kusunapo.” Aiyaka hemakapusuasamo hokono kusuhoeko eke petoroa he taka apea taesapo. Apea taesane tarāmo kára asia petoro kárane taesa tokeno asesapo. <sup>7</sup>Aseraka aporo meromo aporo raipaki, Yasumo someraka, “Petoro kárane komarusimo he taka kesie.” Airakano ipu he taka kekea komarusuapo.

<sup>8</sup>Komarurakano asekea Yasumo aporo raipaki someraka, “Petoro kára á he kesane, takamaka aporo hokono akera hokono meromo nasimo takamaka pusie.” <sup>9</sup>Airakano ipu takamaka pukua, aporo hokono meroaki karakáno epo nesapo. Namo heane waene he maparisane epo hemakapusuafapo. Arirakano aporo raipa he tasamo ipu hákasa hemakapusuapo. Aporo meroamo waene heane nenaka aporo hinamo kawe arumasa apiane peaesapo. <sup>10</sup>Perakano epo someraka, “Isiapo ainane oyapo. Waene he namo kakaro kotesa wapesane fana aporo hinamo hokonoa pesaki karápo. Fana kasane ipu siaraka nenakano asekea, waene he wakasema wapesane kesekea karápo. Arirakano nómo waene he wakasema wapesane fana akare. Kakaro wapesane kesekea akare,” aisapo.

<sup>11</sup>Arirakano aporomo hemakapusimo Yasumo Kotimo wakapumo hemakapukua rakira fanane oyapo. Namo heane waene he maparihoasimo rakisiapo. Kariri hauaka á Kena taonea epo rakisiapo. Epo wakapu kára ane aporo hinamo suamo asekeasimo epo wakapuaka rakisiapo. Rakirakano ipi aporo hakāsa puramo aseraka eaki himu hakásaraka hemakapukua risiapo.

<sup>12</sup>Arirakano hokono kekea soraka Yasu soko, Yasumo ipi kaiyia soko, ipi mamanea soko, ipi aporo hakāsa pura soko, i su pukua Kapaneame taonea pukua sere hokusimo waka risiapo.

**Kotimo apea Yasu pusuane oyapo.**

*Matiu 21:12-13; Maka 11:15-17; Ruki 19:45-46*

<sup>13</sup>Ape Farimaresa Hemakapuko Hokono Akera maiya ane makerakano, Yasu Yarusarame sitia hisiapo. <sup>14</sup>Hikia Kotimo ape ruru kakarua yorokoa aseane aporomo saro ponomakau soko, arirakano saro sipi soko, arirakano mena soko roporaka risikino asekea, aporo metakira teporoa toke mone sanasirakano asesapo. <sup>15</sup>Asekea Yasumo sako kita toane maka, kita pekea, kita amo aporo soko, namina saro ponomakau soko, saro sipi<sup>e</sup> soko, Kotimo apea karikia pesane teketarikia pusimo

---

<sup>e</sup> 2:15 Aporo hinamomo saro ponomakau soko, saro sipi soko, mena soko, rukua paikia Kotiaki kakasimo roposapo.

rukuhoaesapo. Rukuhoaeraka aporomo mone sanasiraka toa amo teporoane maparitaeraka mone rukukoakataesapo. <sup>16</sup>Rukukoakataeraka aporo mena roporaka risiaki Yasumo someraka, “Mena ane mokoia pusie. Nōmo Atamo ape one makata ropona ape mapariraka ayiakakopo.”

<sup>17</sup>Airakano kaikia epo ipi aporo hakāsa puramo Kotimo sawia popasane hemakapusuapo. Popasane oyapo. “Kotio, nōmo apeane namo kakaro kotesa susuane nōmo hemaka apuramo fanaraka hemakapurakanapo.” Aíyaka popasane Yasumo ipi aporo hakāsa puramo hemakapusuapo. *(Buk Song 69:9)*

<sup>18</sup>Arirakano Yu aporo sisimamo Yasuaki someraka, “Né epa asiamo arirakayiare? Né fanaraka reane isiapo aseako tarinie. Kotimo wakapumo hemakapukua rakirane nōmo rakinie.”

<sup>19</sup>Airakano Yasumo someraka, “Kotimo ape one rakaritaeraka yape isia faraka efera hunia nōmo kikimakosapo.” <sup>20</sup>Airakano ipu someraka, “Ape one kiraka risike keremisi foti sekese (46) faraka kikimasapo. Asiane mayiáka yape isia yiamo nōmo ape one kikimakosare?” <sup>21</sup>Airakano Yasumo ipi homo apeane ipi kauane takumeaka ape kiakosane somesapo. <sup>22</sup>Aíyaka somesane Yasu ipi kukua turikia pusua maiya amo somesa kepoane ipi aporo hakāsa puramo hemakapusuapo. Maiya amo Kotimo sawia popasane soko Yasumo somesane soko kakimasapo. <sup>23</sup>Arirakano Ape Farimaresa Hemakapuko Hokono Akerá maiya amo Yasu Yarusarame sitia reke, Kotimo wakapumo hemakapukua rakirane epo rakisiapo. Rakirakano aporo hinamo yakaimo aseraka eaki himu hakásaraka hemakapusuapo. <sup>24</sup>Arirakano aporomano himumo hemakapusuane<sup>f</sup> Yasumo aseraka epo iaki himu hakásaraka hemakapusuafapo. <sup>25</sup>Aporomo hemakapusuane aporo metamo Yasuaki someaka tarisiafapo. Yasumo ipi yiamo aporomo himuane asesapo.

### Nikitímasemo Yasu rea somehoko pusuane oyapo.

**3** <sup>1</sup>Yu aporo hakāsa meta yano motosa Nikitímasepo. Ipi Yu aporo sisima unihaeaka reane ipi Ferese aporopo. <sup>2</sup>Ereamo Yasu rea e pekea someraka, “Tisao, Koti néyaki hakāsa reasasamo nōmo Kotimo wakapumo hemakapukua rakirane rakirakanapo. Asiamo tisaraka rakisimo Kotimo pusiesane népo. Aíyaka nōmo hemakapurakaripo.”

<sup>3</sup>Airakano Yasumo someraka, “Nōmo kakaro somerakaripo. Aporo efera hunia makaweraka rekeanafonorakano, aporoane Kotimo unihaeaka asekea rekeakosafapo.” <sup>4</sup>Airakano Nikitímasemo someraka, “Aporo sisimane mayiáka efera hunia makaweraka takapeakosare? Hokosa pariraka kaíyiamo tuanaka efera hunia takapeane siahoasifareapo.”

<sup>f</sup> 2:24 Aporomanomo himumo hemakapusuane oyapo. Wate foaka seseraka keseke metakariakosane Yasumo aseraka iaki himu hakásaraka hemakapusuafapo.

<sup>5</sup> Airakano Yasumo someraka, “Ho Kotesamo aporoane hokono mareanafono, arirakano hea tapukumareanafono asiane Kotimo unihaeaka asekea rea aporoakiyaki paohokosafapo. <sup>6</sup> Aporo hinamomo hokosa hokono marerane kau, kiki, maīya, hokono marerane kaumo mena ayapo. Arirakano aporo hinamo namina ho makawehoasimo, Ho Kotesamo mena ayapo. <sup>7</sup> Nōmo neaki someraka, ‘Re makaweraka risikianie,’ airakasane nōmo kaikia fofahokopo. <sup>8</sup> Arirakano atifo purakarakano senakimo hākasa kairapo. Himo aserapapo. Atifomo makata meta mahohorakano, himo aserapapo. Atifo manaka perakanarakapo. Pekea ma purakanarakapo. Aira ayiáka aporo hinamomo himura Ho Kotesa rekerakano epo arakirane aporo metamo aserapapo.”

<sup>9</sup> Airakano Nikitímasemo someraka, “Nōmo somerakane mayiáka ayiakakosare? Ano himeteripo.” <sup>10</sup> Airakano Yasumo someraka, “Nikitímase, Isiraya aporomo tisane nepo. Kotimo sawia popasamo kepoane nōmo some karapo. Asiane nōmo some kepoane nōmo hemakapurakarifare? <sup>11</sup> Hao, kaisie. Nōmo neaki kakaro somerakanapo. Isiapo makata kakaro hemakapusua hākasane somerapapo. Arirakano isiapo<sup>8</sup> makata asesa hākasane somerapapo. Somesa nine repo kakimarakarifapo.

<sup>12</sup> Hauaka wo makata rakirane nōmo somerakano repo kakimarafapo. Arirakano hepene yapura makata rakirane nōmo somerakano repo kakimakosare? Wae, kakimakosafapo. <sup>13</sup> Asiamo hepene yapura makata rakirane aseako aporo meta hepene yapura hikia, hauaka wo somehoko pesafapo. Ano nī hākasa hepene aeyaka pekea, Aporomanomo Táke anoane hauaka wo somehoko pesapo.

<sup>14</sup> Arirakano fana ima yaoa Mosesemo rete asiamo heseke pariraka rakikia ira maporaka heseke paremaresa ayiáka, Aporomanomo Táke anoane ayiáka paremareakosapo. <sup>15</sup> Ano paremarerakano aporo hinamomo anoaki himu hakásaraka hemakapukua risiane yayia risikiakosapo.” Aíyaka Yasumo somesapo.

<sup>16</sup> Asiamo hauaka wo aporo hinamo su risiane Kotimo himu tumurumo hemakapusuasamo ipi hokosa hākása yine pusiesapo. Pusierakano ipi hokosa pesapo. Perakano aporo hinamomo eaki himu hakásaraka hemakapukua risiane eyaki yayia risikiakosapo. Iane hurupukusafapo. <sup>17</sup> Kotimo ipi hokosamo aporomano fanasihokosakipoko pusiesafapo. Aporomano mafasiakosakipoko pusiesapo. <sup>18</sup> Asiamo Kotimo hokosamo someane aporo hinamomo kakimarakano iane fanasihokosafapo. Arirakano Kotimo hokosamo someane kakimakanafonorakano,

---

<sup>8</sup> 3:11 Isiapo ayiáka popasa amo kepoane oyapo. Koti soko, Yasu soko, Ho Kotesa soko, i suane ayapo.



fanasihokosane fana yaiya murikimaka maresapo. Asiamo Kotimo ipi hokosa hakāsa yiamo somesane kakimakanafonosasamo fanasihokosane fana yaiya murikimaka maresapo.

<sup>19-20</sup>Fanasihokosa kepoane oyapo. Faesa hauaka wo pesapo. Faesa pesane aporo hinamomo hisiraka namina watikiaka rakiako katosā yia risirapo. Aporo hinamomo namina watikiaka rakisiane aporo metamo aserapaka faesa á perafapo. Faesane kakaro hisiraka, faesa á risikiako perafapo. <sup>21</sup>Arirakano namo kakaro koteaka rakira aporo hinamoane faesa á risikiako perapo. Asiamo ipu Kotimo someane kairaka kekemaraka rakiraka risirane aporo suamo asekeasimo i faesa á rakiraka risirapo.

**“Kotimo unihaeaka rekeasimo murikimasa aporoane  
Yasu reapo,” aiyaka Yonemo somesane oyapo.**

<sup>22</sup>Yasu ipi aporo hakāsa purayaki Yutía hauaka pusuapo. Á pukua risike ipu aporo hinamo hea tapukumurisiapo. <sup>23</sup>Arirakano Inone apeane Sarime taonea makeraka, he kára pekereakipoko aporo hinamo perakano iane Yonemo hea tapukumurisiapo. <sup>24</sup>Yonemo hea tapukuamurisia maiya amo e tipura haru makesafapo.

<sup>25</sup>Arirakano Yu aporo hakāsa metamo Yonemo ipi aporo hakāsa pura metakiraki makata watikisa fahokosakipoko hea tapukumuriane tafatafaraka somesapo. <sup>26</sup>Tafatafaraka somerakano Yonemo aporo hakāsa pura suane Yone rea pekea someraka, “Tisao, he Yotane yaoraka ne rea takua aporo pesane hemakapurakarire? E<sup>h</sup> peakosa ikia karane maropohoko nōmo some karakasupo.” Airakano Yonemo, “Ao. Eane nōmo hemakapurakaripo.” Airakano ipu someraka, “Aporoamo aporo hinamo metakirane hea tapukumurirakanapo. Asiamo aporo hinamo suamo né metakarikia e rea purakanapakae.”

<sup>27</sup>Airakano Yonemo someraka, “Kotimo karakano hakāsa yine aporomo marapo. Kotimo kakanafonorakano aporomo marafapo. <sup>28</sup>Fana nōmo someraka, ‘Ano Keresofapo. Kereso peakosa ikia karane nōmo maropohokosakipoko ano fana pesapo.’ Aiyaka nōmo somerakaswane repo kaisiapo. <sup>29</sup>Arirakano aporomo hinamo faisane aporo metamo arumarafapo. Hinamo faisane aporoamo ipi yiamo arumarapo. Hinamo arumakosa aporoamo somerakano ipi maemo kairaka sesenapo. Ipi mae sesena ayiāka ano kára seseraka rakiraka rekenapo.<sup>i</sup> <sup>30</sup>Yasu ipi káraraka hokopukua rekeakosapo. Ano wakasemaraka rekeakosapo.” Aiyaka Yonemo somesapo.

---

<sup>h</sup> 3:26 E peakosapo, aiyaka popasa amo kepoane Yasupo.    <sup>i</sup> 3:29 Yasumo some kakimara aporo hinamoane hinamo faisā asíapo. Hinamo apia asíane Yasupo. Hinamo apiamo mae asíane Yonepo.

<sup>31</sup> Arirakano aporo hepene yapunaka pesane ipi namo kakaro fanaraka rekenapo. Arirakano hauaka wo takapesa aporoane ipi hauaka menapo. Ipi hauaka wo makata rakirane somerapo. <sup>32</sup> Asiamo e hepene yapunaka pesasamo hepene yapura makata asesane soko, makata kaisiane soko, epo somerapo. Someane aporo metakiramo kakimakanafonorakano yia, epo makata asesane soko kaisiane soko yaiya somerapo. <sup>33</sup> Arirakano aporo metakiramo epo somesane kakimaka risike someraka, “Ao, Kotimo someane kakarohoareapo,” airapo.

<sup>34</sup> Arirakano e Kotimo pusierakano pekea Kotimo someane some karakanapo. Ho Kotesa fete feteaka Kotimo eaki kasáapo. Kára komarukua kasápo. <sup>35</sup> Ata Káramo ipi hokosa ane himu tumurumo hemakapukua reke, ipi hokosamo makata su asekea rekeasimo murikimaka maresapo. <sup>36</sup> Asiamo Kotimo ipi hokosamo somesane aporo hinamomo kakimarakano iane Kotiyaki yaiya risikikosapo. Kotimo hokosamo somesane koaretaerakano iane Kotiyaki yaiya risikiakosafapo. Aporo hinamomo kakipayasaki Kotimo yaiya saperaka rekeakosapo.

#### **Sameria hinamoaki Yasumo somesane oyapo.**

*Matiu 4:12; Maka 1:14; Ruki 4:14*

**4** <sup>1-3</sup> Aporo hinamoane Yasumo hea tapukumurisiafapo. Arirakano ipi aporo hakāsa puramo hea tapukumurisiapo. Aporo metakiramo asekea someraka, “Yasu patera asesá aporo hinamo yakaiane Yasumo ipi aporo hakāsa puramo hea tapuku amurire. Asiamo Yasu patera asesá aporo hinamoane yakairaka káranakanapo. Arirakano Yonemo hea tapukumurisia aporo hinamoane hukusipo. Yasumo aporo hinamo hea tapukumurisia amo Yonemo aporo hinamo hea tapukumurisiáne marokeane.” Aíyaka somerakano Ferese aporomo kaisiapo. Asiamo Yasumo hemakapuraka, “Nōmo makata rakirane aporomo somerakano Ferese aporomo kairakayiapo.” Aíyaka hemakapuraka Yasu Yutía hauaka metakarikia Kariri hauaka efera paripukusakipoko <sup>4-5</sup> pekea Sameria<sup>j</sup> hauaka tipia paura á reapo. Sameria hauaka tipia Saika taone á rekenapo. Saika taone makeraka hauaka ane Yakopemo ipi hokosa Yosefeaki wate fana tarisiapo.

<sup>6</sup> Yakopemo he keasimo hauaka rasa á Yasu pukua kayapo. Maiya tipiamo ipi korakemo finiraka pesasamo ipi sosekenaraka kayapo. <sup>7-8</sup> Kayakipoko ipi aporo hakāsa puramo makata nakosa ropohoko taonea pusuapo. Pusuakipoko Yasu rea Sameria hinamo he takamako perakano Yasumo someraka, “Ano he takamakasie.”

---

<sup>j</sup> **4:3-5** Yutía hauaka soko Kariri hauaka soko Yu aporomo hauakapo. Arirakano Sameria aporo hinamoane hapokase aporo hinamopo. Hapokasesane Yu aporomo Yu hinamoanafonosa arumasapo. Yu aporoanafonosamo Yu hinamo arumasapo.

<sup>9</sup>Airakano Sameria hinamoamo hemakapuraka, “Yu aporo Sameria aporo tati hakāsa sarimanafapo. Yu aporomo Sameria aporoane arare, arirakano Sameria aporomo Yu aporo arare anafapo.” Aiyaka hemakapukua hinamoamo someraka, “Marirakano nōmo anoaki he takamakasio airakanare? Né Yu aporopo. Ano Sameria hinamopo. Marirakano nōmo né ararerakasimo somerakanare?” <sup>10</sup>Airakano Yasumo hinamoaki someraka, “Kotimo makata yaku karane soko, nōmo hemakapukua, arirakano nōmo anoane soko asekea, ereapo, aiyaka hemakapusua satiki, nōmo anoaki aiyaka somehoafunufapo. Nōmo neaki someraka, ‘Ano he takamakasio,’ airakano nōmo ano asekea hemakapusua satiki nōmo anoaki someraka, ‘Ano he takamakasio,’ aihofunureapo. Airakano nōmo né he fuakataena kakafunupo.”

<sup>11</sup>Airakano hinamoamo someraka, “Hauaka rasa kutusasamo takamakosane nōmo petoro fareapo. He fuafuana mayiāka takamakosare? <sup>12</sup>Isiapo makasa kaua kekema Yakopemo hauaka one rasapo. Wate fana epo soko ipi hokosamo soko ipi saro sipimo soko hauaka rasa he kesa hákasane nesapo. Yakope kurakano epo hauakane soko he rasane soko isiapo asekea risikinapo. Hauaka wafaya makasa kaua kekema Yakopeane aporo wakasemare? Nōmo he haku fuakataena kakaro kotesa kakakosaporakane ne ní hákasane aporo fanarakanare? Yakopeane makamakesekerakanare?”

<sup>13</sup>Airakano Yasumo someraka, “Hauaka rasa he kesane aporo hinamomo nesane efera hunia soko ‘He nariripo,’ aihokosapo. <sup>14</sup>Nōmo he takamaka karakano aporo hinamomo nenaka efera hunia, ‘He nariripo,’ aihokosafapo. Nōmo he akarane he fuafuana ayiāka ne tua fuafuahokosapo. Asiame né yayia rekeakosapo.”

<sup>15</sup>Airakano hinamoamo someraka, “Aporo fanao, he fuafuanane anoaki makasio. Makarakāno efera hunia, “He nariripo,” aihokosafapo. Arirakano efera hunia nōmo takamako peakosafapo.” <sup>16</sup>Airakano Yasumo someraka, “Ní makapinu pasimaka peanie.” <sup>17</sup>Airakano hinamoamo someraka, “Nōmo aporo rekenafapo.” Airakano Yasumo someraka, “Kakarorakae. <sup>18</sup>Aporo kakorea sumo ne arumasapo. Asiane yumo ne aporoyaki kake, ne kakaro aporomo arumasafapo. Ne mokome aporoyaki purareapo.”

<sup>19</sup>Airakano hinamoamo someraka, “Aporo fanao, nōmo ainane nōmo hemakapukua somesasamo né porofete apororeapo. <sup>20</sup>Repo Yu aporomo someraka, ‘Yarusarame sitia Kotiaki kekerehoanie.’ Aiyaka repo somesa nine, isiapo makasa kaua kekema Sameria hauaka ūria hikia a ipu Kotiaki kekeresapo.”

<sup>21</sup>Airakano Yasumo someraka, “Keseke fasereapera sereamo Ata Káraki kekerenane Sameria hauaka ūria soko, Yarusarame sitia soko tetá hákasa aeyaka hákasa kekerehokosafapo. Hauaka su aeyaka

kekerehokosapo. <sup>22</sup>E kekeresane repo Sameria aporo hinamomo kakaro koteaka hemakapurakanafapo. Mafasira aporo hauaka wo takapeasimo Yu aporo irane Kotimo murikimarakano, Yu aporo ira aeyaka hauaka wo takapesapo. Yu aporo ira aeyaka takapesasamo e kekeresane isiapo Yu aporomo hemakapurakanapo. <sup>23</sup>Arirakano keseke soko yumo soko aporo hinamomo kaumo hemakapukua kekerenafaraka himumo Kotiaki kakaro koteaka hemakapukua kekerehokosapo. Aporo hinamomo homo soko kekerehokosapo. Kakaro hemakapukua kekerena aporo hinamoane Kotimo sesenapo. <sup>24</sup>Kotiane ipi hopo. Hosasamo e kekerena aporo hinamomo homo kekerenapo. Himumo soko kakaro koteaka hemakapukua kekerenapo.”

<sup>25</sup>Airakano hinamoamo someraka, “Kotimo unihaeaka rekeasimo murikimasa aporo Keresoane peakosapo. Aiyaka nōmo hemakapurakaripo. E peraka makata suane isuaki somehokosapo.”

<sup>26</sup>Airakano Yasumo someraka, “Nōmo somerakane, anopo. Nōmo someraka yiamo neaki somerakanapo.” Aisapo.

<sup>27</sup>Arirakano Yasumo aporo hakāsa pura popariperaka aseane Yasumo hinamoaki somerakano asekea, fofaraka makata meta somesafapo. “Marirakano hinamoaki somerakanare? Makata yakapa makasierakanare?” Aiyaka soko ipu somesafapo. <sup>28</sup>Arirakano hinamoamo ipi petoroane metakarikia, apea foaka paripukua aporo hinamoaki someraka, <sup>29</sup>“Nōmo fana kake makata su rakisiane aporoamo anoaki somerakasapo. Fana epo ano asekeanafonosa nine nōmo aina suane somerakasapo. E aseako peae. Keresoane erakapo.”

<sup>30</sup>Airakano aporo hinamomo namina ape metakarikia Yasu rea aseako pesapo. Ikiā kara peraka arisiamo <sup>31</sup>Yasumo aporo hakāsa puramo eaki someraka, “Tisao, makata nesie.” <sup>32</sup>Airakano Yasumo someraka, “Nōmo makata nenane repo hemakapurakarifapo.” <sup>33</sup>Airakano aporo hakāsa puramo namina yia someraka, “Aporo metamo makata nakosa maka pekea eaki karakasare?”

<sup>34</sup>Airakano Yasumo someraka, “Epo ano pusiesamo epo hemakapusuane nōmo kekemaraka, ipi makata rakirane nōmo rakikia marakano nōmo makata nena asiane ayapo. <sup>35</sup>Arirakano repo someraka, ‘Ere maiya kitafasu faraka witi hae susekeno tumokoakosapo.’ Airakano nōmo someraka, Hemoane asesie. Witi hae tumokoasimo yumo surareapo. <sup>36</sup>Witi hae tumora aporomo makata ropo yumo morakanapo. Witi hae tumora ayiāka aporo Yasuyaki yaiya risikiasimo pasimorakanapo. Witi hae potena<sup>k</sup> aporo soko, arirakano witi hae tumora aporo soko, tetā

---

<sup>k</sup> 4:36 Witi hae potena ayiāka fana aporomo Kotimo someane some kasā ayapo. Witi hae tumora ayiāka aporomo Kotimo someane kesekea some akarane aporo hinamomo kakimaka risikiako parirakano pasiamora ayapo.

tatī sesehokosapo. <sup>37</sup>Fana aporo metamo someraka, ‘Aporo metakiramo makata mano potenapo. Arirakano aporo metakiramo tumorapo.’ Aiyaka somesane kakaro somehoareapo. <sup>38</sup>Arirakano aporo metakiramo makata mano poteraka asekea nina, makata mano potesane taneheheraka hemoa wate pesane repo tumokoako nōmo pusierakanapo. Aporo metakiramo wafororaka rakisia nine wate pesane repo tumorakanapo.”

<sup>39</sup>Aiyaka Yasumo ipi aporo hakāsa puraki takumeaka someraka reakipoko hinamoamo ipi apea someraka, “Ano fana kake makata su rakisiane anoaki somerakasapo.” Aisasamo Sameria aporo hinamo yakaimo Yasuaki himu hakāsaraka hemakapusuapo. <sup>40</sup>Ipu namina ape metakarikia Yasu rea pekea someraka, “Ne isiapo apea waka rekeako peae.” Airakano Yasu ipu apea pukua iyaki yape tetá waka reapo.

<sup>41</sup>Waka reke epo some karakano aporo yakai metakiramo soko epo somesane kakimasapo. <sup>42</sup>Kakimaraka hinamoaki ipu someraka, “Nōmo somesa hákasa kaikia eaki himu hakāsaraka hemakapuraka asiafapo. Yasumo ipi soko somerakano kaikia isiapo eaki himu hakāsaraka hemakapurakanapo. Epo aporo hinamo su mafasiako apere, aiyaka isiapo hemakapurakaripo,” aiyaka ipu somesapo.

#### **Kamania makata rakisia aporomo hokosa Yasumo mafasane oyapo.**

<sup>43</sup>Sere tetá faraka, aporo hinamo ipu ape Saika apeane Yasumo metakarikia Kariri hauaka á pusuapo. <sup>44</sup>Pukua Yasumo iaki someraka, “Kotimo some kará porofete aporomo ipi ape sumu aporo hakāsa risia amo soko, ipi ape wará aporo hakāsa risia amo soko, eane makama fananafapo,” aisapo. <sup>45</sup>Asia nine e Kariri hauaka perakano asekea Kariri aporomo e teresapo. Fana Ape Farimaresa Hemakapuko Hokono Akera maiya amo i namina Yarusarame sitia hikia aseane Yasumo makata su rakirakano asesapo. Asesasamo Yasuaki teresapo.

<sup>46</sup>Arirakano Kariri hauaka á Kena taonea Yasu paripusuapo. Fana Kena taonea epo namo heane waene he maparisapo. Arirakano Kena taonea kamania makata rakisia aporo Kapaneame taone aeyaka kimisi pesapo. Ipi apea ipi hokosa makata takamasa warekeno metakarikia Kena taonea kimisi pesapo. <sup>47</sup>Kimisi pekea rea maiya amo kaiyiáne, Yasu Yutía hauakane metakarikia Kariri hauaka wo pesapakano kaikia, e Yasu rea pekea someraka, “Nōmo aporo hokosa kára makata takamasa kukusipo. Hokosane mafahoko Kapaneame taonea peae.” <sup>48</sup>Airakano Yasumo someraka, “Kotimo wakupumo hemakapukua rakira asekeanefonorakano repo anoaki himu hakāsaraka hemakapukusafapo.” <sup>49</sup>Airakano kamania makata rakisia aporoamo someraka, “Aporo fanao, nōmo hokosa kukukohoamo nōmo apea peae.”

<sup>50</sup>Airakano Yasumo someraka, “Né pusie. Nōmo hokosa koteaka rekenapo.” Airakano someane kamani aporoamo kakimaka ipi apea

pukua <sup>51</sup> ikia kara peane, ipi aporo raipamo e sapenekea someraka, “Ní hokosa fasapo. Koteaka rekenapo.” <sup>52</sup> Airakano kamania makata rakisia aporoamo someraka, “Fasane masinaka fasare?” Airakano ipu someraka, “Rau samapu wane korokomo ipi kau sisipusane fasapo.”

<sup>53</sup> Airakano hokosamo ipi atamo hemakapuraka, “Rau samapu wane korokomo Yasumo someraka, ‘Ní hokosa koteaka rekenapo.’ Aisa maiya amo kau sisipusane fahoareapo.” Aíyaka hemakapukua ipi soko ipi aseamo soko, ipi hokosamo soko, ipu namina suamo Yasuaki himu hakásaraka hemakapukua risiapo.

<sup>54</sup> Asiamo Yasu Yutía hauaka metakarikia Kariri hauaka paripesa maiya amo, hokosa mafasa ane Kotimo wakapumo hemakapukua rakira yape tetáne ayapo.

**He kafa he fea aporo hakása meta makata  
takamasa Yasumo mafasane oyapo.**

**5** <sup>1</sup> Wakasema nina Yu aporomo Kotiaki kekerehoko hokono kesapo. Hokono akera maiya amo Yasu Yarusarame sitia hisiapo. <sup>2</sup> Yarusarame sitia ekemo rurusane ikia koro yakai otoro mosapo. Ikia koro hakása metane yano motosa Saro Sipi Ikia Koropo. Arirakano ikia koroane makeraka he kafa kesapo. Yu aporomo Hipuru meaka he kafa ane yano motosa Petésata yano motosapo. He kafa he fea ape mano kakoreasu kisiakipoko á aporo yakai makata tasa warisiapo. <sup>3</sup> Warisiane aporo metakira hi fausa soko, aporo metakira kakuna masa soko, aporo metakira korosakataesa soko i warisike, hea makakayahoasimo warisiapo. <sup>4</sup> [Warisike aseane Unihaemo hepene aporo pekea he kafa makakayarakano, aporo makata tasa warisiane hakása meta fana pukua, he kakayarakano he tapuane ipi makata takamasane farakano anapo.]

<sup>5</sup> Airakipoko aporo hakása meta keremisi teti aitimo (38) makata takamasa reke, ape manoa warekeno, <sup>6</sup> Yasumo asekea hemakapuraka, “Aporoane maiya káramo makata takamasa wareareapo.” Aíyaka hemakapukua Yasumo aporoaki someraka, “Ne makata takamasane fahoasimo hemakapurakarire?”

<sup>7</sup> Airakano aporoamo someraka, “He kakaya ana maiya amo ano hea pukusakipoko asiane, aporo metamo ano hea maka pusuafapo. Ano maka punafonorakano kakape puraka rekipoko, aporo meta fana pukua hea tapusesapo.”

<sup>8</sup> Airakano Yasumo someraka, “Ne takahisie. Ní asakapu maweroraka maka pusie.” <sup>9</sup> Aihoanine aporoane wate faraka takahikia ipi asakapuane maweroraka maka pusuapo. <sup>10</sup> Fenena maiya amo aporoamo asakapu maka purakano, Yu aporo sisima unihae suamo aporo makata takamasa mafasaki someraka, “Pipu fenena maiyapo. Fenena maiya amo asakapu maka pukupo. Aíyaka fana somemane motosusupo.”

<sup>11</sup>Airakano aporoamo someraka “Aporo ano mafasa amo someraka, ‘Ní asakapu maka pusie,’ airakasapo.” <sup>12</sup>Airakano ipu someraka, “Asakapu maka pusiesane aporo epamo aiyaka somerakasare?”

<sup>13</sup>Airakano aporo hinamo yakai sarimasakipoko Yasu kokororaka pusuapo. Pusuakipoko aporo makata takamasa mafasamo someraka, “Aporoane eparakapo. Ano himeteripo. E pureapo,” aisapo. <sup>14</sup>Aiyaka wakasema nina Yasu Kotimo apea koraka reke, epo aporo mafasane aseraka someraka, “Ní makata takamasane farareapo. Makata watikisa rakirane efera hunia rakiakopo. Makata takamasa káranapaka makata watikisane kakaro metakarinie.”

<sup>15</sup>Airakano aporoane pukua Yu aporo sisima suaki someraka, “Yasumo ano mafasapo.” <sup>16</sup>Airakano ipu hemakapuraka fenena maiya amo Yasumo aporo makata tasane mafasapo. Aiyaka hemakapusuasamo ipu Yasuane mokoatikisapo. Yasumo fenena maiya amo rakisiasamo ipu Yasuane hukurusuapo. <sup>17</sup>Ipu hukururakano Yasumo someraka, “Maiya suamo nōmo Atamo rakiraka rekenapo. Nōmo soko rakiraka rekenapo.” <sup>18</sup>Aiyaka somerakano Yu aporo sisima suamo, “Yasu rusua kukusapo,” aiyaka hemakapusuapo. Fenena maiya yaposane Yasumo metakarikia, arirakano epo someraka, “Kotiane nōmo Atapo.” Aiyaka Yasumo ipi yia máfaraka, ano Koti asiapo airakae. Airakasakipoko Yasuane rusua kukusapo, aiyaka Yu aporo sisima suamo hemakapusuapo.

**Yasumo someraka, “Ano Kotimo hokosapo,” aisane oyapo.**

<sup>19</sup>Yu aporo sisima suamo Yasuaki hukururakano Yasumo iaki some paripuraka, “Nōmo reaki kakaro somerakaripo. Ano Kotimo hokosasamo, nōmo nī hemakapusua aeyaka rakirafapo. Nōmo Atamo rakirane asekea hakása yineraka rakirapo. Nōmo Atamo rakira ayiáka, nōmo soko hakása yineraka rakirakanapo. <sup>20</sup>Atamo himu tumurumo anoane hemakapukua epo ipi makata rakira suane anoaki tarirakanapo. Tarisiane marokeraka makata kára meta tariakosapo. Tarirakano nōmo makata kárane rakiakosapo. Rakirakano repo asekea someraka, ‘Uao, itifisiafapo,’ aihokosapo. <sup>21</sup>Arirakano Atamo aporo kusua maturikia taeraka yaiya rerane akara ayiáka, nōmo soko ayiáka yaiya rera kakakosapo. Nōmo nī hemakapusua aporo murikimasaki yaiya rerane kakakosapo.

<sup>22</sup>Arirakano Atamo aporo hinamoane fanasihoko hukururafapo. Epo ipi hokosa anoaki someraka, ‘Aporo hinamo fanasihokosane nōmo hukurunie,’ aisapo. <sup>23</sup>Aisasamo aporomo Koti makárana ayiáka Kotimo ipi hokosa makárhoasimo, ‘Nómo hukurunie,’ aiyaka Kotimo ipi hokosane murikimaka maresapo. Aporomo Kotimo hokosane makárhoanafonorakano, hokosa pusiesa amo ipi Ata Kotiane soko makáranafapo.

<sup>24</sup>Hao, kaisie. Nōmo reaki kakaro somerakaripo. Nōmo somesane aporo hinamomo kakimaka, arirakano ano pusiesa aki himu hakásaraka

hemakapukua risira aporo hinamoane yaiya risike fahokosafapo. Iane hukurukua fanasihokosafapo. Kura faraka farearaka rera takua risikiakosapo. <sup>25</sup>Hao, kaisie. Nōmo kakaro somerakaripo. Aporo hinamomo Kotiaki himu hakásaraka hemakapunafonosane kusua ayiáka risikinapo. Aporo hinamo kusua ayiáka risia amo nōmo meane kaikia kekemarakano, keseke maturikia taena maiya amo i yaiya risikiakosapo. <sup>26</sup>Yaiya rera kepoane nōmo Atapo. Nōmo Atamo yaiya rerane ipi hokosa anoaki kasapo. Kasasamo yaiya rera kepoane ano sokopo. <sup>27</sup>Aporomanomo Tákeane anopo. Asiasamo hukuarura maiya amo aporomanoane parakuhoasimo Atamo ipi hokosa ano murikimaka maresapo. <sup>28</sup>Fofahokopo. Keseke aporo hinamo su kusua hauaka murisia amo soko, nena yaoa kukua kesa amo soko, ipu suamo nōmo meane kaikia, <sup>29</sup>hauaka murisiane metakarikia turikia tariakosapo. Aporo hinamo hitaferaka risia maiya amo koteaka risia aporo hinamoane turikia tarirakano iaki nōmo someraka, ‘Anoyaki yaiya risie,’ aihokosapo. Arirakano aporo hinamo hitaferaka risia maiya amo watikiaka rakiraka risia aporo hinamoane turikia tarirakano iaki nōmo someraka, ‘Reane fanasinane nōmo motorakanapo,’ aihokosapo.” Aíyaka Yasumo somesapo.

**“Yasu ipi Kotimo hokosapo.” Aíyaka repo  
hemakapusimo tarisiane oyapo.**

<sup>30</sup>Arirakano Yasumo someraka, “Nōmo nī hemakapusuane nōmo kekemarako rakirafapo. Kotimo, ‘Ayiáka hukurunie,’ airakano nōmo ayiáka hukururapo. Epo ano pusiesamo epo hemakapusua ayiáka nōmo soko ayiáka hemakapukua rakirapo. Nōmo hemakapusua ane makama kesekenapo. Asiasamo nōmo koteaka ereketaeraka hukurukua maroponapo. <sup>31</sup>Nōmo nī ainane nōmo nī yiamo somehoane siahoasifareapo. Nōmo nī ainane nōmo nī hákasa somerakano repo kotaferakae, aihokosapo. <sup>32</sup>Arirakano Koti ipi wikinisi meta reke, nōmo ainane somehokosapo. Nōmo ainane Kotimo somerakano epo kakaro somerapo, aiyaka nōmo hemakapurakanapo.

<sup>33</sup>Fana Yu aporo sisíma répo aporo metakiraki someraka, ‘Yonemo some kepoane kaiyako pusie.’ Airakano Yone rea ipu kaiyako pusuapo. Pukua Yone rea perakano Yonemo anoane kakaro somesapo. <sup>34</sup>Yonemo somesane nōmo kaiyisimo Yonemo somesafapo. Repo kaiyisimo Yonemo somesapo. Asiamo re mafasiakosakipoko nōmo reaki mahemakapukua somerakanapo. <sup>35</sup>Arirakano nafa faena ayiáka, Yonemo maropohoko pekea some kasámo, nafa faena ayiáka faesapo. Faesa á re maiya wakasemamo risike epo somesane seseaka kaisiapo.

<sup>36</sup>Arirakano nōmo makata ayianamo Yonemo somesane marokerakanapo. Asiamo nōmo atamo rakiniesane nōmo wakapuaka rakirakano repo asekea hemakapuraka, ‘E Kotimo pusiehoareapo.’ Aíyaka



repo hemakapusimo rakirakanapo. Arakiramo Kotimo ano pusiesane reaki tarirakanapo.

<sup>37</sup>Arirakano Kotimo soko nōmo ainane asekea tarirakanapo. Epo ipi ano pusiesamo nōmo ainane somerakanapo. Somerakano ipi meane repo kairakarifapo. Ipi hikumisiane repo aserakarifapo. <sup>38</sup>Epo pusierakano pesa aporoaki repo himu hakásaraka hemakapurakarifapo. Hemakapunafonoraka epo pusiesamo someane soko repo hemakapurakarifapo. <sup>39</sup>Yaiya risikiakosakipoko repo Kotimo sawia popasane kokoa menoanane. Kotimo sawia popasa amo anoane tarikia somerakanapo. <sup>40</sup>Somerakano yia yaiya risikiakosakipoko ano rea re perakarifapo. <sup>41-42</sup>Repo himuane nōmo aserakaripo. Aseane repo Kotiaki himu tumurumo hemakapunafonorakano aserakaripo. Asiamo repo ano makáraraka soko metao, mawakasemaraka soko metao, ane nenakamaka makata asiapo. <sup>43</sup>Arirakano nōmo atamo hemakapusuane nōmo kekemaraka, ipi yano motosa aeyaka ano pesapo. Ano pesane repo patera atarire. Arirakano aporo metamo epo ipi hemakapusua rupiaka rakipe peraka, epo ipi yano motosa máfarakano eaki repo patera asere. <sup>44</sup>Aporomo re asekea someraka, ‘Aporoane kotesapo,’ aihoasimo repo namina yia kaumo arakire. Arirakano Kotimo re aseraka, ‘Aporoane kotesapo,’ aihoasimo repo rakirafapo. Rakianafonorakano Kotimo someane soko repo kakimakasifareapo. Koti ipi hákasapo. Koti meta rekenafapo.

<sup>45-47</sup>Repo someraka, ‘Isiapo Mosesemo somemaneane kekemaraka risikino Kotimo isu pasimokoakosapo.’ Aíyaka hemakapurane kotafe hemakapurakanapo. Fana Mosesemo anoane popasapo.<sup>1</sup> Popasane repo kakimasa satiki, nōmo someane soko kakimakafunureapo. Epo someane repo kakaro kakimakanafonosasamo nōmo someane soko kakimakosafapo. Epo someane kakimakanafonosakipoko epo re pasimokoa Kotiaki hukurukusapo. Nōmo re pasimokoa Ataki hukurukusafapo.” Aíyaka Yasumo somesapo.

**Aporo fae taoseneaki (5,000) Yasumo farawa kasane oyapo.**

*Matiu 14:13-21; Maka 6:30-44; Ruki 9:10-17*

**6** <sup>1-4</sup>Ape Farimaresa Hemakapuko Hokono Keakosa maiyane makerakano, Yasu paripukua, he Kariri teraporaka taku ra pusuapo. He Kariri ane yano motosa meta he Taipiriasepo. Aporo hinamo makata tasane Yasumo mafarakano aporo hinamo yakaimo asesasamo Yasu patera kekemarafe perakano, Yasu ūria hikia ipi aporo hakāsa purayaki toke <sup>5</sup>aseane, aporo hinamo yakai perakano asekea Firipiaki

<sup>1</sup> 5:45-47 Kotimo sawia Mosesemo popasane oyapo. Stat, arirakano Kisim Bek, arirakano Wok Pris, arirakano Namba, arirakano Lo, sawi kakorea suane Mosesemo popasapo.

Yasumo someraka, “Aporo hinamo suamo makata nakosane isiapo ma ropohokosare?” <sup>6</sup> Aíyaka Firiplane kau aseakosakipoko Yasumo somesapo. Asiamo Yasumo ipi ayiakakosane hemakapukua reke Firipiaki kaisiapo.

<sup>7</sup>Kairakano Firipimo someraka, “Aporo hinamo yakaisakipoko ipu suamo feteaka nasimo mone tu harote kinamo (K200)<sup>m</sup> ropohoasifareapo.” <sup>8</sup>Airakano aporo hakāsa pura hakāsa meta Saemone Pitamo mamanea Enitumo someraka, <sup>9</sup>“Aporo hokosa metamo farawa parosane kakoreasu, arirakano pokoa tetá ayiáka atoae. Asiamo aporo yakaisakipoko sia nasifareapo.”

<sup>10</sup>Airakano Yasumo aporo hakāsa puraki someraka, “Aporo hinamo su toaesie.” Airakano asane sususakipoko a toapo. Aporo á toa susuane menosane fae taosene (5,000) ayiáka menosapo.” <sup>11</sup>Arirakano Yasumo farawa maka Kotiaki suseaka kurikuriraka rumaraka aporo toaki kasiesapo. Pokoa soko maka suseaka kurikuriraka rumaraka aporo toaki kasiesapo. Kasierakano aporo hakāsa puramo kasapo. Karakano aporo suamo siaraka nesapo. <sup>12</sup>Siaraka nenakano aporo hakāsa puraki Yasumo someraka, “Farawa nekea siarakano metakira yia tokeno mosie. Nenakamaka yaoa mokoatehokopo.” <sup>13</sup>Airakano i pukua farawa yia tokeno moko, mate keno sua kekea komarukua taesapo. <sup>14</sup>Arirakano farawa hukusi kakorea suane Yasumo makáraraka ayiáka, Kotimo wakapumo hemakapukua rakirane rakirakano aporomo asekea someraka, “Porofete aporo kára hauaka wo peakosaposane ereapo.”

<sup>15</sup>Airakano Yasumo hemakapuraka, “Aporo suamo anoane maka Rome kamani aporoane marokeraka unihaeaka asekea rekeasimo mareakosakipoko hemaka apure.” Aíyaka Yasumo hemakapukua ipu ayiakakohoamo ipi haku ūria hisiapo.

### **Yasu he kima finirape pusuane oyapo.**

*Matiu 14:22-33; Maka 6:45-52*

<sup>16</sup>Samapu maiya tuakeramo aporo hakāsa pura he Kariria pukua, <sup>17</sup>kasu ripaka Kapaneame taone taku ra poparipukusakipoko, kasu rokoa puraka risiapo. Kasu rokoa puraka risikiyia yao eresapo. Ereamo Yasu peanafonorakano kasu rokoa puraka risiapo. <sup>18</sup>Rokoa puraka risike atifo he kupayaki kára pesapo.

<sup>19</sup>Perakano he numu tipia rokoa puraka risike aseane kasu erekeraka Yasu he kima finirape perakano asekea, i kara namoraka himu fasapo. <sup>20</sup>Himu farakano Yasumo someraka, “Anopo. Namohokopo.” <sup>21</sup>Airakano ipu someraka, “Ao, kasua ripasie.” Airakano Yasu kasua parorakano aseane kasuane he fe taku ra foakayia paurakano asesapo.

---

<sup>m</sup> **6:7** Isiraya aporomo mone hae yano motosa tanariasepo. Asiāne isiapo hemakapukusakipoko kina popasapo. <sup>n</sup> **6:10** Arirakano hinamo soko, hokosa soko, metakira menohoanafonosa amo farawane soko, pokoane soko, sia nesapo.

**“Yasu masiarakapo.” Aíyaka kosane oyapo.**

<sup>22</sup>Mituru fiarakano aporo hinamo yia popariraka risiamo hemakapuraka, “Kasu hakāsa humaresa Yasumo aporo hakāsa pura ripaka pusuapo, Yasu iyaki hakāsa ripaka pusuafapo. Yasu masiarakapo.” Aíyaka hemakapukua <sup>23</sup>aseane kasu metakira Taipiriase taone aeyaka pekea karimaresane asesapo. Arirakano Unihae Yasumo farawa soko, pokoa soko, Kotiaki suseaka someaka, makata siaraka nesa hauaka ane makeraka kasu metakirane karimararakano asesapo. <sup>24</sup>Arirakano ipu Yasu soko Yasumo aporo hakāsa purane soko koane fasekeno asekea, kasu karimaresa á i ripaka, ipu Yasu kope Kapaneame taone taku ra rokoa pusuapo.

**“Yaiya rekeakosa makata nenane anopo.” Aíyaka Yasumo takumeaka somesane oyapo.**

<sup>25</sup>Arirakano aporoamo kasu rokoa pukua taku ra pauraka ipu Yasuane kokoa aseraka someraka, “Tisao, ne masinaka pesare?” <sup>26</sup>Airakano Yasumo someraka, “Nōmo kakaro somerakaripo. Repo farawa siaraka nesakipoko repo ano kope apere. Nōmo Kotimo wapakumo hemakapukua rakirane rakirakano repo asekea hemakapukua kope perakayiafareapo. <sup>27</sup>Hauaka wo makata nenane torehokosapo. Makata akipoko rakiakopo. Re yaiya rera makata nena makosakipoko rakinie. Makata nenane nōmo reaki kakákoripo. Aporomanomo Tákeane anopo. Yaiya rera makata nenane reaki kakákoripo. Kakasimo nōmo Ata Koti ipi yiamo ano murikimaka maresapo.”

<sup>28</sup>Airakano ipu someraka, “Kotimo makata rakirane isiapo yakapa rakiaere? Kotimo makata yakapa sesenare?” <sup>29</sup>Airakano Yasumo someraka, “Kotimo makata rakira sesenane oyapo. Kotimo e pusierakano pesa aporoaki himu hakásaraka hemakapukua risikianie.” <sup>30</sup>Airakano ipu someraka, “Isiapo neaki himu hakásaraka risikiako, nōmo Kotimo wapakumo hemakapukua rakirane nōmo rakikitakae. Isiapo neaki hemakapusimo nōmo makata yakapa wakapuaka rakiakosare?”

<sup>31</sup>Wate fana ima yaoa makata nakosa hurupeperakano isiapo makasa kamumamo nesapo. Kotimo sawia poparaka, ‘Hepene yapunaka epo makata nakosa kasapo.’ Aíyaka popasane isiapo menosapo. Mosesemo<sup>o</sup> makata rakisia ayiáka nōmo rakiasireare?” (*Kisim Bek 16:4; Buk Song 78:24*)

<sup>32</sup>Airakano Yasumo someraka, “Nōmo kakaro somerakaripo. Hepene yapunaka makata nená kasáne Mosesemo kasafapo. Arirakano yumo hepene yapunaka kakaro makata nenane<sup>p</sup> nōmo Atamo karápo. <sup>33</sup>Asiamo

<sup>o</sup> 6:31 Aporoamo Mosesean makárasapo. <sup>p</sup> 6:32 Yasumo ipiyine takumeaka makata nenane somesapo.

Kotimo kakaro makata nena karáne e hepene yapunaka perakano hauaka wo aporo hinamo suaki yaiya rerane karápo.”

<sup>34</sup>Airakano ipu someraka, “Aporo fanao, makata nenane isuaki yaiya karáka rekeanie.” <sup>35</sup>Airakano Yasumo someraka, “Kakaro yaiya rekeakosa makata nenane anopo. Anoaki himu hakásaraka hemakapukua risike, hunia ‘meamoripo,’ aihokosafapo. Nōmo someane kakimaka risike, ‘he nariripo,’ aihokosafapo. <sup>36</sup>Repo ano aseraka, asekea ayiáka repo anoaki himu hakásaraka hemakapurakarifapo. Hemakapunafonorakano nōmo reaki someraka ayapo. <sup>37</sup>Aporo hinamo nōmo Atamo anoaki karakano, i ano rea peakosapo. Perakano iaki nōmo peakopo aihokosafapo.

<sup>38</sup>Nōmo nī hemakapusua rakiako pesafapo. Nōmo Atamo ano pusiesamo hemakapusuane nōmo rakiako pesapo. <sup>39</sup>Nōmo Atamo ano pusiesapo. Epo hemakapusuane oyapo. Aporo hinamo epo anoaki kasáne, hakása soko hasaka koakohoamo, suane nōmo metakariakosafapo. Fa ana sere amo iane nōmo maturikia taehoasimo, aiyaka Kotimo hemakapukua someaka maresapo.

<sup>40</sup>Asiāmo nōmo Atamo hemakapusuane oyapo. Aporo hinamo metakiramo Kotimo hokosa anoane aseraka someraka, ‘E Kotimo hokosapo,’ aiyaka someraka, ipu Kotimo hokosa anoaki himu hakásaraka hemakapukua risikino, yaiya rerane mokoakosapo. Asiāmo fa ana sere amo iane nōmo maturikia taehokosapo.” Aiyaka Yasumo somesapo.

<sup>41</sup>Aiyaka somerakano Yu aporo sisima suamo kaikia mahisisapo. Arirakano Yasumo someraka, “Hepene yapunaka pesa makata nenane anopo,” aisane ipu kaikia mahisisapo. Mahisiraka someraka, <sup>42</sup>“Aporo ane Yasupo. Ipi Yosefemo hokosapo. Ipi wafaya ipi kaiyia isiapo aserapo. Mayiáka hepene yapunaka pesaporakanare?”

<sup>43</sup>Airakano Yasumo someraka, “Repo namina susu hisiraka somehokopo. <sup>44</sup>Aporomo hemakapuraka, ‘Nōmo Yasuaki himu hakásaraka hemakapukua rekeakosapo,’ aiyaka hemakapura ane nōmo Atamo eaki karakáno, aporoamo ano patera aseakosapo. Patera aserakano fa ana sere amo aporoane nōmo maturikia taehokosapo. Arirakano aporomo anoaki himu hakásaraka hemakapurane nōmo Atamo aporoaki kakanafonorakano aporoamo ano patera aseakosafapo.

<sup>45</sup>Arirakano porofete aporo suamo poparaka, ‘Aporo suamo enomakasimo Kotimo tarirapo,’ aiyaka popahoareapo. Asiāmo Atamo someane aporo hinamomo kakimaka, anoaki risikiako pariraka, anoaki himu hakásaraka hemakapukua risikiakosapo. (Aisaia54:13)

<sup>46</sup>Arirakano Kotimo hauaka aeyaka pesa aporo hákasamo Ata ane asesapo. Aporo metamo Ata ane asesafapo. <sup>47</sup>Nōmo kakaro somerakaripo. Kakimara aporo hinamoane Kotiyaki yaiya risikiakosapo. <sup>48</sup>Yaiya rera makata nenane anopo. <sup>49</sup>Wate fana ima yaoa makata

nenane repo makasa kaua kekemamo nenaka, wakasema risina, keseke kukua kesapo.

<sup>50</sup>Hepene yapunaka makata nená pesane repo maka nenakano yaiya risikiakosapo. <sup>51</sup>Yaiya rera makata nená hepene yapunaka pesane anopo. Makata nena ane aporo hinamomo nenakano yaiya risikiakosapo. Aporo hinamo su yaiya risikiasimo makata nená kakakosane ano kaupō.”

<sup>52</sup>Airakano Yu aporo sisima suamo kairaka saperaka tafatafaraka someraka, “Isiapo nasimo epo kau isuaki mayiáka kakakosare?”

<sup>53</sup>Airakano Yasumo iaki someraka, “Nōmo reaki kakaro somerakaripo. Ano Aporomanomo Táke reke, ano kau ano yapi repo nanafonorakano yaiya rerane re tua kepomaresafapo. <sup>54</sup>Ano kau, ano yapi, aporomo nenaka, yaiya rerane re tua kepo amarera ayapo. Fa ana sere amo nōmo re maturikia taerakano yaiya risikiakosapo.

<sup>55</sup>Makata nena kepoane ano kaupō. He nena kepoane ano yapipo.

<sup>56</sup>Ano kau soko, ano yapi soko nenakano, né ano tua rekenapo. Ano soko né tua rekenapo. <sup>57</sup>Atamo ano pusierakano pekea, epo wakapua nōmo kataka marekea rekenapo. Asiamo repo soko anoane nenakano nōmo wakapua repo kataka marekea risikinapo.

<sup>58</sup>Kakaro makata nená hepene yapunaka pesane anopo. Aporo hinamomo nenakano Kotiyaki yaiya risikiakosapo. Arirakano makata nená isiapo makasa kaua kekemamo nesane hakása yiyafapo. Makata ane ipu nekea risina kusuapo. Asiane hepene yapunaka pesa makata nená ane nenakano Kotiyaki yaiya risikiakosapo.” <sup>59</sup>Aíyaka Kapaneame Yu aporomo sarimana apea Yasumo somesapo.

#### **Yaiya rekeasimo Yasumo somesane oyapo.**

<sup>60</sup>Arirakano Yasumo somerakano ipi patera asesa aporo metakiramo kaikia someraka, “Someane umihoareapo. Mayiáka kakimakosare?”

<sup>61</sup>Aíyaka ipu himumo hemakapusuane Yasumo asekea someraka, “Marirakano re hisiraka risikinare? <sup>62</sup>Ano Aporomanomo Tákeane pekea nina, fana rea hauaka á parihinakano repo asekea yakapa hemakapukusare? <sup>63</sup>Arirakano Kotiyaki yaiya risikiakosane Ho Kotesamo karápo. Aporomo kaumo wakapuamo karáfapo. Nōmo someraka one Ho Kotesamo wakapuane soko, yaiya risikiakosamo wakapuane soko someraka ayapo. <sup>64</sup>Aíyaka somerakano repo metakiramo kairaka kaisiano, kakimarakarifapo.” Aíyaka Yasumo somesapo. Arirakano kepomaresa maiya amo Yasumo aporo su asekea hemakapuraka, “Kakimakanafonosa aporoane ayapo. Ano parakehokosa aporoane ayapo.” Aíyaka hemakapusuapo.

<sup>65</sup>Efera hunia Yasumo someraka, “Anoaki himu hakásaraka hemakapukua rekeakosapo, aíyaka hemakapurane Kotimo kakanafonorakano aporoamo anoaki himu hakásaraka hemakapukua

rekeakosafapo. Aíyaka nōmo someraka ayapo.”<sup>66</sup> Aíyaka Yasumo somerakano eyaki aporo hakāsa pura yakaimo e metakarikia pusuapo.<sup>67</sup> Metakarikia purakano Yasumo ipi aporo hakāsa pura keno suaki someraka, “Repo soko ano metakariakosare?”<sup>68</sup> Airakano Saemone Pitamo someraka, “Unihaeo, meta epayaki isu pukusare? Yaiya rera kepoane nōmo some akare.<sup>69</sup> Some karakano isiapo kakimaranapo. Né Kotimo hokosa murikimaka pusiesapo. Makata watikisane kikisiraka kotesa susu rerane nepo. Aíyaka isiapo hemakapurakaripo.”

<sup>70</sup> Airakano Yasumo someraka, “Re aporo kenosu ane nōmo murikimasapo. Kenoane Satanemo aporo irapo.”<sup>71</sup> Aíyaka Isekerio aporo Saemonemo hokosa Yutaseane Yasumo somesapo. Aporo hakāsa pura kenoane Yutasepo. Yasu ipiane parakehokosane somesapo.

### **Yasumo ipi mamaneamo somesane oyapo.**

**7** <sup>1</sup> Yasu Kariri hauaka koraka nina Yutía hauaka aeyaka Yu aporo sisima risiamo someraka, “Yasu rusua kukusapo,” aisapakano Yasu Yutía hauaka á hisiafapo. <sup>2</sup> Wate fana Ape Fete<sup>9</sup> Kikia Risia maiyane Yu aporo hinamomo Hemakapuko Hokono Kesapo. Hokono keako makeanamo <sup>3</sup> Yasumo ipi mamaneamo eaki someraka, “Né patera asesa aporo hinamo Yutía hauaka risiamo nōmo wakapuaka rakirane asekeasimo, hauaka one metakarikia Yutía hauaka a hinie. <sup>4</sup> Aporomo hokopukua rekeakosakipoko ipi makata rakirane faremarekea rakirafapo. Aporo hinamo suamo asekeasimo mafekemaraka rakirapo. Asiamo nōmo wakapuaka rakirane aporo hinamo suamo asekea neaki himu hakásaraka hemakapusimo rakinie.” <sup>5</sup> Aíyaka ipi mamaneamo Yasuaki himu hakásaraka hemakapunafonoraka aíyaka mahokopariraka somesapo.

<sup>6</sup> Aíyaka somerakano Yasumo someraka, “Aporo hinamo suamo asekeasimo makata rakiakosa maiya ane pipu oyafapo. Maiya suamo repo rakiane siahoasireapo. <sup>7</sup> Yumo soko keseke soko repo rakirane aporomo aseraka hisihokosafapo. Anoaki hákasa hisirakanapo. Nōmo kakama someraka, ‘Repo watikiaka rakirakanapo.’ Airakano aporomo anoaki mahisirakanapo.

<sup>8</sup> Re namina hokono keako hisie. Yumo ano hiakosafapo. Pipu repo maiyapo. Nōmo maiyane harufapo.” <sup>9</sup> Aíyaka e Kariri hauaka yia parisapo.

### **Ape Fete Kisiane Hemakapuko Hokono Akera maiya amo Yasu pesané oyapo.**

<sup>10</sup> Yasumo ipi mamanea fana Yarusarame sitia hisiakipoko, Yasu wakasema asekea nina, keseke aporo hinamo suamo aserapaka e tau

---

<sup>9</sup> **7:2** Mosesemo Isiraya aporo hinamo karikia pukua Iyipi hauaka metakarikia ima yaoa koraka risia maiya amo ipu yaoa ape fete kisia risiane Hemakapuko Hokono Kesapo. Hokono keraka sere kari sumo hokono kerapo.

kesekea papaterarape hisiapo. <sup>11</sup> Arirakano Yarusarame sitia Yu aporo sisima metakiramo someraka, “Yasu masiare?” aiyaka hokono kesa apea kope pusuapo.

<sup>12</sup> Arirakano aporo metakira sarimaraka namina susu tau someraka, “Yasu ipi aporo kotesareapo.” Airakano aporo metakiramo someraka, “Wae, epo aporo hinamo ikia kara hasaka pusimo karikia tarirakanapo.” Aiyaka aporo yakaimo tau me rusuapo. <sup>13</sup> Me rukua tau meakamaka somesane Yu aporo sisimamo kaikia hukururapaka ipu sakepamo hufitaeaka somesafapo.

<sup>14</sup> Arirakano hokono keraka risikiyia fahoko makerakano Yasuane Kotimo apea pukua some kasapo. <sup>15</sup> Some karakano Yu aporo sisimamo fofaraka someraka, “Sawi menonane epo mayiaka enomasarakapo. Eane isiapo somemane tisa aporo karámo sukurusafapo.”

<sup>16</sup> Airakano Yasumo someraka, “Kotimo ano pusiesamo anoaki some kasane nōmo reaki some karakanapo. Nōmo nī hemakapusuane some karakanafapo. <sup>17</sup> Nōmo nī hemakapusua hákasane nōmo some karakano soko metao, Kotimo hemakapusuane nōmo some karakano soko metao, mayiaka repo hemakapukusare? Kotimo hemakapusua kekemaraka rakiako hemakapura aporoamo nōmo somesane takekea kepo hemakapukusapo. <sup>18</sup> Arirakano aporomo ipiane makárahokosakipoko ipi hemakapusuane some karápo. Arirakano ano pusiesa aporoane makárahoko hemakapuraka nōmo kakaro koteaka some karápo. Ano niane makáraraka some karáfapo. Kotafe some karáfapo.

<sup>19</sup> Arirakano Mosesemo somemaneane reaki some kasa nine repo kekemaraka hemakapukua rakirafapo. Marirakano repo ano rusua kukuko hemakapurakanare?” <sup>20</sup> Airakano aporo suamo someraka, “Ne masuarareapo. Epamo neaki rusua kukusapakasare?” <sup>21</sup> Airakano Yasumo someraka, “Fenena maiya hakása metamo nōmo hemakapukua wakapuaka rakirakano repo someraka, ‘Epo marirakanare? Fenena maiya yaposane epo koaretaerakanapo,’ airakasupo.

<sup>22</sup> Asiane repo namina makasa kua kekemamo aporo hokosa takaperakano, hokosa takapesa hokono ane menorape hikia karimo aporo hokosa kau hahaeraka patehoanie, aiyaka repo namina makasa kua kekemamo somemane motosapo. Ipu somesane Mosesemo soko ayiakaniesapo. Asiamo fenena maiya yiamo sere karia paurakano aporo hokosa kauane hahaeraka patenapo. <sup>23</sup> Asiamo Mosesemo somemaneane koaretaenapaka fenena maiyamo soko, repo aporo hokosa kauane hahaeraka patenapo. Mosesemo ásia ayiaka fenena maiyamo nōmo aporo makata takamasa mafasane marirakano repo saperakanare?

<sup>24</sup> Wakasema asekea foaka hukuruane siahoasifareapo. Kepoane koteaka hemakapunie. Kepo kakaro hemakapukua ereketae takekea hukuruane siahoasireapo.” Aiyaka Yasumo somesapo.

**“Yasuane unihaeaka rekeasimo kotimo murikimasa aporoane ere?” aisane oyapo.**

<sup>25</sup>Yarusarame aporo metakiramo Yasuane aseraka someraka “Aporo rusua kukusaposane ere? <sup>26</sup>Aporo suamo kaiyisimo hauaka kakamasakipoko á epo some akare. Epo someane aporo metamo hurutapirakanafapo. Epo someane hurutapirafaraka Kotimo unihaeaka rekeasimo murikimasa aporo Keresoane erakapo,” aiyaka ipu hemakapukua somesapo. <sup>27</sup>Arirakano “Kereso fasereperakano ipi faserepesa kepoane isiapo hemakapukusafapo. Asiane Yasu ipi takapesa apeane isiapo asesapo. Asesasamo e Keresofapo.” Aiyaka Yarusarame aporo metakiramo somesapo.

<sup>28</sup>Airakano Kotimo apea Yasumo sakepamo someraka, “Repo ano kakaro aserapo. Ano takapesa apeane soko repo aserapo. Repo asesa nine nōmo kakaro kepoane repo himeteraka hemakapurakanafapo. Arirakano ano ni hemakapusua aeyaka kekemaraka pesafapo. Metamo ano pusierakano ano pesapo. Eane repo himeteraka, <sup>29</sup>arirakano nōmo eane hemakapurapo. Epo ano pusierakano e aeyaka ano pesapo.” <sup>30</sup>Airakano Yasuane ipu waseremakosapoko asiane, waseremakosa maiyane haruhoanafonosekeno e waseremasafapo. <sup>31</sup>Arirakano aporo hinamo yakaimo Yasumo someane kakimaka someraka, “Yasumo wakapu rakirane namo kakaro kara kotesapo. Yasumo makata rakisiane aporo meta fasere aperamo rakikia marokehoasifapo. Asiasamo Yasuane Kotimo unihaeaka rekeasimo murikimasa aporoane, e kereso reapo,” aisapo.

**Sikiriti aporoaki Yasuane waseremako pusiesane oyapo.**

<sup>32</sup>Arirakano aporo yakaimo someane kaikia koaka purakano Ferese aporomo kaikia, ipu soko, pirisiti aporo káramo soko, Kotimo apea sikiriti aporo asekea risiaki someraka, “Repo Yasu waseremako pusie.” Airakano Yasu rea sikiriti aporo pusuapo. <sup>33</sup>Perakano Yasumo someraka, “Maiya wakasema metamo ano reyaki rekeakosapo. Wakasema nina epo ano pusiesamo hauaka yia ano parihiakosapo.

<sup>34</sup>Hisiakipoko repo ano koane fasekeno aseakosapo. Ano hiakosa hauaka á re soko hiakosane siahoasifareapo.” <sup>35</sup>Airakano Yu aporo sisima suamo Yasumo someane himeteraka namina susu someraka, “Isiapo eane aseakosafapo, airakane e ma hiakosarakapo. Yu aporo hoanafonosamo apea hiakosarakapo. Á hinaka Yu aporo metakira risiaki soko, Yu aporo hoanafonosa risiaki soko, somehoko hiakosarakanareapo.

<sup>36</sup>Epo someraka, ‘Ano koane aseakosafapo. Ano hiakosa hauaka á re hiane siahoasifareapo,’ airakane, some kepo ane mairakarirakapo.” Aiyaka Yu aporo sisima suamo somesapo.

**He fuakataena Yasumo kakakosaposane oyapo.**

<sup>37</sup>Hokono akera maiya amo sere kesekeane sere kárapo. Sereamo Yasu takahikia sakepamo someraka, “He narirakano ano rea he nako peae.



Kakimara aporo reo, re ano rea pekea he nesie. <sup>38</sup> Arirakano Kotimo sawia popasane oyapo. He kafa fuafuana ayiáka anoaki himu hakásaraka hemakapura aporo ane himua yaiya rera heane komarukua sakopeperaka rekeakosapo.” Aiyaka popasane Yasumo takumeaka somesapo. <sup>39</sup> Asiamo Yasumo somesamo kepoane oyapo. Aporomo Yasuaki himu hakásaraka hemakapukua risikino Ho Kotesa i himua komarukua muriakosapo. Arirakano Yasumo somesa maiya amo Kotimo faesa hauaka yapura Yasu hiasiraka reke, Ho Kotesa hauaka wo haru pesafapo.

**Aporomo kekepo hemakapusuane oyapo.**

<sup>40</sup> Yasumo someane aporo yakai sarimasamo kaikia someraka “Aporoane kakaro porofete aporoepo.” <sup>41</sup> Airakano aporo metakiramo someraka, “Keresoane epo.” Airakano aporo metakiramo someraka, “Kariri hauaka aeyaka Kereso perafapo. <sup>42</sup> Arirakano Kotimo sawia popasane oyapo. Tefetemo aporo iramo Kereso takapeakosapo. “Tefetemo ipi ape sumu Petereheme taonea takapeakosapo.” Aiyaka popahoareapo.” <sup>43</sup> Aiyaka somerakano aporo sarimasamo kekepo hemakapusuapo. <sup>44</sup> Ipu metakiramo, “E tipura makeanie,” aisapo. Aisane kakaro tipura makesafapo.

**Pirisiti aporomo Yasuaki himu hakásaraka hemakapunafonosane oyapo.**

<sup>45</sup> Arirakano Kotimo ape asekea risira sikiriti aporomo Yasuane metakarikia pariperakano, pirisiti aporo káramo soko, Ferese aporomo soko, ipu someraka, “Yasu karikia peanafonosane mainakano asiare?” <sup>46</sup> Airakano sikiriti aporomo someraka, “Epo somera ayiáka aporo metamo fana somesafapo. Epo somera ayiáka fana somerakano isiapo kaisiafapo.” <sup>47</sup> Airakano Ferese aporomo someraka, “Yasumo re mahoperaka epo kotafe somerakano, repo soko kakimaranare? <sup>48</sup> Isiapo isina suamo Yu aporo sisimamo soko, Ferese aporomo soko suamo epo somerakasane kakipayarakanapo. Isiapo hakása metamo soko kakimaranafapo. <sup>49</sup> Aporo hinamo yakai sarimasamo Mosesemo somemaneane koteaka hemakapurakarifapo. Hemakapunafonorakano iane fanasina hauaka pukusapo.”

<sup>50</sup> Airakano Ferese aporo namina yia Nikitímase ipi fana Yasuaki somesa epo Ferese aporo suaki someraka, <sup>51</sup> “Isiapo somemane motosakipoko, somemane ane aporomo koaretaeraka watikiaka rakisiaporakano ipiaki fana kairapo. Kaikia kakaro yasikino asekea, fanasinane marerapo. Aporoaki kaiyasiraka, fanasinane marerapapo.”

<sup>52</sup> Airakano ipu someraka, “Né soko Kariri aporore? Kotimo sawi koteaka menohoanie. Porofete aporoane Kariri hauaka aeyaka perafapo. E porofete apororakanafareapo.” Aiyaka ipu hemakapukua somesapo.

<sup>53</sup> Aíyaka someaka marekea aporo su namina apea pusuapo.

**Hinamo aporo metayaki mokome purakano asekea  
Yasu rea Ferese aporomo karikia pesane oyapo.**

**8** <sup>1</sup> [Aporo namina apea purakano Yasu ipi haku ūri Orofea hisiapo. <sup>2</sup> Mituru fiarakano Kotimo apea Yasu paripukua, aporo yakai e rea sarimarakano e kake some kasapo. <sup>3</sup> Some karaka reakupoko, hinamo aporo aseka aporo metayaki mokome purakano aporo metakiramo asekea, hinamoane karikia pekea, Kotimo somemane tisa aporomo soko, Ferese aporomo soko e karikia Yasu rea pesapo. Pekea aporo su sarimarakana risiakipoko aporo suamo asekasimo hinamoaki someraka, “Aporo su hikumisia né á reae,” aíyaka hukurusuapo.

<sup>4</sup> Hukurukua ipu Yasuaki someraka, “Tisao, hinamoane aporo metayaki mokome purakano aporo metakiramo asesapo. <sup>5</sup> Fana Mosesemo somemane motosane oyapo. Hinamo aporo metayaki mokome purakanone, hinamoane ekemo kareasimo makasuhoanie. Aíyaka Mosesemo somemane motosapo. Somemane motosasamo nómo mayiáka hemakapurakanare?” Aíyaka ipu Yasuaki somesapo. <sup>6</sup> Aíyaka somehoane Yasumo hasaka somerakarihoamo, ipu Yasu kau aseako aíyaka mahoperaka eane hukurukusakipoko somesapo. Aíyaka somerakano Yasu arupekea titiwaruraka kake, hokonomo hauaka poparaka kayapo.

<sup>7</sup> Kakeno ipu namina efera hunia kaikia, efera hunia kaikia airakano Yasu arupekea kaina takahikia someraka, “Repo aporo hakása metamo makata watikiaka rakianafononamo, ekeane maka nómo ní fana kareanie.” <sup>8</sup> Aíyaka Yasu efera hunia arupekea titiwaruraka kake hauaka poparaka kayapo.

<sup>9</sup> Poparaka kayakipoko aporo sisima fana pusuakipoko, aporo hakása hakásaraka pukua fasekeno, hinamoane hákasa yia rekeno Yasumo asesapo. <sup>10</sup> Yasu arupekea kaina takahikia hinamoaki someraka, “Hinamo neo, aporo su masiare? Aporo hakása metamo né hukuruko yia rekenare?”

<sup>11</sup> Airakano hinamoamo someraka, “Wae, su pukua fahoareapo.” Airakano Yasumo someraka, “Nómo soko ne hukurukusafapo. Né pusie. Puraka keseke efera hunia watikiaka rakiraka kakakopo,” aíyaka Yasumo somesapo.]

**“Aporo hinamo suamo faesamo kepoane anopo,”  
aíyaka Yasumo somesane oyapo.**

<sup>12</sup> Aporo hinamo sarimarakano Yasumo efera hunia someraka, “Hauaka wo aporo hinamo risiamo faesamo kepoane anopo. Aporo hinamomo ano patera asekea risiane i katosa pukusafapo. Yaiya rera faesa pukusapo.”

<sup>13</sup> Airakano Ferese aporomo someraka, “Nómo ní airaka yiamo nómo

ní yine somerakaripo. Nómo ní airaka yiamo isuaki somehoane siahoasifareapo.”

<sup>14</sup>Airakano Yasumo someraka, “Nómo nī somerakane kakaro somerakaripo. Ano pesa hauakane soko ano hiakosa hauakane soko nómo nī hákasa hemakapurakanapo. Asiane repo hemakapuraka, ‘E pesane mayiáka pesarakapo. E hiakosane mayiáka hiakosarakapo.’ Aiyaka repo himeteraka hemaka apure.

<sup>15</sup>Aporomo ipi hemakapusua hukuarura ayiáka repo hukururakanapo. Asiane Yumo nómo reane hukururakanafapo. <sup>16</sup>Arirakano nómo hukururakanone koteaka hukurukua maroponapo. Hukurukua maroponane nómo nī hemakapusua aeyaka hukurukua maroponafapo. Atamo ano pusiesa amo hemakapusuane nómo kekemaraka hukurukua maroponapo. <sup>17</sup>Arirakano repo somemane sawia poparaka, ‘Wikinisi aporo tetámo makata asesá hakása yineraka somerakano, kakarorakae airapo.’ Aiyaka popahoareapo. <sup>18</sup>Arirakano nómo nī somerakane soko, nómo Atamo ano pusiesamo epo anoane somerakane soko, etapo wikinisi tetámo hakása yineraka somerakayiaipo.”

<sup>19</sup>Airakano ipu someraka, “Ní Ata mayare?” Airakano Yasumo someraka, “Ano soko nómo Ata soko repo himeteane. Repo ano hemakapusua satiki, nómo Atane soko repo hemakapufunureapo.” <sup>20</sup>Aiyaka Yasumo Kotimo apea some kasápo. Arirakano ape rumua mone kera maua taesa ane makeraka Yasu reke some kasapo. Arirakano ipu Yasuaki saperakano yia e kukusa maiya fasere peanafonosasamo e hukurukua waseremasafapo.

**“Ano hiakosa hauaka á re hiane siahoasifareapo,” aiyaka kakimakanafonosa aporoaki Yasumo some kasane oyapo.**

<sup>21</sup>Yasumo efera hunia someraka, “Nómo reane metakarikia hiakosapo. Ano hisiakipoko repo ano kokoa aseakosafapo. Re watikiaka yaiya rakiraka risina kukua keakosapo. Ano hiakosa hauaka á re hiane siahoasifareapo.” <sup>22</sup>Airakano Yu aporo sisimamo someraka, “Epo someraka, ‘Ano hiakosa hauaka á re hiane siahoasifareapo,’ airakae. Airakane kepoane yakapararakapo. Ipi yia makukusarakapo.”

<sup>23</sup>Airakano Yasumo someraka, “Re hauaka wo risikinapo. Ano yapunaka pesapo. Re kakaro hauaka aporopo. Hauaka one kakaro nómo hauakafapo.

<sup>24</sup>Nómo fana somesane efera hunia somerakanapo. Re watikiaka yaiya rakiraka risina kukua keakosapo. Ano ni yaiya rerapo.<sup>f</sup> Asiamo some one

<sup>f</sup> 8:24 Kotimo Moseseaki someraka, “Ano ni yaiya rerapo,” aisapo. (Kisim Bek 3:14). Asiamo Yasumo hakása yineraka somerakano aporo suamo hemakapuraka Yasumo Kotiane mawakasemasapo. Yasumo airakano ipu sapesapo.

repo kakimakanafonorakanone re yaiya watikiaka rakiraka risina kukua keakosapo.”

<sup>25</sup> Airakano ipu someraka, “Né epare?” Airakano Yasumo someraka, “Nōmo fana reaki some kasa yine, anopo. <sup>26</sup> Repo makata ainane nōmo reaki some kakakosane kára kakenapo. Reaki hukurukusane kára rekenapo. Nōmo Atamo ano pusiesamo ipi kakaro somerapo. Epo someane nōmo kakimaka aporo hinamo suaki somerakanapo.” <sup>27</sup> Aiyaka ipi Ata Kotiane Yasumo somerakano ipu kairaka himetesapo.

<sup>28</sup> Himeterakano Yasumo someraka, “Aporomanomo Tákeane anopo. Ano ira matopesa paremarekea máfaraka mapoana maiya amo ano ni yaiya rerapo, aiyaka repo hemakapukusapo. Maiya amo repo someraka, ‘Epo ipi hemakapusuane rakiareapo. Ipi Atamo somerakano someane somehoareapo.’ Aiyaka repo somehokosapo. <sup>29</sup> Arirakano epo ano pusiesamo ano metakarirafapo. E anoyaki rekenapo. E sesehoasimo nōmo rakirakano epo ano metakarirafapo.” <sup>30</sup> Airakano aporo hinamo yakaimo Yasumo someane kakimaka eaki himu hakásaraka hemakapusuapo.

**Yasumo someraka, “Re tonotaehokosapo,” aisane oyapo.**

<sup>31</sup> Arirakano Yasumo someane Yu aporo hinamomo kakimarakano iaki Yasumo someraka, “Nōmo someane kakimaka risikino, re kakaro ano patera asesa aporo hinamoane risikinapo. <sup>32</sup> Kakaro someane repo kakimarakano kakaro someamo re tonotaehokosapo.” <sup>33</sup> Airakano ipu someraka, “Isu tonotaehokosapo, airakane kepoane yakaparakapo. Eparahamemo aporo ira wainepe pesane isupo. Aporo metakiramo isu roporakano isu tipura arakira ayiáka isiapo aporo metakirapoko raiparaka rakisiafapo. Isu raiparaka rakisimo aporo metamo ropohoanafonosasamo epo isu tonotaehokosapo, aisane mayiáka tonotaehokosare?”

<sup>34</sup> Airakano Yasumo someraka, “Nōmo kakaro somerakaripo. Aporomo watikiaka rakira amo wafayane makata watikisa ayapo. Makata watikisa amo someraka, ayiakanie, airakano aporomo kakimaka raiparaka rakirapo. <sup>35</sup> Arirakano atamo ipi hokosane metakarirafapo. Aporo metaki hokosane roponafapo. Asiane aporo raipa roposa wafayamo ipi hemakapuraka aporo raipane metakarikia aporo metaki roponapo. <sup>36</sup> Arirakano makata watikisamo reane tipura kesaka risiane, Kotimo hokosamo re tonotaerakano, re kakaro tonotaesa risikiakosapo. <sup>37</sup> Re Eparahamemo aporo ira wainepe pesane nōmo hemakapurakaripo. Eparahamemo aporo ira wainepe pesa yiamo ano rusua kukuko hemaka apure. Nōmo someane repo kakimakanafonosasamo ano rusua kukuko hemaka apure. <sup>38</sup> Asiamo nōmo Atamo anoaki makata tarisiane nōmo nī reaki somerakanapo. Someane repo kikipayarakano, repo namina atamo somesane kakimarakanapo.”

<sup>39</sup>Airakano ipu someraka, “Isiapo atamo wainepe pesa Eparahamepo.” Airakano Yasumo someraka, “Re Eparahamemo hokosa wainesa satiki Eparahamemo rakisia ayiáka repo rakiafunureapo. <sup>40</sup>Rakiafunusa nine repo ano rusua kukuko hemaka apure. Kotimo kakaro someane nōmo kaikia reaki some kasapo. Some karakano repo ano rukusakipoko hemaka apure. Ayiáka Eparahamemo hemakapusuafapo. <sup>41</sup>Asiamo repo namina atamo hemakapusuane repo arakire.” Airakano ipu someraka, “Ikia oto hokosane isufapo. Isiapo Ata hákasa Koti ipipo.”

<sup>42</sup>Airakano Yasumo someraka, “Repo Koti Ata hemakapusua satiki repo himu tumurumo ano hemakapufunureapo. Koti rea hauaka aeyaka ano pesapo. Ano nī hemakapusua aeyaka ano pesafapo. Kotimo ano pusierakano pesapo. <sup>43</sup>Nōmo someane kaikia hemakapunafononane marirakanonare? Nōmo someane repo kakimako hisiraka risiasamo, nōmo someane repo kaikia hemakapurakarifapo. <sup>44</sup>Repo atane Satanepo. Repo atamo hemakapusuane repo seseaka kekemaraka rakirakanapo. Aporo rusua kukusimo kepomaresane epo kepomaresapo. Arirakano kakaro somerane epo rukupateraka metakarisisasamo epo kotafe somerane hákasa hemakapurapo. Kakaro someane hákasa soko Satane ipia kakenafapo. Kotafe someane susu e himua komarukua rekenapo. E himu aeyaka kotafe someane susu some karaka rerapo. Kotafe someamo kepoane Satanepo. <sup>45</sup>Nōmo nī someane kakaro susu somerapo. Kakaro susu somerakano repo kakimarakarifapo. <sup>46</sup>Nōmo watikiaka hemakapukua rakirano repo asesare? Wae. Repo asesafapo. Nōmo kakaro somerakano yia marirakano repo kakipayaraka risikinare? <sup>47</sup>Kotimo someane ipi hokosamo kairapo. Re Kotimo hokosahoanafonosasamo Kotimo someane repo kaiyako hisiane,” aisapo.

**“Eparahame hokono mareasiraka ano yaiya reapo,” aiyaka Yasumo somesane oyapo.**

<sup>48</sup>Airakano Yu aporo sisimamo someraka, “Né Sameria aporopo.<sup>s</sup> Yatafumo né ho masapo. Isiapo kakaro somerakaripo.” <sup>49</sup>Airakano Yasumo someraka, “Yatafumo ano ho masafapo. Aiyaka repo somerakane repo kakaro somerakarifapo. Nōmo Atane nōmo makama fanaraka makárarakanapo. Arirakano repo ano makama kesekeraka mawakasemarakanapo. <sup>50</sup>Arirakano nōmo ni yia yano motosa makáraraka somehoko hemakapurakarifapo. Kotimo ano yano motosane makárahokosapo. Ano makárahokosane Kotimo makárahokosapo. Epo aporo hinamo suane takekea parakuhokosapo. <sup>51</sup>Arirakano nōmo reaki kakaro somerakanapo. Nōmo someane aporo hinamomo kakimarakano ane, i kakaro kukusafapo. Iane yaiya risikiakosapo.”

---

<sup>s</sup> 8:48 Yasuane Sameria aporo reapo, aiyaka hokomaresamo kepoane oyapo. Sameria aporoane Yu aporoyaki yunuraka risiapo.

<sup>52</sup>Airakano Yu aporo sisimamo someraka, “Yatafumo né hoane kakaro mayereapo. Asiamo né masuaraka himu mahimeteraka somerakae. Eparahame kusuapo. Porofete aporo soko kusuapo. Asiāne nōmo someraka, ‘Nōmo someane kakimara aporo hinamoane kukusafapo. Yaiya risikiakosapo.’ <sup>53</sup>Aisa nine Eparahame kusuane nōmo hurutapirakanare? Né aporo unihae kárare? Porofete aporo soko kusuapo. Né epapaka hemakapurakanare?”

<sup>54</sup>Airakano Yasumo someraka, “Ano nī yia makáraraka somesa satiki nenakamaka rupiaka somehoafunureapo. Asiane nōmo Atamo ano makáraraka marerakanapo. Nōmo Ataki repo Kotipo airapo. Nōmo Atane repo Koti hakása yiyapo. Koti hakása yiamo ano makárarakanapo. <sup>55</sup>Eane repo kakaro koteaka hemakapusuafapo. Eane nōmo kakaro hemakapurakanapo. Asiamo nōmo e asekeanafonoraka nōmo somesa satiki nōmo kotafe somehoafunupo. Repo kotafe somera ayiáka nōmo somerapapo. Nōmo eane hemakapuraka epo someane nōmo kakaro kaikia kekemarpapo. <sup>56</sup>Arirakano ano hauaka wo peakosane repo makasa kaua kekema Eparahamemo hemakapusuapo. Ano peakosane hemakapukua seseraka reapo.”

<sup>57</sup>Airakano Yu aporo sisimamo Yasuaki someraka, “Eparahameane nōmo asesare? Né keremisi fifti (50) ayiáka né reafapo. Né sisimafapo. Nōmo mayiáka Eparahame asesare?”

<sup>58</sup>Airakano Yasumo someraka, “Nōmo kakaro somerakaripo. Eparahame hokono mareasiraka ano yaiya reapo.” <sup>59</sup>Airakano Yu aporo sisimamo Yasuane kareakosakipoko eke morakano asekea Yasu fararererape pukua Kotimo apeane metakarikia pusuapo.

### Aporo hi mesa Yasumo mafasane oyapo.

**9** <sup>1</sup>Yasu ikia kara puraka aseane aporo meta hi mesa rekeno asesapo. Aporoane ipi kaīyiamo takapesa maiya amo hi mesapo. <sup>2</sup>Aporo hi mesane asekea aporo hakāsa puramo Yasuaki someraka, “Tisao, aporo hi mesane epamo watikiaka rakisiakipoko e fanasiraka hi mesare? Epo ipi watikiaka rakisiakipoko e fanasirare? Ipi kaīyiape wafaya tetapō watikiaka rakisiakipoko e fanasirare? Epamo watikiaka rakisiakipoko e fanasirare?”

<sup>3</sup>Airakano Yasumo someraka, “Epo ipi watikiaka rakisiakipoko e fanasiraka hi mesafapo. Ipi wafayape kaīyia tetapō watikiaka rakisiakipoko e fanasiraka hi mesafapo. Kotimo wakapuamo e hi mafarakano aporo suamo asekeasimo e takapesa maiya amo hi mesapo. <sup>4</sup>Arirakano erehoasirakayia maiya faena yiamo nōmo makata rakirakanapo. Kotimo ano pusiesasamo epo makata rakirane isiapo rakiane siahoasireapo. Ereamo nōmo soko repo soko makata rakiakosafapo. Erehoko makerakanapo. <sup>5</sup>Ano hauaka wo areamo aporo hinamo hauaka wo risiamo faenane anopo.”

<sup>6</sup>Áiyaka Yasumo someaka ororoa torofaeraka, hokonomo sosokeraka maka, aporo hi mesane hia paisiapo.

<sup>7</sup>Ororomo paikia marekea Yasumo eaki someraka, “Ne pukua he Siroame kafa á ne hikumisiane kusuhoke pusie.” Airakano he Siroameane namo meaka he rakemása áiyaka yano motosapo. He kafa á aporoane pukua, hikumisi kusuhoane himo koteaka asesapo. <sup>8</sup>Aserakano aporo ipi tákemo soko, fana mone kakasimo kakeno asesaporoamo soko someraka, “Aporo fana mone kakasimo kakesuane ere?”

<sup>9</sup>Airakano aporo metakiramo someraka, “Ao, aporo ayapo.” Airakano aporo metakiramo someraka, “Érakanafareapo. Aporo meta e hikumisi yaisia rekenapo. Aporo ayarakanareapo.” Airakano aporo hi mesa fasamo someraka, “Ao, mone kakasimo kakesuane anopo.” <sup>10</sup>Airakano ipu someraka, “Mayiáka né hi fasare?” <sup>11</sup>Airakano epo someraka, “Aporo meta ipi yano motosa Yasumo ororoa torofaeraka, ano hia paikia someraka, ‘Né pukua he Siroame kafa kusuhoke pusie.’ Airakano ano pukua he kafa kusuhoane koteaka asesapo.”

<sup>12</sup>Airakano ipu someraka, “Yasu ma rekenare?” Airakano aporoamo someraka, “Ano himeteripo. E ma pusuarakapo,” aisapo.

<sup>13-14</sup>Arirakano fenena maiya amo aporo hi mesane Yasumo mafasapo. Mafarakano ipu e karikia Ferese aporo risia á karikia pusuapo. <sup>15</sup>Ferese aporo risia á karikia perakano, Ferese aporomo aporo hi mesa mafasaki someraka, “Né hi mesane mayiáka fasare?” Airakano epo someraka, “Aporo metamo ororo maka ano hia paisiane hemo kusuhoane fasapo. Faraka koteaka aserakanapo.” <sup>16</sup>Airakano Ferese aporo metakiramo someraka, “Fenena maiya amo epo makata rakiasiasamo e Kotimo pusierakano pesa aporo ayafareapo.” Airakano aporo metakiramo someraka, “Epo wakapuaka rakirane nena aporo watikiaka rea aporomo ayiáka wakapuaka rakirafapo.” Áiyaka namina himumo kekepo hemakapukua tafatafasapo.

<sup>17</sup>Tafatafaraka aporo hi mesa mafasaki Ferese aporomo efera hunia someraka, “Né hi mafasa aporoane nómo epapaka hemakapurakanare?” Airakano aporo hi mesa mafasamo someraka, “E porofete apororeapo.” <sup>18</sup>Airakano Yu aporo sisimamo someraka, “Aporoane ipi kaiyiamo takapesa maiya amo e hi mesarakapo. Kakaro hi mesa mafasarakapo.” Áiyaka hemakapuraka ipi kaiyiape wafaya tetā peaesapo.

<sup>19</sup>Peaerakano pesapo. Perakano Yu aporo sisima amo someraka, “Aporoane tetápo titi hokosare? Hi mesa takapesare? Yumo koteaka aserane mayiáka koteaka aserakanare?” <sup>20</sup>Airakano ipi kaiyiape wafaya tetapō someraka, “Eane etapo hokosapo. Takapesa maiya amo e hi mesapo. <sup>21</sup>Yumo koteaka aserane mayiáka aserakanarakapo. E hi mafasane aporo eparakapo. Eaki kaiyinie. E ipi aporo rauasasamo ipi yiamo hemakapurakanarakayiapo. Epo somehoane siahoasireapo.” Áiyaka tetapō somesapo.

<sup>22</sup> Tetapō Yu aporo sisima ane namoraka risiasamo aiyaka somesapo. Tetapō somehoasiraka fana Yu aporo sisimamo someraka, “Aporo metamo someraka, ‘Yasu ipi Keresopo,’ airakanone aporoaki Yu aporomo sarimana apea peakopo, aihokosapo.” Aiyaka Yu aporo sisimamo somesapo.

<sup>23</sup> Aiyaka somesasamo ipi kaiyiape wafaya tetapō hemakapuraka, “Etoaki peakopo, aihoasireapo.” Aiyaka hemakapuraka tetapō someraka, “Aporo hi mesa mafasane aporo rauasasamo e ipiaki kaiyinie,” aisapo.

<sup>24</sup> Arirakano efera hunia Yu aporo sisimamo aporo hi mesa mafasaki peaesapo. Peakerano pesapo. Perakano ipu someraka, “Kotimo kaiyisimo nómo kakaro aumaraka somehoanie. Koti makama fanahoanie. Yasumo himu watikiaka reane isiapo hemakapurakaripo.” <sup>25</sup> Airakano aporoamo someraka, “E himuane nómo aserapapo. E himuane kotesarakapo. E himuane watikisarakapo. Ane nómo hemakapurakanafapo. Asiāne nómo makata hakása hemakapusuane oyapo. Ano fana hi mesa reane, yumo nómo koteaka aserakanapo. Ane nómo hemakapurakanapo.”

<sup>26</sup> Airakano ipu someraka, “Epo mayiáka né hi mafasare?” <sup>27</sup> Airakano epo someraka, “Nómo reaki pipu somerakasafare? Somerakasane repo kakimarakarifapo. Marirakano efera hunia anoaki kairakanare? Repo eane patera asekea risikiakosakipoko somerakanare?”

<sup>28</sup> Airakano ipu saperaka eaki mainamarekea someraka “Aporoane patera asesa aporoane nepo. Isu Mosese patera aserakanapo. <sup>29</sup> Kotimo Moseseaki somesapo, aiyaka isiapo hemakapurakaripo. Aporo ane maeyaka pesarakapo, aiyaka isiapo hemakapurakaripo.”

<sup>30</sup> Airakano aporo hi mesa mafasamo someraka, “Repo mairakare? Re yaiya himeterire? Repo someraka, ‘Aporoane maeyaka pesarakapo,’ aiyaka repo somerakasa, aporoamo ano hi mafasapo. <sup>31</sup> Aporo himu watikiaka hemakapukua reamo Kotiaki wárakano Kotimo kairafapo. Kotiaki kekereraka Kotimo hemakapusua rakirane rakiraka reamo wárakano, Kotimo kairapo. Ane isiapo hemakapurakanapo. <sup>32</sup> Wate fana hauaka kara one kepomaresa maiya amo soko, aporo wainepe pesa makasa kamuma risia maiya amo soko, makasa kaua risia maiya amo soko, ata rea maiya amo soko, aporo ipi kaiyiamo taka apera maiyamo hi mesa takapesane aporo metamo mafasapakano isiapo kairafapo. Fana ayiáka mafasafapo. <sup>33</sup> Kotimo makata rakirane rakiako pusiehoanafonosa satiki, aporoamo ayiáka mafahoafunufapo.”<sup>t</sup>

<sup>34</sup> Airakano ipu someraka, “Ní atane soko ní amane soko himu watikiaka reke, né soko himu watikiaka takapesapo. Né kotesapaka isuaki some karakánare? Isiapo nómo someane kaiyakosafapo. Yu

<sup>t</sup> 9:33 Asiamo aporo hi mesa mafasamo someamo kepoane, Kotimo pusiesa aporoane pesa ayareapo.



aporomo sarimana ape one metakarikia pusie.” Airakano e pusuapo.

<sup>35</sup> Pusuakipoko aporo hi mesa mafasaki hukurukua pusiesane Yasumo kaikia, aporoane kokoa aseraka someraka, “Aporomanomo Tákeaki nómo himu hakásaraka hemakapurakanare?”

<sup>36</sup> Airakano aporoamo someraka, “Ape neo, eaki himu hakásaraka hemakapuko anoaki tarikia somesie. Eane epare?” <sup>37</sup> Airakano Yasumo someraka, “Nómo yumo aserakasane anopo. Nōmo néaki somerakanapo.”

<sup>38</sup> Airakano aporoamo someraka, “Unihaeo, nōmo neaki himu hakásaraka hemakapurakanapo.” Aíyaka epo kekereaka somerakano <sup>39</sup> Yasumo someraka, “Aporo hinamo Kotiaki himu hakásaraka risiane soko, aporo hinamo Kotiaki himu hakásaraka risikianafonosane soko, parakuhoko ano hauaka wo pesapo. Aporo metamo someraka, ‘Nōmo makata su aserafapo,’ aisa aporoane hi faeraka rekeakosapo. Arirakano aporo metakiramo someraka, ‘Ano siapo. Nōmo himo makata su aserafapo,’ aisa aporoane hi katoraka rekeakosapo.” <sup>40</sup> Airakano Ferese aporo makeraka risiamo kaikia someraka, “Isu hi mesa risikino nómo asekea somerakanare?” <sup>41</sup> Airakano Yasumo someraka, “Repo someraka, ‘Isu hi mesa risikinapo,’ aiyaka hufitaesa satiki, re himu waticisane nōmo mafahoafunureapo. Asiāne repo hufitaerakarifapo. Repo someraka, ‘Isiapo makata su hemakapukua, arirakano makata su asekea siaraka risikinapo.’ Aiyaka somerakane re himu waticisane yaiya risikinapo.” Aiyaka Yasumo somesapo.

**Saro sipi keasimo rurusane takumeaka somesane oyapo.**

**10** <sup>1</sup> Yasumo aporo hinamoaki efera hunia someraka, “Nōmo reaki kakaro somerakaripo. Saro sipi rurusana aporo ikia koro aeyaka peanafonoraka, ruru tipi aeyaka tapikia perakano aporoamo saro sipiane mokoatikiraka hakimako perapo. <sup>2</sup> Aporo ipi ikia koro aeyaka perakano saro sipi asekea rera aporo ayapo. <sup>3</sup> Saro sipi asekea rera aporoane ruru kakarua peasimo, ikia koro asekea rea aporomo ikia koroane ropakamarapo. Ropakamarakano saro sipi asekea rera aporomo saro sipi yano taesane yano hokoa wáhoane, saro sipi su perakano namina asekea rera aporomo karikia yaoa purapo.

<sup>4</sup> Asekea rera aporo fanaraka purakano, epo meane ipu kaikia kekemarape purapo. <sup>5</sup> Saro sipi asekea rekeanafononane, ipu kekemarape purafapo. Me kaiyiāne me meta kairakarakano teketarirapo.” <sup>6</sup> Aiyaka Yasumo takumeaka somerakano, ipu some kepoane himetesapo.

**Yasumo someraka, “Saro sipi asekea rera aporoane anopo,” aisane oyapo.**

<sup>7</sup> Aihoane i himeterakano efera hunia Yasumo someraka, “Nōmo reaki kakaro somerakaripo. Saro sipi keasimo rurusana ikia koro asiane anopo.

<sup>8</sup>Fana aporo pesane hakimora aporopo. Ipu kotafe wárakano, ipu meane saro sipimo kaiyiáne, kumuku kairakarakano, kekemape pusuafapo.

<sup>9</sup>Ikia koro asiane anopo. Saro sipi ikia koroa yorokoa pesa susuane nōmo asekea rekenapo. I ikia koroa yorokoa pesa susuane makata metamo mokoatikinapaka nōmo mafairaka asekea rekenapo. Iki koro aeyaka pekea yaoa asane kotesa nako purapo. Aina ayiáka anoaki paosa aporo hinamoane nōmo asekea reke mafasiakosapo.

<sup>10</sup>Asiamo hakimara aporomo makata hakimokoa rukua mokoatikiraka ayiakako perapo. Arirakano aporo hinamo Kotiyaki koteaka risikiasimo ano pesapo. Yumo i su hauaka wo arisiamo Kotimo iane makoterakano hemakapukua, makata su siaraka risike, seseraka ayiáka koteaka risikiasimo ano pesapo. <sup>11</sup>Saro sipi asekea rera aporo kotesane anopo. ‘Saro sipi koteaka risikiasimo asekea rera aporoane kuane siahoasireapo,’ aiyaka saro sipi asekea rera aporo kotesamo hemakapurapo.

<sup>12</sup>Arirakano aporo metamo saro sipi asekea reke mone makosakipoko raiparaka rakirapo. Aporoamo saro sipiane kakaro epo ipi menahoanafonosasamo epo aseane, saro wofe<sup>u</sup> perakano asekea saro sipiane metakarikia takaripurapo. Takaripurakano saro wofemo saro sipi metakirane rukunenakano, metakirane yaoa teketarikia rosaka tarirapo. <sup>13</sup>Asiamo aporomo mone hákasa hemakapukua raiparaka rakiraka saro sipiane ipimenahoanafonosasamo koteaka hemakapukua asekea rerafapo.

<sup>14-15</sup>Arirakano saro sipi asekea rera aporo kotesane anopo. Nōmo Atamo anoaki hemakapukua, nōmo Ataki hemakapukua area ayiáka, nōmo saro sipiane hemakapukua, saro sipimo anoaki hemakapukua ayiáka risirapo. Nōmo saro sipipoko ano kuane siahoasireapo. <sup>16</sup>Arirakano saro sipi metakira ruru wo keanafonosane soko nōmenapo. Iane soko nōmo karikia peakosapo. Saro sipi nena yaoa risiamo soko, nōmo someane kakimarakano, karikia peakosapo. Yaoa risiane soko, ruru kakarua risiane soko, ruru hakāsa kekea su sarimaraka risikiakosapo. Asiamo asekea rera aporoane ano hákasapo.

<sup>17</sup>Ano turikia pukusakipoko kukusapo. Ayiakakosasamo Atamo anoane himu tumurumo hemakapurakanapo. <sup>18</sup>Aporomo hemakapusua aeyaka ano rusua kukusafapo. Nōmo aohoanafonorakanone ane ano rusua kukusifareapo. Nōmo nī hemakapusuane aosasamo ano rusua kukusireapo. Aporomo ano rusua kukusimo nōmo nī hemakapusua aeyaka ano kauane kakakosapo. Ano kukua efera hunia turikia apuramo wakapuaka turikia pukusapo. Aiyaka nōmo Atamo hemakapukua maresapo.” Aiyaka Yasumo somesapo.

<sup>19</sup>Aiyaka Yasumo somerakano Yu aporo sisimamo kaikia himumo kekepo hemakapukua tafatafasapo. <sup>20</sup>Tafatafaraka aporo metakiramo

---

<sup>u</sup> 10:12 Saro wofe yákasa kára asiapo. Saro wofemo aporomano soko, makata kakayia soko hitafe rukunenapo.

someraka, “Yatafumo e ho masasamo epo airakae. E masuarakanareapo. Marirakano epo someane repo kairakanare?” <sup>21</sup> Airakano aporo metakiramo someraka, “Yatafumo aporomano ho masamo alyaka somerapapo. Aporo hi mesane yatafumo mafanafapo,” aisapo.

**Yasumo some kayane Yu aporo sisimamo kakipayasane oyapo.**

<sup>22</sup> Wate fana Kotimo Ape Kikimasane Kotiaki Suseraka Hemakapuko Hokono Keakosa maiya ane makesapo. Hokono keakosakipoko yaki ikia aperamo Yu aporo Hinamo Yarusarame sitia sarimasapo. <sup>23</sup> Kotimo apea Yasu pukua ape taru yano motosa Soromone ape tarua koraka rekipoko <sup>24</sup> Yu aporo sisima sarimaraka ipu Yasuaki someraka, “Isiapo neane aseraka himu tetaraka risikinapo. Masinaka isuaki kakama somehokosare? Ne Keresopo airakane nomo isuaki kakama hufitaeraka somehoanie.”

<sup>25</sup> Airakano Yasumo someraka, “Fana nomo reaki somerakasuamo repo kakimarakasufapo. Atamo yanoane mafaraka ipi wakapumo hemakapukua rakira amo anoane reaki tarirakanapo. Tarirakano yia repo koteaka hemakapurakarifapo. <sup>26</sup> Asiane reane nomo saro sipirakanafareapo. Repo nomo someane kakimarakarifapo.

<sup>27-28</sup> Arirakano nomo someane nomo saro sipimo kakimaka kekemarape perakano, nomo iane hemakapuraka kakaro yaiya risirane karapo. Karakano i hasaka koakosafapo. Iane aporo metamo wasekemaka hakimakosafapo. Saro sipiane nomo Atamo anoaki kasapo. <sup>29</sup> Ata ipi kakaro karapo. Aporo metamo e hurutapirafapo. Saro sipiane ipi asekea rekenapo. Ipi asekea rerasamo aporo metamo hakimakosafapo. <sup>30</sup> Ata eto iti hakasa yiyapo.” <sup>31</sup> Airakano kaikia Yu aporo sisimamo ekemo kareako mosapo. <sup>32</sup> Morakano Yasumo someraka, “Repo asekeasimo Atamo anoaki rakiniesane makata kara nomo rakisiapo. Nomo makata yakapa hasaka rakirakano repo ekemo ano kareakonare?” <sup>33</sup> Airakano Yu aporo sisimamo someraka, “Nomo koteaka rakirakano isiapo ne ekemo kareafunufapo. Asiāne nomo someraka, ‘Koti eto iti hakasa yiyapo,’ airakasa akipoko ne ekemo kareakosapo. Nomo someraka, ‘Ano Kotipo,’ airakae. Asiāne né kakaro aporomanopo.”

<sup>34-35</sup> Airakano Yasumo someraka, “Kotimo sawia popasane kakaro yasiane popahoareapo. Popasa ane metakariakopo. Fana popasane oyapo. Kotimo ipi some kaira aporoaki someraka, ‘Kotio,’ aisane popasapo.” (Buk Song 82:6)

<sup>36</sup> Kotimo aisa yiamo ano murikimaka pusierakano ano hauaka wo pesapo. Pekea someraka, ‘Ano Kotimo hokosapo.’ Airakano repo someraka, ‘Epo Kotiane mawakasamarakae.’ Alyaka repo somerakane mairakare?

† 10:34-35 Kotimo ipi some kaira aporo unihaeaka risiasamo Kotimo iaki Kotio, aisapo.

<sup>37</sup>Atamo makata rakirane nōmo rakianafonosa tiki nōmo someane repo kikipayahoane siahoasireapo. <sup>38</sup>Atamo makata wakapuaka rakirane nōmo rakirakano, makata rakirane asekea repo himu hakásaraka hemakapunie. Anoaki himu hakásaraka hemakapunafonoraka, nōmo rakirane asekea himu hakásaraka hemakapunie. Ano Atayaki hakāsa reke, arirakano Atane anoyaki hakāsa reke, ayiáka rekeno repo asekea hemakapukusapo.”

<sup>39</sup>Airakano ipu e tipura makeako wasere makorakano Yasu ipi rea nine fasekeno asesapo. <sup>40</sup>Arirakano Yasu pukua, he Yotane yaoraka taku ra pukua, Yonemo aporo hea tapukumurisia hauaka á pukua reapo. <sup>41</sup>Rekeno aporo hinamo yakai peraka namina susu someraka, “Isiapo asekeasimo Kotimo wakapumo hemakapukua rakirane Yonemo rakisiafapo. Asiāne Yasumo ainane Yonemo somesane namo kakarohoareapo.” <sup>42</sup>Aíyaka aporo hinamo yakaimo Yasumo someane kakimasapo.

### Rásarase kusuane oyapo.

**11** <sup>1</sup>Aporo hakāsa meta ipi yano motosa Rásarase, Petene apea reapo. Ape hakāsa yia Maria soko ipi yapaya Mata soko tetá toapo. Rásarase ipi makata takamasa wareapo. <sup>2</sup>Arirakano fana Mariamo makata wape yamonane Yasumo korakea rekemarekea, ipi uni itimo hokesapo. Hinamoamo ipi ifia Rásaraseane makata takamasapo. <sup>3</sup>Takamarakano Mariape Mata tetapō aporo metaki someaka mareraka, “Nómo Unihae Yasuaki somehoko pusie. Nómo úyaka somehoanie. Unihaeo, nómo ní aporo táke Rásaraseane makata takamasa warekenapo, aihoanie.” Airakano aporoane pukua tetapō someaka maresane Yasuaki somesapo.

<sup>4</sup>Somerakano Yasumo kaikia someraka, “E kukusapoko makata takamasafapo. Aporo hinamomo Kotiaki hemakapukua kekerehoasimo makata takamasapo. Aporomanomo Tákeane anopo. Anoaki soko hemakapukua kekerehoasimo e makata takamasapo,” aisapo.

<sup>5</sup>Arirakano Yasumo Mata soko, ipi yapaya maria soko Rásarase soko, i suaki himu tumurumo hemakapuraka, <sup>6</sup>Rásarase makata takamasapakano yia, Yasu ipi rea hauaka á yape tetá wasápo. Epo aseako pusuafapo. <sup>7</sup>Yape tetá waka yape isiamo Yasumo someraka, “Yutía hauaka á isu paripukusapo.” <sup>8</sup>Airakano ipi aporo hakāsa puramo someraka, “Tisao, kawé né kukusimo Yutía hauaka á Yu aporo sisimamo ekemo kareakorakasu yia, né efera hunia kareasimo paripurakanare?”

<sup>9</sup>Airakano Yasu ipi kukusa maiyane haru faserepeanafonorakano ipu hemakapusimo Yasumo someraka, “Sere hakāsa tuaro (12) awa faenapo. Maíyamo faesakipoko himo asekea puraka terafaka ruraka etenafapo. <sup>10</sup>Ereamo puraka katosakipoko terafaka ruraka etenapo. <sup>11</sup>Isiapo

aporo táke Rásaraseane ipi wasápo. Wasáne nōmo maturikia taehoko pukusapo.”

<sup>12</sup> Aíyaka takumeaka somerakano, ipi aporo hakása puramo himeteaka risike someraka, “Unihaeo, e makata takamasa warekerakane fahokosapo.” <sup>13</sup> Aíyaka Rásarase nena makata takamasa warekenapakasiki hemakapukua, Rásarase ipi kakaro kusuane Yasumo takumeaka somerakano, ipu himetesapo. <sup>14</sup> Himeteraka risikino aseraka Yasumo hufitaeraka someraka, “Rásarase kusuapo. <sup>15</sup> E makata takamaka warea ano pusufapo. E kusua kunikia motosapakano aseako pukusapo. Sreamo nōmo makata rakirakano, repo anoaki himu hakásaraka hemakapukusapo.”

<sup>16</sup> Airakano Tomase ipi yano motosa meta Titimase”, epo aporo hakása pura metakiraki someraka, “Eyaki isu su pukusapo. Eyaki isu kukuko pukusapo,” aisapo.

**“Yaiya rekeasimo maturikia taena aporoane anopo.” Aíyaka Yasumo somesane oyapo.**

<sup>17-19</sup> Yasu ipi aporo hakása purayaki Petene apea perakano aporo metakiramo someraka, “Rásarase kusua kunikia motosane pipu kitafapo,” aisapo. Airakano kaikia aseane Petene apea Matape Maria tetapō ipi ifia Rásarasepoko himu nekea torapaka mapirahoasimo, Yu aporo hinamo yakaimo ararehoko pekea risikino asesapo. Petene apeane Yarusarame siti aeyaka makesakipoko aporo soko, hinamo soko, yakai pesapo.

<sup>20</sup> Arirakano Yasu apererakano Matamo e sapenako puraka, Maria ape yia kakeno, Mata pukua Yasuaki someraka, <sup>21</sup> “Unihaeo, né wo reasatiki nōmo papāne kukufunufapo. Asiamo e kusuapo. <sup>22</sup> Asiane yumo nōmo Kotiaki wáraka ayiakanierakano epo ayiáka rakiakosapo, aíyaka nōmo hemakapurakaripo.”

<sup>23</sup> Airakano Yasumo someraka, “Ní papā maturikia taehokosapo.” <sup>24</sup> Airakano Matamo someraka, “Fa ana maiya amo aporo hinamo su maturikia taerakano e soko maturikia taehokosapo, aíyaka nōmo hemakapurakaripo.” <sup>25</sup> Airakano Yasumo someraka, “Yaiya rekeasimo maturikia taena aporoane anopo. Aporomo anoaki himu hakásaraka rekena, aporoane kuraka tiki kusuane, asiāne turikia pukua yaiya rekeakosapo. <sup>26</sup> Anoyaki yaiya reke anoaki himu hakásaraka hemakapukua rea aporoane kakaro kukusafapo. Someane nōmo kakimaranare?” <sup>27</sup> Airakano Matamo someraka, “Ao, Unihaeo, nōmo kakimaranapo. Kotimo hokosa nereapo. Arirakano Kotimo ne unihaeaka rekeasimo murikimasa aporo Keresoane nereapo, aíyaka nōmo hemakapurakaripo,” aisapo.

---

<sup>w</sup> 11:16 Titimase airakane namo meaka yano horaka Hokosa Tetasa aíyaka somerakaripo.

**Yasumo Rásaraseane hamakapuraka hiripusane oyapo.**

<sup>28</sup>Matamo someaka faraka ipi apea paripuraka aporo hinamo suamo kaiyakohoamo Matamo Mariaki tau someraka, “Tisa pesa rekesapo. Né aseako wárakasapo.” <sup>29</sup>Airakano Mariamo kaikia foaka takahikia puane <sup>30</sup>Yasu apea perafaraka, fana Matamo Yasu sapenekea asesu yia Yasu rekena aseako pusuapo. <sup>31</sup>Purakano Yu aporo hinamomo Mariane mapirahoasimo arareraka toamo aseane Maria foaka takahikia purakano asesapo. Asekea hemakapuraka, “Maria kunikia hiripuhoko apure,” aiyaka ipu hemakapukua kekemara pe pusuapo.

<sup>32</sup>Arirakano Yasu rea Maria pekea kakuna porokoa kake someraka, “Unihao, né wo reasatiki nōmo papā kukufunufapo.” <sup>33</sup>Airakano Yasumo aseane Mariamo hiripurakano Yasumo aseane Yu aporo hinamo kekemara pesamo soko hiripurakano asekea, Yasumo himu kára nekea someraka, <sup>34</sup>“Rásarase kusuane kunikia ma motosare?” Airakano ipu someraka, “Unihao, aseako peae.” <sup>35</sup>Airakano Yasumo hiripusapo.

<sup>36</sup>Hiripurakano Yu aporo sisima metakiramo asekea someraka, “Epo aporo tákeane kára hemakapuraka hiripuané.” <sup>37</sup>Airakano Yu aporo sisima metakiramo someraka, “Aporo hi mesa mafasasamo Rásarase soko kukukohoamo mafahoafunureapo,” aisapo.

**Rásaraseane Yasumo maturikia taesane oyapo.**

<sup>38</sup>Yasu himu kára nekea kunikia pukua aseane kunikia kakarua ekemo mapirisikino asekea <sup>39</sup>someraka, “Ekemo mapirisiane kotomaka kepere mafearasie.” Airakano aporo kusuamo ipi ifia Matamo someraka, “Unihao, kunikia motosane pipu kitafapo. Pipu toreraka ikiki yamohokosapo.” <sup>40</sup>Airakano Yasumo someraka, “Nōmo néaki fana someraka, ‘Nōmo someane kakimarakano Kotimo wakapu faesa aseakosapo.’ Aiyaka nōmo somesapo.”

<sup>41</sup>Airakano ekemo mapirisiane kotomafearakano asekea Yasumo yapura asekea someraka, “Atao, nōmo néaki wásane nōmo kakimarakano néaki suserakanapo. <sup>42</sup>Maiya suamo nōmo someane nōmo kakimarakano nōmo hemakapurakaripo. Aporo hinamopoko ano pusiesane népo. Aiyaka ipu hemakapusimo nōmo néaki wárakanapo.” <sup>43</sup>Aiyaka kurikuriraka faraka sakepamo someraka, “Rásarase né wo peae.” <sup>44</sup>Airakano aporo kusuane pekea, pasumo hokono soko korake soko wamo soko taporaka perakano Yasumo someraka, “E pusimo pasuane fisisie,” aisapo.

**“Yasu rusua kukusapo,” aisane oyapo.**  
*Matu 26:1-5; Maka 14:1-2; Ruki 22:1-2*

<sup>45</sup>Arirakano Yu aporo sisima metakiramo Maria ararehoko pesamo Yasumo Rásarase kusua maturikia taerakano aseraka, ipu Yasuaki himu

hakásaraka hemakapusuapo. <sup>46</sup>Arirakano Yu aporo sisima metakira Ferese aporo risia pukua, Yasumo rakisiane somesapo. <sup>47</sup>Somerakano Ferese aporo soko, pirisiti aporo soko, namina sarimaraka someraka, “Yasuane isiapo mayiakakosare? Epo kakaro wakapuaka rakirakanapo. Isiapo eane matasohoko mayiáka rakiakosare? <sup>48</sup>Epo someane rukupatehoanafonorakano, aporo suamo epo someane kakimakosapo. Kakimarakano Rome kamani aporomo Kotimo apeane rakaritaehokosapo. Rakaritaeraka isu Yu aporo hinamo su rusua kukusapo.”

<sup>49</sup>Airakano aporo meta ipi yano motosa Kaiafasepo. Keremisi amo Kaiafase pirisiti aporo fanaraka reapo. Kaiafasepo someraka, “Re himeteraka arisie. <sup>50</sup>Aporo hinamo su kukua keane siahoasifareapo. Aporo hinamo supoko aporo hakása kuane siahoasireapo.” <sup>51</sup>Aiyaka somesane Kaiafasepo ipi hemakapusua anaka somesafapo. Keremisi amo e pirisiti aporo fanaraka reasamo Kotimo makata keseke ayiakakosane tarirakano somesapo. Keseke ayiakakosane Yasu ipi Yu aporo hinamo supoko farimaka kukusane somesapo. <sup>52</sup>Yu aporo hinamo hákasapoko kukusane somesafapo. Aporo hinamo metakira soko Kotiaki himu hakásaraka risiane kekepo rosaka tarisia ane sarimahoasimo e kukusapo, aisapo. <sup>53</sup>Aisa sereamo Ferese aporo pirisiti aporo namina Yasu rusua kukusakipoko hemakapukua ikia kosapo.

<sup>54</sup>Asiamo Yu aporo hinamo risiakipoko Yasu kakamaraka koraka reafapo. Yao kauane makeraka Eferaima taonea pukua wakareapo. Apea ipi aporo hakása purayaki waka risiapo. <sup>55</sup>Yu aporomo Ape Farimaresa Hemakapuko Hokono Keakosa maiyane makerakano Yu aporo hinamo yakai namina himu watikisa mafahoasimo namina hauaka metakarikia Yarusarame sitia hisiapo.

<sup>56-57</sup>Hikia Kotimo apea yororakano pirisiti aporo káramo soko Ferese aporomo soko someraka, “Repo Yasu aseraka isuaki somehoanie.” Aiyaka ipu Yasu tipura makeako somerakano aporo suamo Yasu aseako kokoa namina susu me rukua someraka, “Hokono akera wo Yasu peanarakapo. Repo metakiramo mayiáka hemakapurakanare?” Aiyaka namina susu me rukua somesapo.

**Petene apea makata wape yamona Yasu korakea rekemaresane oyapo.**

*Matiu 26:6-13; Maka 14:3-9*

**12** <sup>1</sup>Ape Farimaresa Hemakapuko Hokono Keakosakipoko sere namasu rekeasimo Yasu Petene apea pusuapo. Pukua Rásarase kusuane Yasumo maturikia taesa reamo apea Yasu pusuapo. <sup>2</sup>Pukua Rásarasemo apea Yasu perakano, Yasupoko makata nakosa paisiapo. Paikia Rásarasepe Yasu tetā aporo metakirayaki teporo makeraka tokeno, Matamo makata nakosa paikia kasapo.

<sup>3</sup>Arirakano Mariamo petoroa makata wape yamona yano motosa nate kesane maka pekea, Yasu korakea makata wape yamonane mone káramo

roposane rekemarekea, Mariamo ipi uni itimo hokesapo. Hokerakano aporo suamo makata wape yamonane yamosapo.

<sup>4</sup>Yamorakano Yasumo aporo hakása pura hakása meta Yutase Isekerio epo keseke Yasuane parakehokosa aporoamo someraka, <sup>5</sup>“Mone siufa tiri harotemo (300) makata wape yamona petoroa kesane roporaka aporo makata forosaki kakafokore.” <sup>6</sup>Aisane aporo makata forosaki kakaro kakakosapoko hemakapukua somesafapo. Yutaseane ipi hakimora aporo reasamo somesapo. Arirakano aporo hakása pura suamo moneane sarimaraka pausia kekea, Yutasemo asekea reapo. Asekea reke mone metakira epo tau hakimosapo.

<sup>7</sup>Arirakano Yasumo Yutaseaki someraka, “Hinamoamo ipi rakiako hemakapusuane rakirie. Makata wape yamonane ano kukusa kauane makotehoko rekeamarere. Ano kukusane hemakapukua murikimaka rekeamarere. <sup>8</sup>Maiya suamo aporo makata forosane reyaki hakása yia risikiakosapo. Arirakano maiya suamo ano reyaki hakása rekeakosafapo.” Aíyaka Yasumo somesapo.

**“Rásarase rusua kukusapo,” aisane oyapo.**

<sup>9</sup>Yasu Petene apea rekenapakano aporo hinamo yakaimo kairaka aseako pusuapo. Ipu Yasuane soko, Rásarase kusua maturikia taesane soko, aseako pusuapo. <sup>10</sup>Purakano pirisiti aporomo someraka, “Rásarase soko rusua kukusapo.” Aíyaka hemakapukua risiapo.

<sup>11</sup>Rásarase maturikia taesakipoko, Yu aporo sisima yakaimo pirisiti aporomo someane metakarikia, Yasuaki patera aserakano, pirisiti aporomo saperaka Rásaraseane rusua kukusapo, aisapo.

**Yasu Yarusarame sitia pusuane oyapo.**

*Matiu 21:1-11; Maka 11:1-11; Ruki 19:28-40*

<sup>12</sup>Ere hakása waka Yarusarame sitia hokono keakosakipoko aporo yakai sarimasa amo Yasu apererakano kaikia <sup>13</sup>namina hiriki pateke moko e aseako pukua, e perakano asekea, sakepamo wáraka, “Isiapo Kotiaki kekererakanapo. Unihae Kotimo ne pusiesamo epo né yano motosane makárarakanapo. Yu aporomo Unihae kárane népo.”

<sup>14</sup>Airakano Yasu saro tokia ripaka pusuapo. Wate fana Kotimo sawia poparaka, <sup>15</sup>“Saeone apea<sup>x</sup> risia aporo hinamo re namohokopo. Repo Unihaeane saro toki matia ripaka peakosapo.” Aíyaka wate fana popasane apera ayareapo. (Sekaraia 9:9)

<sup>16</sup>Yasu saro toki matia ripaka pesa maiya amo aporo hakása puramo fana Kotimo sawia popasa amo kepoane hemakapusuafapo.

---

<sup>x</sup> **12:15** Yarusarame sitiane ūri Saeonea kisiapo. Asiasamo Yarusarame sitiane yano meta, Saeone ape, airapo.



Asiāne Yasu hepene yapura hisiakipoko ipu hemakapuraka, “Fana Kotimo sawia poparaka aporo Unihae ayiáka peakosapo, aisane Yasu perakasu ayareapo.” Aíyaka Yasu hepene yapura hisiakipoko keseke ipu hemakapusuapo.

<sup>17</sup>Arirakano Yasu Yarusarame sitia apererakano aporo hinamo yakaimo aseako pusuapo. Yasumo Rásarase kusuane maturikia taerakano, aporomo soko hinamomo soko ipu metakiramo asesamo pekea somerakano, aporo hinamo metakiramo kaikia Yasu apererakano aseako pusuapo.

<sup>18</sup>Kotimo wakapuaka rakirane rakisiapakano Yasuane aseako pusuapo. <sup>19</sup>Purakano Ferese aporomo asekea namina susu someraka, “Isiapo someane aporo hinamo suamo metakarikia, Yasumo someane kakimaka e patera asere. Yasumo isiapo hemakapusuane marakoane.” Aíyaka Ferese aporomo namina susu somesapo.

#### **Kiriki aporomo Yasu aseako pesane oyapo.**

<sup>20</sup>Hokono keasiraka risia maiya amo Kiriki aporo metakira Yarusarame sitia Kotiaki kekerehoko hisiapo. <sup>21</sup>Hikia Firipiaki somesapo. Firipimo ipi ape sumuane Pesaita taonepo. Ipi hauakane Kariri hauakapo. Firipiaki ipu someraka, “Isiapo Yasu aseako pukuripo.” <sup>22</sup>Airakano Firipi pukua Enituaki someaka, tati hakāsa pukua Yasuaki somesapo. <sup>23</sup>Somerakano Yasumo someraka, “Aporomanomo Tákeane anopo. Kotimo nōmo yanoane makáraraka mareasimo ano kukusa maiyane maiya yuyapo. <sup>24</sup>Nōmo kakaro somerakaripo. Makata mano kokomaresane, kauane hauaka toreraka, namo pauaka herapo. Pauaka hekea amo wate sakepamo perapo. Kokomaresane kau torehoanafonoraka namo pauaka herafapo. <sup>25</sup>Makata mano aina ayiáka re soko ayiakakakosapo. Hauaka wo aporomo ipi kaumo rakirane mahimuraka rekena, ipi namo kakaro yaiya rekeakosane metakarirakanapo. Hauaka wo kaumo rakirane metakarikia, patera tarirakano, ipi namo kakaro yaiya rekeakosapo.

<sup>26</sup>Aporo hinamo hakāsa metamo nōmo arakira ayiáka rakiako hemakapurakanone ane, anoaki patera asekea kekemahoanie. Asiamo ano rea nōmo makata rakira aporo hinamo ane anoyaki hakāsa risikiakosapo. Nōmo makata rakira aporo hinamo ane Kotimo makárahokosapo.” Aíyaka Yasumo somesapo.

#### **Yasumo someraka, “Ano kukusapo,” aisane oyapo.**

<sup>27</sup>Yasumo someraka, “Ano kukusane hemakapukua himu nenakaripo. Ataki maíyaka somehoanarakapo. Atao, maiya yumo ano kurapaka ararehoanie, aiyaka somehokosafapo. Kukusakipoko ano hauaka wo pesapo. <sup>28</sup>Atao, aporomo né kekerehoasimo ní yano motosa máfahoanie.” Airakano hepene aeyaka Kotimo someraka, “Aporomo ano

kekerehoasimo nōmo yano motosa fana máfasapo. Efera hunia soko nōmo yano motosa máfahokosapo.”

<sup>29</sup>Aíyaka hepene aeyaka somerakano aporo hinamo su sarimarakaraka risiamo kairaka, “Kikirirakae,” airakano ipu metakiramo someraka, “Wae, hepene aporomo eaki makata somerakae.” <sup>30</sup>Airakano Yasumo someraka, “Nōmo kaiyisimo hepene aeyaka somerakarifapo. Repo kaiyisimo somerakae. <sup>31</sup>Hauaka wo aporo hinamomo makata watikiaka rakisiakipoko Kotimo hukurukusapo. Arirakano hauaka wo Satane unihaeaka reane epo wakapuane rukumosaka tapiakosapo. Asiamo Kotimo ayiakakosane pipu maiya yumo kepo marerakanapo. <sup>32</sup>Arirakano ano ira matopesa paremarekea máfaraka mapoana maiya amo aporo hinamo suamo anoaki himu hakásaraka hemakapusimo nōmo kirimahokosapo.”

<sup>33</sup>Aíyaka e aporomo ira matopesa paremarerakano kukusane Yasumo somesapo. <sup>34</sup>Aíyaka somerakano aporo sarimasamo someraka, “Kotimo sawia popasane oyapo. ‘Kotimo unihaeaka rekeasimo murikimasa aporo Keresoane yaiya rekeakosapo.’ Aíyaka popasa nine nómo someraka, ‘Aporomanomo Tákeane ira matopesa paremareakosapo.’ Airakane marirakano aíyaka somerakanare? Aporomanomo Tákeane epare?”

<sup>35</sup>Airakano Yasumo someraka, “Faesane reyaki maiya wakasema rekeakosapo. Faesa reyaki area sereamo koteaka punie. Katorakano koteaka purafapo. Katosa amo ikia kara pukusane mahimeteraka risirapo. <sup>36</sup>Ano faesa rekena faesa aki’ himu hakásaraka hemakapukua risikinone, re su faeraka risikiakosapo.” Aíyaka Yasumo some kaka faraka, e tau pukua ipu aseakohoamo farareapo.

#### **Yasumo some kayane Yu aporo sisimamo kakipayasane oyapo.**

<sup>37</sup>Yasumo ipi wakapumo hemakapukua rakirakano yia, ipu himo asekea asekepayasapo. Asekepayaraka eaki himu hakásaraka hemakapusuafapo. <sup>38</sup>Aesayamo someraka ayiakakosaposane kakaro yanakano yia ipu asekepayasapo. Fana Aesayamo someraka, “Unihaeo, nómo someane isiapo some kasane ipu kakimasafapo. Unihae, nómo wakapumo hemakapukua rakirane isuaki tarisiane ipu asekepayasapo.” (Aisaia 53:1)

<sup>39</sup>Aíyaka Aesayamo someraka kakipayana kepoane hemakapusimo some meta some kasapo. Some metane oyapo.

<sup>40</sup>“Asekepayasa aporo hinamoamo himo aseakohoamo hiane Kotimo makatosapo. Himumo hemakapukohoamo himu mahimetenapo. Fana Kotimo some kakipayaraka ipu keseke someraka, ‘Kotimo isiapo makata waticisane mafahoasimosapo.’ Aíyaka hemakapukua risikiako parinapaka i himuane Kotimo mahimetesapo. I hiane makatosapo.” (Aisaia 6:10)

---

‡ 12:36 Faesane kepoane Yasu ipipo.

<sup>41</sup> Aíyaka Aesayamo somesapo. Fana Yasu peasiraka Yasumo faesane Aesayamo asekea aíyaka somesapo. Yasumo someane aporo hinamomo kakipayahokosane Aesayamo somesapo.

<sup>42</sup> Arirakano aporo hinamo metakiramo soko, Yu aporo fanaraka risia aporo metakiramo soko Yasumo someane kakimasapo. Kakimarakano Ferese aporomo kairaka iaki hukururapaka i namoraka risiapo. Ferese aporomo iaki someraka, “Yu aporomo sarimana apea peakopo,” airapaka Yasuaki risikiako parisane aporo suaki hufitaeraka somesafapo. <sup>43</sup> Aporo metakiramo “Ne kotesafapo,” airapaka hufitaeraka somesafapo. Aporo metakiramo “Ne kotesapo,” aihoasimo aporomo someane makama fanasapo. Kotimo “Né kotesapo,” aihoasimo someane makama fanasafapo.

#### Yasumo somesane oyapo.

<sup>44</sup> Aporo hinamo suamo kaiyisimo Yasumo sakepamo someraka, “Aporo hinamomo anoaki himu hakásaraka hemakapukua risikinone, Kotimo ano pusiesa aporoaki soko himu hakásaraka hemakapukua risikinapo.

<sup>45</sup> Repo ano aseraka ano pusiesa Kotiane soko repo aserakanapo.

<sup>46</sup> Hauaka wo ano faeraka pesapo. Faeraka perakano aporomo nōmo someane kakimaraka katosane metakarikia faeraka risikiakosapo.

<sup>47</sup> Aporo hinamo suane mafasiako ano pesapo. Aporo hinamoane hukuruko ano pesafapo. Arirakano aporo hinamomo nōmo someane kaikia kakipayarakano, aporo hinamoane nōmo parakuraka hukurukusafapo. <sup>48</sup> Aporo hinamomo anoaki patera tarikia, nōmo someane kakipayasa, some yiamo iane hukurukusapo. Pipu nōmo somesane ipu kakipayasakipoko hukuarura maiya amo somesa ane fasereperaka somesa amo iane hukurukusapo. <sup>49</sup> Nōmo someane nōmo nī hemakapusua aeyaka somerakanafapo. Atamo ano pusiesamo someaka maresane nōmo somerakanapo. <sup>50</sup> Someane aporo hinamomo kakimarakano i yaiya risikiakosapo, ayiáka nōmo hemakapurakaripo. Asiamo Atamo anoaki someaka maresane nōmo reaki some karakanapo.” Aíyaka Yasumo somesapo.

#### Yasumo ipi aporo hakāsa purane korake kususane oyapo.

**13** <sup>1</sup> Ape Farimaresa Hemakapuko Hokono Keakosa maiya ane raupo, aíyaka Yasumo hemakapuraka, “Hauaka one metakarikia Ata rea hauaka yapura hiakosa maiya ane makerakanapo.” Aíyaka hemakapukua, ipi aporo hakāsa purane himu tumurumo hemakapusuapo. Ipi himu tumurumo hemakapusuane tipia metakarisiafapo.

<sup>2</sup> Ereamo Yasu ipi aporo hakāsa purayaki makata nekea toapo. Makata nekea tokoasiraka Satane pekea Isekerio aporo Saemonemo hokosa Yutase himua someraka, “Nómo Yasu parakehoanie,” aíyaka Yutaseaki somesapo. Somesakipoko keseke namina hakāsa toke makata nesapo.

<sup>3</sup>Makata nekea toakipoko Yasumo hemakapuraka, “Atamo wakapu suane anoaki karakano ano siaraka rekenapo. Ano Koti rea aeyaka pesapo. Koti rea yia parihiakosapo.” <sup>4</sup>Aíyaka hemakapukua ipi takahikia pasu kima ososane horomaka, tawero maka otoa sotakamaka, <sup>5</sup>tisia he takamaka pukua aporo hakāsa purane korake kusuraka, tawero otoa sotakamasane fatarimaka hokesapo. Aporo raipamo korake kusuraka hokena ayiáka, Yasumo kusuraka hokesapo.

<sup>6</sup>Saemone Pita rea perakano Saemone Pitamo someraka, “Unihaeo, ano korake kusuhoekosare?” <sup>7</sup>Airakano Yasumo someraka, “Korake kusuana kepoane repo yumo himeteane. Keseke hemakapukusapo.” <sup>8</sup>Airakano Pitamo someraka, “Yumo soko keseke tipiamo soko, ano korake nómo kusuhoekosafapo.” Airakano Yasumo someraka, “Né korake kusuhoanafonorakanone né anoyaki hakāsa reekosafapo.”

<sup>9</sup>Airakano Saemone Pitamo someraka, “Unihaeo, Korake hákasa kusuhekopo. Korake kusuraka, hokono soko, wamo soko, su kusuhoanie.” <sup>10</sup>Airakano Yasumo someraka, “He tapuraka kau pikirisane fasekeno, efera hunia kau susu he tapurafapo. Korake hákasa kusunapo. Re su pikirisane faraka, aporo hakāsa meta pikirisa yaiya are.” <sup>11</sup>Aíyaka somesane Yasu ipi parakehokosa aporoane hemakapukua somesapo.

<sup>12</sup>Korake kusuraka faraka Yasumo ipi pasu kima ososa horomaka motosane, efera hunia osoraka teporo makeraka kake someraka, “Nōmo re korake kusurakasane kepoane repo hemakapurakanare?” <sup>13</sup>Repo anoaki, ‘Tisao, Unihaeo,’ airakasuane anopo. Repo kakaro airapo. <sup>14</sup>Repo tisane soko, repo unihaeane soko, anopo. Asiane ano aporo raipa pariraka re korakeane kususapo. Asiamo repo soko namina yia meta korakeane kusuhoanie. <sup>15</sup>Nōmo ainane reaki tarirakayiapo. Asiamo nōmo repoko raiparaka rakirakasa ayiaka, repo soko aporo hinamo metakirapoko raiparaka rakinie. <sup>16</sup>Asiamo nōmo kakaro somerakaripo. Aporo raipamo ipi wafayane marokenafapo. Arirakano somehoko pusierakano pesa aporoamo ipi pusiesa aporoane marokenafapo. <sup>17</sup>Yumo kakaro somesane repo hemaka apure. Hemakapukua ayiáka rakirakano re seseaka risikiakosapo.

<sup>18</sup>Re suane nōmo somerakanafapo. Yasumo i suaki somerakano yia, Yutasemo Yasumo someane kakimasafapo. Re su nōmo pasimosane repo hemakapusuane nōmo hemakapurakanapo. Asiane fana Kotimo sawia popasane kakaro ayiakakosapo. Aíyaka Kotimo sawia popasane oyapo. ‘Anoyaki hakāsa toke makata nesa aporoamo himu meta fasereperaka anoaki hisiraka yunuraka reapo.’ Aíyaka fana popasane pipu yanakanapo. (Buk Song 41:9)

---

<sup>z</sup> 13:6 Amo kepoane oyapo. Pitamo hemakapuraka, “Yasumo anopoko raiparaka rakiraka ano korake kusuhoane siahoasifareapo,” aiyaka hemakapusuapo.

<sup>19</sup>Keseke ayiakakosane pipu nōmo reaki somerakanapo. Áyiana maiya amo repo asekea hemakapuraka, ‘E kakaro Keresopo. E yaiya rerapo.’ Áiyaka hemakapusimo keseke ayiakakosane pipu nōmo reaki somerakanapo. <sup>20</sup>Nōmo kakaro somerakaripo. Nōmo someane some kakako pusiesa aporoane peraka some karakano, aporo metamo kakimaka, nōmo someane soko kakimaranapo. Arirakano ano pusiesa Kotiamo someane soko kakimaranapo.” Áiyaka Yasumo somesapo.

**Yasumo someraka, “Ano parakehokosapo.” Aisane oyapo.**

*Matiu 26:20-25; Maka 14:17-21; Ruki 22:21-23*

<sup>21</sup>Yasu ipi aporo hakāsa purayaki toakipoko ipi himu nekea kake someraka, “Nōmo kakaro somerakaripo. Repo hakāsa metamo ano parakehokosapo.” <sup>22</sup>Airakano aporo hakāsa pura toamo namina susu asekea someraka, “Eparakapo.” <sup>23</sup>Áiyaka himeteaka tokeno, aporo hakāsa pura hakāsa metaki Yasumo himu tumurumo hemakapusuane Yasu makeraka kayapo. <sup>24</sup>Kakeno Saemone Pitamo hi pipiraka, “Nōmo Yasuaki kaisie. Aporoane epare? Áiyaka kaisie.” <sup>25</sup>Áiyaka hi pipirakano, Yasumo hemakapusua aporo hakāsane tati hakāsa karoraka toke, wamohae hákasa uaka hikia Yasu senakia someraka, “Unihao, aporo hakāsa nōmo somerakasane epare?” <sup>26</sup>Airakano Yasumo someraka, “Nōmo farawa maka he waira kokomarekea karakano, aporo ayapo.” Áiyaka epo farawa maka he waira kokomarekea, Isekerio aporo Saemonemo hokosa Yutaseaki kasapo.

<sup>27</sup>Karakano farawane Yutasemo masapo. Masa maiya amo Satane pekea epo himuane maparitaesapo. Maparitaerakano Yasumo someraka, “Nōmo rakiakosane foaka rakinie.” <sup>28</sup>Airakano aporo hakāsa pura Yasuyaki hakāsa toamo someane kaikia himetesapo. Ipu metakiramō himeteraka hemakapuraka, <sup>29</sup>“Yutasemo mone pausi asekea reasamo, Yasumo eaki hokono keakosakipoko makata nakosa ropohoko pusierakae.” Áiyaka hemakapusuapo. Arirakano ipu metakiramō himeteaka hemakapuraka, “Aporo makata forosaki mone kakako pusierakae.” Áiyaka i himeteraka toapo.

<sup>30</sup>Himeteraka hemakapurakano, farawane Yutase maka foaka takahikia, ere yiamo yaoa pusuapo.

**Yasumo somemane kaweane oyapo.**

<sup>31</sup>Yutase pusuakipoko Yasumo someraka, “Aporomanomo Tákeane anopo. Nōmo wakapuane repo asekeasimo yumo nōmo reaki tariakosapo. Ano aeyaka Kotimo wakapuane soko reaki tariakosapo. <sup>32</sup>Asiamo Kotimo wakapuane tarirakano nōmo wakapuane soko Kotimo tariakosapo. Yumo tariakosa maiya ane makerakanapo. <sup>33</sup>Hokosa reo, maiya suamo reyaki ano rekeakosafapo. Wakasema nina keseke repo ano kope pukusapo.

Ano hinakano re anoyaki hakāsa hiane siahoasifareapo. Some one fana nōmo Yu aporo sisimaki somesapo. Somesa hakāsa yine nōmo reaki somerakanapo. <sup>34</sup>Asiamo somemane kawē haku nōmo reaki some karakanapo. Re namina susu himu tumurumo hemakapukua risikianie. Nōmo re himu tumurumo hemakapukua area ayiāka repo namina yia ayiāka himu tumurumo hemakapukua risikianie.

<sup>35</sup>Ayiāka hemakapukua risikino aporo metakiramo asekea someraka, 'I Yasu patera asesā aporo ayareapo,' aiyāka somehokosapo." Aiyāka Yasumo somesapo.

**"Pitamo someraka, 'Yasuane nōmo aserafapo,' aiyāka kotafe somehokosapo." Aiyāka Yasumo somesane oyapo.**

*Matiu 26:31-35; Maka 14:27-31; Ruki 22:31-34*

<sup>36</sup>Saemone Pitamo someraka, "Unihāeo, né ma hiakosare?" Airakano Yasumo someraka, "Ano hiakosa á yumo né kekemarafe hiane siahoasifareapo. Keseke né hiakosapo." <sup>37</sup>Airakano Pitamo someraka, "Marirakano ano yumo kekemarafe hiakosafaporakanare? Nōmo né hemakapuraka népoko ano kukuko hisirakanafapo." <sup>38</sup>Airakano Yasumo someraka, "Né anopoko kakaro kukusare? Hao, kaisie. Nōmo neaki kakaro somerakaripo. Kokoroko mehoasiraka nōmo 'Yasuane nōmo aserafapo.' Aiyāka nōmo yape isiamo kotafe somehokosapo." Aiyāka Yasumo somesapo.

**"Ata rea hauaka hiakosa ikia karane anopo,"  
aiyāka Yasumo somesane oyapo.**

**14** <sup>1</sup>Yasumo ipi aporo hakāsa puraki someraka, "Repo kara hemakapukua himu fahokopo. Kotiaki himu hakāsaraka hemakapukua risikianie. Anoaki soko himu hakāsaraka hemakapukua risikianie. <sup>2</sup>Nōmo atamo apea, ape rumu yakai risikinapo. Ape rumu yakai risikianafonosa satiki nōmo reaki aiyāka somehoafunufapo. Re hepene yapura hinaka risikiakosa apeane ano fana hinaka repoko maropohoko hiakosapo. <sup>3</sup>Ano hikia repoko ape maroporaka, siaraka marekea keseke ano rea hauaka isina hakāsa risikiakosakipoko re pasimokoako ano paripeakosapo. <sup>4</sup>Asiamo ano rea hauaka hiakosa ikia karane repo hemakapurapo."

<sup>5</sup>Airakano Tomasemo someraka, "Unihāeo, né rekeakosa hauakane isu himeteripo. Ikiā kara soko, isu himeteripo." <sup>6</sup>Airakano Yasumo someraka, "Ikiā karane anopo. Kakaro somerane anopo. Yaiya rera kepoane soko anopo. Re Ata rea hauaka hiakosane ano koaraka hiakosafapo. Anoaki himu hakāsaraka risiane hiakosapo. <sup>7</sup>Repo ano aseraka nōmo Ata soko aserakanapo. Pipu yumo Ata repo asekea hemakapurakanapo."

<sup>8</sup>Airakano Firipimo someraka, "Unihāeo, Atane isuaki tarisie. Tarirakano isiapo aseraka someraka efera hunia tarisie aihokosafapo."

<sup>9</sup>Airakano Yasumo someraka, “Maiya káramo ano reyaki reapo. Asiane Firipio, nómo ano hemakapurakarifare? Repo ano aseraka nōmo Ata soko aserakanapo. Mayiakako Ata tarisie, airakanare?” <sup>10</sup>Ano Atayaki rekenapo. Atane anoyaki rekenapo. Iti sarimarakaka hakása yineraka risikinapo. Firipio, makata ane nómo hemakapurakarifare?” Afyaka ipi aporo hakása pura susuaki Yasumo someraka, “Reaki makata some akara one nōmo nī hemakapusua aeyaka reaki some karakanafapo. Ata anoyaki reke epo wakapuaka rakirane tarirakano nōmo rakirakanapo. <sup>11</sup>Nōmo Ataki kataka marekea, Atamo anoaki kataka marekea, ayiáka iti hakása yineraka risikinapo. Nōmo someraka one kakimakanie. Repo kakimakanafonorakano ane, nōmo wakapuaka arakirane repo himo asekea, anoaki himu hakásaraka hemakapunie. Hemakapukua nōmo someane soko kakimakanie.

<sup>12</sup>Nōmo kakaro somerakaripo. Aporo hinamomo nōmo someane kakimaka himu hakásaraka risike, nōmo arakira ayiáka aporo hinamoamo ayiáka rakiakosapo. Ano Ata rea yapura hinaka, Ho Kotesa pusierakano, Ho Kotesa hauaka wo peraka, Ho Kotesamo reaki wakapu karakano, repo nōmo makata rakirane marokeraka repo makata kára rakiakosapo. <sup>13</sup>Repo anoaki himu hakásaraka risike ano yano motosa mafanahoko hemakapukua kurikuriraka makata ayiakanie, airakano, nōmo ayiakakosapo. Atamo wakapu kárane aporo suamo asekeasimo repo ayiakanie airakano, ipi hokosa nōmo ayiakakosapo. <sup>14</sup>Repo anoaki himu hakásaraka risike ano yano motosa mafanahoko hemakapuraka makata su ayiakanie, airakano makata suane nōmo ayiakakosapo.

### Ho Kotesa peakosaposane oyapo.

<sup>15</sup>Repo anoaki himu tumurumo hemakapukua risikinone nōmo somemaneane soko repo kaikia kekemaraka risikiakosapo. <sup>16</sup>Kekemaraka risikino nōmo Ataki someraka, re ararehoko Ho Kotesa pusiehoanie, aihokosapo. Airakano Ho Kotesamo re ararehoko Atamo pusiehokosapo. Pusierakano peakosapo. Peraka Ho Kotesa reyaki yaiya rekeakosapo. Ho Kotesane Kakaro Somera Hoane epo.

<sup>17</sup>Ho Kotesane nena aporo hinamomo, ‘Isuyaki hakása reae,’ airafapo. Epo ainane ipu aserafapo. Arirakano eane ipu hemakapurafapo. Arirakano repo Ho Kotesane hemakapurapo. Yumo Ho Kotesa reyaki rekenapo. Keseke re himua hakása hakásaraka Ho Kotesane rekeakosapo.

<sup>18</sup>Arirakano réane karaiya hokosa ayiáka risikiasimo nōmo re metakariakosafapo. Ano paripeakosapo. <sup>19</sup>Arirakano maiya wakasema nina kakimakanafonona aporo hinamoamo ano efera hunia aseakosafapo. Arirakano repo anoane aseakosapo. Ano yaiya rekeakosasamo, re soko yaiya risikiakosapo. <sup>20</sup>Maiya amo ano Atayaki reke, arirakano re anoyaki reke, arirakano ano reyaki reke, ayiáka isina su hakása risike

repo hemakapukusapo. <sup>21</sup>Nōmo somemane kaikia kekemara aporo hinamoamo anoaki himu tumurumo hemakapurapo. Anoaki himu tumurumo hemakapusua aporo hinamoane nōmo Atamo himu tumurumo hemakapukusapo. Aporo hinamoaki, nōmo soko himu tumurumo hemakapukusapo. Ipu ano kakaro koteaka hemakapusimo nōmo ainane iaki tariakosapo,” aisapo.

<sup>22</sup>Airakano Yutasemo Yasuaki makata somesapo. Arirakano Isekerio aporo Yutase Yasu parakesa ayafapo. Epo ipi yako Yutase metamo someraka, “Unihaeo, nómo ainane isuaki hákasa tarikia, nena aporo hinamoaki tariakosafapo, airakane mairakare?” <sup>23</sup>Airakano Yasumo someraka, “Aporo hinamomo anoaki himu tumurumo hemakapurakano nōmo someane soko aporo hinamoamo kaikia kekemahokosapo. Kakimara aporo hinamoaki nōmo Atamo soko himu tumurumo hemakapukusapo. Aporo hinamo akiyaki Ata eto risikiakosapo.

<sup>24</sup>Arirakano aporo hinamomo anoaki himu tumurumo hemakapunafonorakano, aporo hinamoamo nōmo someane kakimakosafapo. Nōmo some karakano repo kaisiane nōmo nī hemakapusuane reaki some kasafapo. Atamo ano pusiesamo epo hemakapusuane nōmo reaki some kasapo. <sup>25</sup>Yumo ano reyaki areamo some karakanapo. <sup>26</sup>Keseke Atamo ano yano motosa mafanaraka re ararehoko Ho Kotesa pusiehokosapo. Pusierakano re himua Ho Kotesa peakosapo. Peraka repo makata su enomaka hemakapusimo epo some kakakosapo. Nōmo somerakano repo kaisiane efera hunia hemakapusimo repo himura Ho Kotesamo mahemakapukusapo.

<sup>27</sup>Arirakano nōmo tau auaraka rerane reaki karakanapo. Hauaka wo aporomo tau auaraka rerane reaki ayiáka karafapo. Nōmo auaraka rerane reaki karakano re himu faraka namoraka risikiakopo. <sup>28</sup>Nōmo fana someraka, ‘Nōmo reane metakarikia ano hikia, keseke re arisia paripeakosapo.’ Aisane repo kaisiapo. Repo himu tumurumo anoaki hemakapuraka, nōmo Ata rea hiakosaposane kaikia seseaka hemakapunie. Atane namo kakaro fanaraka reke, Ata patera ano rekenapo. E rea ano hiakosapo aisane repo kaikia seseaka hemakapunie. <sup>29</sup>Ano hiasiraka area omo reaki somerakanapo. Nōmo someane repo kakimakasimo keseke ayiakakosane, yumo nōmo reaki somerakanapo. Ano hinakano repo aseraka nōmo someane kakimakosapo. <sup>30</sup>Arirakano reaki somehokosa maiyane fahoko makerakanapo. Hauaka omo unihae Satane peako makeraka rekenapo. Satanemo ipi wakapumo ano hurutapirafapo. Epo anoaki ayiakanierakano nōmo kakimarafapo. <sup>31</sup>Atamo ayiakanierakano nōmo kakimarapo. Ataki nōmo himu tumurumo hemakapurapo. Nōmo Ataki himu tumurumo hemakapukua reane aporo hinamo suamo hemakapusimo, nōmo Atamo ayiakanierakano nōmo kakimarapo. Arirakano yumo nōmo someane yiyapo. Re su takahisie. Isu purakapo.” Aíyaka Yasumo somesapo.



**Yasumo someraka, “Kakaro sako karepe  
kepo asiane anopo,” aisane oyapo.**

**15** <sup>1</sup>Yasumo someraka, “Kakaro sako karepe<sup>a</sup> kepo asiane anopo. Sako karepe hemo wafayane nōmo Atapo. <sup>2</sup>Anoa eyamo kataka marekea reke wate peanafonosane, hemo wafayamo eya ane popateraka mokoatenapo. Arirakano eyamo kataka marekea reke wate pesane efera hunia peasimo eyane horoposane hako kepo tipia popatenapo. Popateraka kepo aeyaka efera hunia susuniraka wate yakai koteaka perapo. <sup>3</sup>Asiamo repo nōmo someane kakimasasamo repo makata waticisane nōmo someamo popateraka mokoatesapo. <sup>4</sup>Re anoyaki reke, ano soko, reyaki reke, ayiáka isina hakāsa sarimarakā risikiakosapo. Sako karepe eya foanepekea hauaka kake ipi hemakapukua wate perafapo. Sako karepe eyamo kepoa kataka marekea rekena wate perapo. Wate pekea area ayiáka repo anoaki himu hakásaraka kataka marekea risike koteaka rakipe puraka risikiakosapo.

<sup>5</sup>Sako karepe kepo asiane anopo. Sako karepe eya asiane repo. Repo anoaki kataka marekea risikino, nōmo kepo aeyaka sisipuane eya pukua, wate pekea arisia ayiáka re ayiáka risikiakosapo. Anoaki kataka marekea risikianafonoraka, wate peanafonoraka arisia ayiáka re ayiáka risikiakosapo. <sup>6</sup>Anoaki kataka marekea risikianafonosa aporo hinamoane sako karepe eya pateke mokoatesa asiapo. Pateke mokoatesane yoferaka poranapo. Porasa mokoatesane su sarimarakā faturaka ira paikimararapo.

<sup>7</sup>Repo anoaki himu hakásaraka hemakapukua risike, nōmo someane repo kakimaka hemakapukua kekemaraka rakipe puraka, repo anoaki ayiakanierakano nōmo ayiakakosapo. <sup>8</sup>Arirakano wate apera ayiáka nōmo some kakimara aporo hinamoane namo kakaro koteaka risikiakosapo. Ayiaka risikino aporo hinamo metakiramo asekea nōmo Atane makarahokosapo. <sup>9</sup>Atamo anoaki himu tumurumo hemakapukua area ayiáka, nōmo soko reane ayiáka himu tumurumo hemakapukua rekenapo. Nōmo himu tumurumo hemakapusuane repo metakariakopo. Yaiya maka risikianie. <sup>10</sup>Atamo someane nōmo kakimarakano Atamo ano yaiya himu tumurumo hemakapukua rekenapo. Hemakapukua area ayiáka, nōmo somemane soko repo kakimarakano, re soko, nōmo yaiya himu tumurumo hemakapukua rekeakosapo.

<sup>11</sup>Nōmo sesenane reyaki risikiasimo nōmo reaki somerakanapo. Nōmo someane kakimarakā repo kára seseraka mapirarakā siarakā mokoasimo hemakapurakaripo. <sup>12</sup>Nōmo somemane oyapo. Nōmo re himu tumurumo

---

<sup>a</sup> **15:1** Sako yano motosa sako karepepo. Karepe wate perakano aporomo tumokoa metekeraka waene he rakirapo.

hemaka apura ayiáka, repo namina yia ayiáka himu tumurumo hemakapunie. <sup>13</sup>Aporomo ipi aporo tákepoko farimaka kurane ane, himu tumurumo hemakapusuane namo kakaro fanapo.

<sup>14</sup>Nōmo somemane repo kaikia kekemarakano reane nōmo tákepo. <sup>15</sup>Yumo reaki nōmo aporo raipapo, airakanafapo. Asiamo aporo raipaki wafayamo ipi hemakapusuane somerapapo. Arirakano Atamo anoaki somesane makata su reaki nōmo somerakanapo. Aporo tákeaki somera ayiáka nōmo reaki somerakanapo.

<sup>16</sup>Repo ano murikimaka pasimasafapo. Nōmo reane murikimaka pasimosapo. Asiamo sako wate pekea arisia ayiáka re ayiakasimo nōmo reane pasimokoa murikimaka makata rakiako pusiesapo. Wate yaiya peraka risikiasimo murikimaka makata rakiako pusiesapo. Pusierakano repo ano yano motosa mafanaraka hemakapukua risike, Ataki ayiakanierakano epo ayiakakosapo. <sup>17</sup>Arirakano nōmo reaki somemane akara oyapo. Repo namina yia metamo metane himu tumurumo hemakapukua, arirakano metamo metane himu tumurumo hemakapukua ayiáka risikianie.” Aiyaka Yasumo somesapo.

**“Aporomo reaki hisihokosapo,” aisane oyapo.**

<sup>18</sup>Arirakano Yasumo someraka, “Aporomo reaki hisirakanone, anoaki fana hisisane, repo hemakapunie. <sup>19</sup>Re nena aporoyaki paosa satiki ipu reaki himu tumurumo hemakapufunupo. Arirakano nōmo re pasimokoa murikimasasamo re nena aporoyaki paosafapo. Re iyaki hakāsa yinehoanafonosasamo ipu reaki hisihokosapo. <sup>20</sup>Fana nōmo reaki somesane meraruhokopo. Somesane oyapo. ‘Aporo raipamo ipi wafayane marokenafapo.’ Aiyaka fana nōmo somesapo. Asiamo nena aporomo ano mokoatikira ayiáka, re soko mokoatikihokosapo. Arirakano nōmo someane ipu kakimarakano, repo someane soko kakimakosapo.

<sup>21</sup>Repo ano patera asesasamo ipu re mokoatikihokosapo. Kotimo ano pusiesane namina hemakapurakanafapo. <sup>22</sup>Ano hauaka wo peraka makata watikiaka rakirane kakama somesapo. Somesasamo ipu makata watikiaka rakisiane hufitaeraka metakariafunupo. Asiāne nōmo someane ipu kaikia, makata watikiaka rakisiane metakarirafaraka, yaiya asekepayarakano, ipu makata watikisa amo iane hukurukusapo. Aporo hinamomo makata watikiaka rakisiane metakarisisimo, nōmo somehoko peanafonosa satiki ipu makata watikisane meraruamo yaiya rakiafunupo. <sup>23</sup>Arirakano anoaki hisisa aporo hinamomo nōmo Ataki soko hisirakanapo. <sup>24</sup>Nōmo wakapuaka rakisia ayiáka, fana aporo hakāsa metamo ayiáka wakapuaka rakisiafapo. Nōmo wakapuaka rakianafonosa satiki aporo hinamo metakiramomo hemakapuraka, ‘Wakapuaka rakirane isiapo asesafapo,’ aihoafunupo. Asiāne nōmo wakapuaka rakisiane ipu asekea asekepayaraka, ipu makata watikiaka rakisiane metakarisiafapo.

Metakarianafonosasamo ipu makata watikisa amo iane hukurukusapo. Nōmo wakapuaka rakisiane aporo hinamomo asesapo. Asekea yia anoaki soko, Ataki soko, hisiraka risikinapo.

<sup>25</sup> Arirakano fana Kotimo sawia popasane oyapo. ‘Ipu namina anoaki nenakamakayia hisihokosapo.’ Aiyaka fana poparaka (*Buk Song 35:19, 69:4*) ayiakakosaposane yumo yainakanapo.

<sup>26</sup> Arirakano Ho Kotesa re ararehoko peakosane Ata rea aeyaka peakosapo. Kakaro someane aporo hinamomo hemakapusimo some kaka, arirakano tarikia, ayiakako peakosapo. Ano Ata rea yapura hinaka Ho Kotesamo re ararehoasimo nōmo Ataki someraka, Ho Kotesa pusiehoanie, aihokosapo. Airakano Atamo pusiehokosapo. Pusierakano peakosapo. Peraka anoane kakaro tarikia some kakakosapo. <sup>27</sup> Arirakano hauaka wo koraka reke nōmo makata kepomarekea rakisia maiya amo re anoyaki hakāsa risiapo. Maiya suamo isina hakāsa risirasamo ano asesane repo aporo hinamo metakiraki some kakanie.” Aiyaka Yasumo ipi aporo hakāsa puraki somesapo.

**16** <sup>1</sup> Yasumo ipi aporo hakāsa puraki someraka, “Repo anoaki himu hakāsaraka hemakapusuane metakarirapaka, keseke ayiakakosane yumo nōmo reaki some akara oyapo. <sup>2</sup> Keseke ano patera asekeanafonosa aporoamo reaki someraka, ‘Yu aporomo sarimana apea Kotiaki kekerehoko peakopo,’ aihokosapo. Ipu re kukusimo rukusapo. Rukua someraka, ‘Isiapo Kotimo rakirane rakiraka reane rurakanapo,’ aiyaka somehokosapo. <sup>3</sup> Aporoamo Kotiane soko anoane soko hemakapunafonosasamo reane mokoatikihokosapo. <sup>4</sup> Mokoatikihokosane nōmo yumo someraka one keseke re mokoatikiana maiya amo nōmo somesane repo hemakapukusapo. Hemakapukua risikiasimo keseke ayiakakosane yumo nōmo reaki somerakanapo.” Aiyaka Yasumo somesapo.

**“Ho Kotesa peakosapo,” aisane oyapo.**

<sup>5</sup> Yasumo someraka, “Fana isina hakāsa risikisuamo some one nōmo reaki somesafapo. Asiamo Kotimo ano pusiesa amo hauaka hiakosakipoko yumo nōmo reaki somerakanapo. Somerakano repo anoaki someraka, ‘Ne ma hiakosare?’ airakarifapo. <sup>6</sup> Nōmo somerakano repo kairaka kára hemakapukua himu nekea atoae. <sup>7</sup> Asiamo nōmo kakaro somerakaripo. Re makotehokosakipoko ano hinakanapo. Ano hianafonorakanone, Ho Kotesamo re ararehoko peakosafapo. Ano hinaka Ho Kotesaki pusierakano Ho Kotesamo re ararehoko peakosapo. <sup>8</sup> Peraka aporo hinamo su hauaka wo risiaki hakāsa hakāsaraka someraka, ‘Nōmo watikiaka rakisiane ayapo. Arirakano makata ereketae aina susuane ayapo. Arirakano aporo hinamomo watikiaka rakisiane Kotimo hukurukusapo.’ Aiyaka Ho Kotesamo tarikia somehokosapo. Arirakano aporo hinamomo hasaka hemakapusuane Ho Kotesamo tariakosapo.

<sup>9</sup>‘Asiamo aporo hinamomo anoaki himu hakásaraka hemakapukua risikianafonorakano ane makata watisamo kepoane ayapo.’ Aiyaka makata watisamo kepoane Ho Kotesamo tarikia somehokosapo.

<sup>10</sup>Arirakano kakaro ereketae somera aporoane anoreapo, aiyaka hemakapusimo Ho Kotesamo reaki tariakosapo. Asiamo ano makáraraka marerakano, Ata rea ano hinakano repo ano aseakosafapo. Asekeanafonona maiya amo ereketae somera aporoane ano reapo, aiyaka repo hemakapukusapo. Hemakapusimo Ho Kotesamo tarikia somehokosapo.

<sup>11</sup>Arirakano hukurukusa amo kepoane Ho Kotesamo reaki tariakosapo. Ano hauaka wo pesasamo hauaka wo unihae Sataneane Kotimo rukumosakatapisiapo. Rukumosakatapisiiane Ho Kotesamo reaki tarikia somehokosapo.

<sup>12</sup>Arirakano makata metakira soko nōmo somehokosapoko asiane some kárasasamo repo hemakapusifareapo. <sup>13</sup>Arirakano Ho Kotesa aperamo kakaro some kepoane repo hemakapusimo epo kakaro some susuane reaki some kakakosapo. Epo hemakapusua aeyaka somehokosafapo. Nōmo someane soko Atamo someane soko epo kaisiane reaki somehokosapo. Keseke ayiakakosane soko somehokosapo. <sup>14</sup>Epo ano makárahokosapo. Nōmo ainane epo reaki somehokosapo. <sup>15</sup>Atamo menane nōmenapo. Asiamo nōmo ainane repo hemakapusimo Ho Kotesamo reaki somehokosapo.” Aiyaka Yasumo somesapo.

**Himu nekea risirane metakarikia himu seseraka risikiakosane oyapo.**

<sup>16</sup>Yasumo ipi aporo hakāsa puraki someraka, “Wakasema risina repo ano aseakosafapo. Arirakano wakasema risina repo anoane efera hunia aseakosapo.” <sup>17</sup>Airakano aporo hakāsa puramo namina susu someraka, “Yasumo ipi someraka, ‘Wakasema risina repo ano aseakosafapo. Wakasema risina repo ano efera hunia aseakosapo.’ Aiyaka Yasumo some meta someraka, ‘Ata rea ano hiakosasamo repo ano aseakosafapo.’ airakane kepoane yakaparakapo.

<sup>18</sup>Yasumo someraka, ‘Wakasema risina,’ aiyaka somerakane kepoane yakaparakapo. Isu himeteripo.” <sup>19</sup>Airakano Yasumo someraka, “Wakasema risina repo anoane aseakosafapo. Arirakano wakasema risina repo anoane efera hunia aseakosapo, aiyaka nōmo somehoane repo namina susu me arure. <sup>20</sup>Nōmo reaki kakaro somerakaripo. Ano rusua kurakano hauaka wo anoaki hisiraka risia aporo hinamomo kára sesehokosapo. Asiāne repo anopoko hemakapuraka hihiripuhokosapo. Repo hihiripusane faraka sesehokosapo.

<sup>21</sup>Arirakano hokosa takapeakosakipoko hinamo kau teraka karápo. Takapekea hokosa maka kake, kau tesane soko, kau nenakasane soko, faraka, meraruraka, seseraka karápo. Aporo hokosa takapesasamo

seseraka karápo. <sup>22</sup> Aina ayiáka yumo re soko himu nekea risikinapo. Wakasema risina ano maturikia taeraka re aseako perakano, re seseraka risikiakosapo. Repo sesenane yaiya risikiakosapo. Aporo metamo re mokoatikianamo soko, makata umisa fasere aperamo soko, repo sesenane yaiya risikiakosapo.

<sup>23-24</sup> Ano turikia pukua hepene yapura ahira maiya amo repo anoaki kaiyakosafapo. Ataki kaikia kurikurihokosapo. Repo ano yano motosane makama fanaraka hemakapukua Ataki ayiakanierakano epo ayiakakosapo. Fana soko yumo soko ano yano motosane makama fanaraka hemakapukua repo Ataki ayiakaniesafapo. Kára seseraka mapiraraka risikiakosakipoko Ataki ayiakanierakano epo ayiakakosapo. Nōmo reaki kakaro somerakaripo.” Aíyaka Yasumo somesapo.

### **Satanemo wakapuane Yasumo rukumosakatapisiane oyapo.**

<sup>25</sup> Yasumo ipi aporo hakāsa puraki someraka, “Fana nōmo reaki takumeaka somesapo. Asiamo keseke Atane nōmo kakama hufitaeraka somehokosa maiyane makerakanapo. <sup>26</sup> Maiya amo repoko nōmo Ataki kaiyakosafapo. Repo ano yano motosa makama fanaraka hemakapukua risike, repo namina yiamo Ataki kaiyakosapo. <sup>27</sup> Ano Koti aeyaka pesane repo kakimaka, arirakano repo anoaki himu tumurumo hemakapukua asiasamo Kotimo reane himu tumurumo hemakapukua rekenapo. <sup>28</sup> Ata rea aeyaka ano hauaka wo pesapo. Pekea wakasema nina hauaka one metakarikia Ata rea yapura parihiakosapo.”

<sup>29</sup> Airakano aporo hakāsa puramo someraka, “Nōmo takumeaka somesane metakarikia, yumo isuaki kakama hufitaeraka somerakae. <sup>30</sup> Makata suane nōmo hemaka apure. Isiapo neaki kaiyakosane, kaiyasiraka nōmo ní hemakapukua somerapo. Asiamo né kakaro Kotimo pusiesapo, aiyaka isiapo hemakapurakaripo.” <sup>31</sup> Airakano Yasumo someraka, “Repo anoaki kakaro himu hakásaraka hemakapukua risikinare? <sup>32</sup> Maiya wakasemamo risina, repo ano metakarikia repo namina ape kekepoa teketarikia pukusapo. Teketarikia purakano ano ni haku rekeakosapoko asiane Ata anoyaki rekeakosapo.

<sup>33</sup> Repo anoaki himu hakásaraka risike namonane faraka, mapiraraka risikiasimo, keseke ayiakakosane nōmo somerakanapo. Hauaka wo aporomo re mokoatikihokosapo. Mokoatikirakano yia, namonafaraka paroaka risikiane. Hauaka wo anoaki yunuraka risia aporo hinamoane nōmo wakapumo rukumosakatapisiaipo.” Aíyaka Yasumo somesapo.

### **Yasumo ipi aporo hakāsa purapoko kurikurisane oyapo.**

**17** <sup>1</sup> Yasumo ipi aporo hakāsa puraki someaka faraka, hepene yapura asekea kurikuriraka, “Atao, nōmo fana ayiakakosaposane maiya omo ainakanapo. Nōmo né makárahosimo nōmo ní hokosa anoane

makáraraka mareanie. <sup>2</sup>Aporo hinamo suane nōmo unihaeaka asekea rekeasimo nōmo ano maresapo. Asiamo aporo hinamo nōmo murikimaka anoaki kasane nōmo iane asekea reke, yaiya risirane iaki kasapo.

<sup>3</sup>Asiamo yaiya risirane kepoane oyapo. Atao, kakaro Koti hákasane népo. Arirakano Yasu Kereso hauaka wo pusiesane anopo. Anoaki soko néaki soko himu hakásaraka hemakapukua risia aporo hinamoane etoyaki hakāsa yaiya risikiakosapo. <sup>4</sup>Nōmo anoaki ayiáka rakiniesane nōmo rakikia masapo. Rakikia masasamo né kararaka reane aporo hinamomo hemakapusimo nōmo tarisiapo. <sup>5</sup>Atao, hauaka one kepomareasiraka ano neyaki kararaka faesa reapo. Kararaka faesa rea ayiáka efera hunia soko, ayiáka kararaka faesa rekeako nōmo anoaki kakanie.

<sup>6</sup>Hauaka wo aporo su risiane nōmo asekea, metakira nōmo murikimaka pasimokoa anoaki kasapo. Asiamo nōmo anoaki kasá aporoane nōmo ní ainane hemakapusimo, nōmo tarisiapo. Aporo ane fana nōmo aporo risiapo. Asiamo nōmo aporoane anoaki kasapo. Kasá aporoamo nōmo someane kakaro kakimaka rakisiapo. <sup>7</sup>Arirakano nōmo wakuapuaka arakirane kepoane né aeyaka pesasamo ipu hemakapurakanapo. <sup>8</sup>Nōmo someaka maresane nōmo iaki some kasapo. Some karakano ipu kakimasapo. Ano néyaki fana reane soko, nōmo ano pusiesane soko, ipu kakimaka hemakapurakanapo.

<sup>9</sup>Iane nōmo ararehoasimo nōmo kurikurirakanapo. Arirakano neaki hisisa aporo akipoko nōmo kurikurirakanafapo. Nōmo aporo pasimokoa anoaki kasáne nōmo ní menasasamo ipoko nōmo kurikurirakanapo. <sup>10</sup>Nómomenane etapo iti menapo. Arirakano nómomenane soko etapo iti menapo. Ano patera asesá aporomo nōmo yano motosane makararaka tarirakanapo. <sup>11</sup>I hauaka wo risikiakosapo. Arirakano ano hauaka one metakarikia, né rea peakosapo. Ata Kotesao, nōmo anoaki kasá aporoamo néaki himu hakásaraka hemakapukua risikiasimo, nōmo iane asekea rekeanie. Etapo iti himu hakásaraka hemaka apura ayiáka, ipu soko ayiáka himu hakásaraka hemakapukua risikiasimo ararehoanie. <sup>12</sup>Ano iyaki rea maiya amo iane nōmo mafairaka asekea reapo. Ipu nōmo ainane hemakapusimo nōmo iane asekea reapo. Asekea rekena iane paripusuafapo. Asiáne aporo hakása meta ipi hemakapusua aeyaka paripusuapo. Nōmo sawia poparaka ayiakakosapo, aisane kakaro hakása yine fasereperaka ayiane.

<sup>13</sup>Asiamo ano né rea peakosapo. Ano seseraka area ayiáka iane soko kára seseraka risikiasimo nōmo néaki kurikurirakanapo. Ano hauaka wo area yumo nōmo ipoko kurikurirakanapo. <sup>14</sup>Nōmo someane nōmo iaki some karakano ipu kakimasapo. Ipu kakimaraka hauaka wo makata rakira hemakapusuane metakarisasamo, nena aporomo iaki hisirakanapo. Arirakano hauaka wo makata rakira nōmo hemakapunafonona ayiáka ipu soko hemakapurakanafapo. Asiamo iaki nena aporomo hisiraka risikinapo.

<sup>15</sup>I hauaka one metakarisisimo nómo pasimokoanie, aiyaka nómo kurikurirakanafapo. Hauaka wo Satanemo i asekea rekeakohoamo nómo mafairaka asekea rekeanie, aiyaka nómo kurikurirakanapo. <sup>16</sup>Hauaka wo makata rakira nómo hemakapunafonona ayiáka ipu soko ayiáka hemakapurakanafapo. <sup>17</sup>Nómo someane kakaro somepo. Kakaro someane kakimaka risikiasimo nómo iane ararehoanie. Kakaro some á hákasa risikiasimo ararehoanie. <sup>18</sup>Aporo hinamo hauaka wo risiaki some kakako nómo ano pusiesa ayiáka, ipu soko aporo hinamoaki some kakako nómo iane pusierakanapo. <sup>19</sup>Ipu namina ainane neaki kakasimo, nómo nī ainane néaki karakanapo. Asiamo ipu nómo kakaro someane kakimaka risikiasimo, nómo nī hemakapusua aeyaka ano rusua kukusapo.

<sup>20</sup>Asiamo ipoko hákasa nómo kurikurirakanafapo. Ipu some karakano aporo hinamomo kakimaka, anoaki himu hakásaraka risikiakosa aporo hinamo akipoko soko nómo kurikurirakanapo. <sup>21</sup>Arirakano ipu namina metamo metaki hemakapukua, metamo metaki hemakapukua ayiáka himu hakásaraka risikiasimo ararehoanie. Atao, néane anoyaki reke, arirakano anoane néyaki reke, ayiáka eto iti himu hakása yineraka arisia ayiáka, ipu etoaki himu hakásaraka kataka marekea ayiáka risikiasimo ararehoanie. Asiamo kakimara aporo hinamomo himu hakásaraka hemakapukua risikino, kakimakanafonosa aporo hinamomo asekea hemakapuraka, 'Kotimo Yasuaki hauaka wo pusiehoareapo.' Aiyaka ipi hemakapukusapo.

<sup>22</sup>Nómo wakapu ainane anoaki kasane, nómo some kakimara aporo hinamoaki wakapu aina hakása yine kasapo. Iti hakasa yineraka arisia ayiáka ipu soko namina hakasa yineraka ayiáka risikiasimo nómo wakapu ainane iaki kasapo. <sup>23</sup>Né anoyaki reke, ano iyaki reke, ayiáka isina himu hakásaraka risikinapo. Himu hakásaraka risiane kakimakanafonosa aporo hinamomo asekea someraka, 'Kotimo Yasuane hemaka apura ayiáka, kakimara aporo hinamoane soko, Kotimo hemakapurakanapo. Asiamo Kotimo Yasu hauaka wo pusiesapo, aisane kakarohoareapo,' aiyaka ipu hemakapusimo himu hakásaraka hemakapurane kakimara aporo hinamoaki kakanie. <sup>24</sup>Atao, nómo anoaki aporo hinamo kasane anoyaki hakása risikiasimoripo. Hauaka one kepo mareasiraka nómo anoaki himu tumurumo hemakapusuapo. Hemakapuraka nómo wakapu faesa kotesane anoaki kasapo. Wakapu faesa kotesa anoaki kasane ipu asekeasimo anoyaki hakása risikiasimoripo.

<sup>25</sup>Atao, Ereketae aina kepoane népo. Asiamo nómo some hisisa aporo hinamomo néane hemakapurakanafapo. Néane nómo hemakapurakanapo. Nómo ano pusiesane nómo aporo hakása puramo hemaka apure. <sup>26</sup>Néane ipu hemakapusimo nómo iaki tarisiapo. Tarisiane yaiya tariraka rekeakosapo. Asiamo nómo anoaki himu

tumurumo hemaka apura ayiáka, himu tumurumo hemakapurane i himua mahemakapurane. Arirakano ano soko iyaki hakāsa rekeakosapo.” Aíyaka Yasumo kurikurisapo.

**Yasu parakesane oyapo.**

*Matiu 26:47-56; Maka 14:43-50; Ruki 22:47-53*

**18** <sup>1</sup>Yasumo kurikuriraka faraka Yasu takahikia apeane metakarikia, ipi aporo hakāsa purayaki pukua, he wakasema yano motosa he Kitorone yaoraka hikia, ira orofe hemoa hikia toapo. <sup>2</sup>Asiamo Yasu ipi aporo hakāsa purayaki hemoa tokoako hikianasamo, hemoa efera hunia tokoakosakipoko hisiapo. Arirakano hemoane Yasu parakehokosa aporo Yutasemo aserapo.

<sup>3</sup>Aserasamo hemoa Rome kamani ame aporo soko, arirakano Kotimo apea sikiriti aporo asekea risiane soko Yutasemo karikia hisiapo. Arirakano fana pirisiti aporo Ferepe aporo ipu sikiriti aporoaki someraka, “Re Yutaseyaki paoraka hisie.” Airakano iane Yutasemo karikia, Yasu parakehokosakipoko hemoa hikia, ipu ira rokopa soko, kapi soko, sari soko, wera makatane moko, nafa paikia, arirakano sapa paikia ayiáka hisiapo.

<sup>4</sup>Hikia perakano, Yasumo aseraka eaki makata ayiakakosane epo ipi hemakapusuapo. Yasumo ipi aporo hakāsa purayaki hakāsa toane, iane yia metakarikia, aporomo e waseremako pesa sapea pusuapo. Puraka Yutasemo aporo karikia pesaki Yasumo someraka, “Repo epa kope perakanare?” aisapo. <sup>5</sup>Arirakano e parakehokosa aporo Yutaseane iyaki hakāsa yia rekena, ipu suamo someraka, “Nasare aporo Yasuane isiapo kope perakanapo.” Airakano Yasumo someraka, “Anopo.” <sup>6</sup>Airakano i suane fofaraka wakasema fimiti pukua, hauaka atura hurupeperaka warisiapo.

<sup>7</sup>Warisikino Yasumo efera hunia someraka, “Repo epa kope perakanare?” Airakano ipu someraka, “Nasare aporo Yasuane isiapo kope perakanapo.” <sup>8</sup>Airakano Yasumo someraka, “Reaki nōmo somerakasa ayapo. Repo ano kope peraka, nōmo aporo hakāsa purane pusimo metakarisie. Purakano matasohokopo,” aisapo. <sup>9</sup>Arirakano fana ipi Kotiaki someraka, “Aporoane nōmo anoaki kasane, hakāsa meta hasaka kosafapo.” Aíyaka Kotiaki somesasamo waseremako pesa aporoaki Yasumo someraka, “Aporo hakāsa meta repo rukupo. Metakarisie,” aisapo.

<sup>10</sup>Airakano Saemone Pitamo ipi ferepemo pirisiti aporo fanamo aporo raipa senaki tumuru takuane rukusakare tapisiapo. Aporo raipa amo yano motosane Maokase, ipi senaki rukusakare tapisiapo. <sup>11</sup>Rukusakare tapirakano Yasumo Pitaki someraka, “Ferepeane nōmo ferepe makera pausi terakae hisia á rusakamariesie. Atamo ano kukusane maresasamo himu neke, kau teraka kukusapo. Kukusane metakariakosafapo.” Aisapo.



**Anase rea Yasu karikia pusuane oyapo.**

<sup>12</sup> Arirakano ame aporo soko, satini soko, sikiriti aporo soko, ipu Yasuane hokono tetákara taporaka waseremaka, <sup>13</sup> Anasemo apea karikia pusuapo.<sup>b</sup> Anasemo ipi farayane Kaiafasemo arumasapo. Keremisi amo Kaiafase ipi pirisiti aporo fanaraka reapo. <sup>14</sup> Arirakano fana Kaiafasemo Yu aporoaki someraka, “Aporo hinamo supoko aporo hakāsa kuane siahoasireapo.” Aíyaka Kaiafasemo somesapo.

**“Yasumo aporo hakāsa purane nere?” Airakano Pitamo  
waesane oyapo.**

*Matiu 26:69-70; Maka 14:66-68; Ruki 22:55-57*

<sup>15</sup> Yasu fana karikia purakano, Saemone Pita soko, aporo hakāsa pura meta soko, kesekea kekemarape pusuapo. Pukua pirisiti aporo fanamo apea pauraka, aporo hakāsa pura tetá pesa amo aporo hakāsa metamo pirisiti aporo fanane aserapo. Aserasamo ape ruru ikia koro aeyaka yorokoa pukua, Yasuyaki hakāsa ape hauaka moroa pukua risiapo. <sup>16</sup> Pita kumuku pekea, ikia koro yao takua rekena, aporo hakāsa pura meta fana pusuane ikia koroa paripesapo. Paripekea ruru ikia koro asekea rea hinamoaki someraka, “Pita peasimo ikia koro ropaka mayane siahoasireare?” Airakano hinamoamo aoaka, ikia koroane ropaka masapo. Ropakamaka Pita perakano <sup>17</sup> hinamoamo eaki someraka, “Yasumo aporo hakāsa pura metane nere?” Airakano Pitamo kotafe someraka, “Anofapo,” aisapo.

<sup>18</sup> Arirakano sikiriti aporo soko, pirisiti aporo raipa soko inurakano ira kau asia paikia rufirakano, hokono ira tarikia asekea risiakipoko, Pita soko ira hakakosakipoko pekea, iyaki hakāsa risiapo.

**Pirisiti aporo fanamo Yasuaki somesane oyapo.**

*Matiu 26:59-66; Maka 14:55-64; Ruki 22:66-71*

<sup>19</sup> Pitane aporo metakirayaki sarimaraka ira haraka risiakipoko, pirisiti aporo fanamo Yasuaki someraka, “Nómo ní aporo hakāsa pura epare? Aporomo hemakapusimo nómo yakapa somesare?” Aíyaka Yasuaki kairakano <sup>20</sup> Yasumo someraka, “Aporo suamo kaiyisimo nómo kakama somesapo. Yu aporomo sarimana apea soko, Kotimo apea soko, á Yu aporo pekea sarimarakano some kasapo. Tau mahamekea somesafapo. <sup>21</sup> Marirakano nómo anoaki kairakanare? Nómo some kasane kaisia aporoaki kaiyinie. Nómo somesane ipu kaikia hemakapukua risikinapo. Iaki kaiyinie.”

<sup>b</sup> **18:13** Anaseane pirisiti aporo fanaraka rea nine Rome kamani aporomo Anaseane metakarikia sanasiraka, Kaiafase pirisiti aporo fanaraka rekeasimo maresapo.

<sup>22</sup> Airakano sikiriti aporo hakāsa metamo Yasu rusuapo. Ruraka someraka, “Nómo pirisiti aporo fanaki aiyaka somehokopo.” <sup>23</sup> Airakano Yasumo someraka, “Nōmo watikiaka somerakano nómo kaisiane aporo suamo kaiyisimo somesie. Nōmo kakaro somerakano yia marirakano nómo ano rurakanare?” aisapo. <sup>24</sup> Arirakano Yasu ipi hokonoa taposane yaiya rekeasimo yia, Anasemo sikiriti aporoaki someraka, “Aporoane pirisiti aporo fana Kaiafasemo hukurusimo karikia pusie.” Aiyaka Anasemo somesapo.

**Pitamo efera hunia waesane oyapo.**

*Matiu 26:71-75; Maka 14:69-72; Ruki 22:58-62*

<sup>25</sup> Anasemo aiyaka somesa maiya yiamo Pita ira haraka rekena aporo metakiramo eaki someraka, “Aporoamo aporo hakāsa pura pasimasane nére?” Airakano Pitamo kotafe someraka, “Anofapo,” aisapo.

<sup>26</sup> Airakano pirisiti aporo fanamo aporo raipa ipi senaki Pitamo rukusakare tapisiamo ipi tákemo someraka, “Ne ira orofe hemoa aporoakiyaki kakeno nōmo asesane nere?” <sup>27</sup> Airakano Pitamo waesapo. Waehoanine mena kokorokomo mesapo.

**Pairate rea Yasu karikia pusuane oyapo.**

*Matiu 27:1-2, 11-14; Maka 15:1-5; Ruki 23:1-5*

<sup>28</sup> Mituru fiarakano yia, Kaiafasemo apeane ipu metakarikia kamani aporo fanaraka reamo apea Yasuane karikia pusuapo. Karikia pukua aporoane Yu aporoano fonosasamo, ipi apea Yu aporo yorosafapo. Ape Farimaresa Hemakapuko Hokono Keakosakipoko Yu aporomo hemakapuraka, “Yu aporoano fonosayaki ape hakāsa sarimaraka toke, keseke hokono akera maiya amo makata neane siahoasifareapo.” Aiyaka hemakapuraka kamani aporomo apea yorosafapo. <sup>29</sup> Yu aporo yorokoa peanafonorakano Pairate takahikia ipi apeane metakarikia aseako pusuapo. Pukua iaki someraka, “Aporoaki repo makata hukuarurane, makata yakapapoko hukururakanare?”

<sup>30</sup> Airakano ipu someraka, “Epo watikiaka rakianafonosa satiki né rea karikia peafunufapo.” <sup>31</sup> Airakano Pairatemo someraka, “Repo namina somemane kakenapo. Asiamo repo namina yia eane hukurunie.” Airakano Yu aporomo someraka, “Re Rome kanimimo someraka, ‘Aporo rusua kukusane repo Yu aporomo menafapo. Isu Rome aporomo menapo.’ Aiyaka repo somesasamo repo eane ira paremareasimo karikia perakanapo.” Aiyaka Yu aporomo somesapo. <sup>32</sup> Ipu somehoasiraka fana Yasumo someraka, “Keseke ano ira matopesa paremarerakano rusua kukusapo.” Aisane yumo kakaro yanakanapo.

<sup>33</sup> Airakano Pairate ipi apea paripuraka Yasuaki peasapo. E perakano Pairatemo someraka, “Yu aporomo unihaeane nere?” <sup>34</sup> Airakano

Yasumo someraka, “Nómo ní hemakapusua aeyaka, ‘Né unihaere?’ aiyaka kairakanare? Aporo metamo néaki somerakano nómo anoaki kairakanare?” <sup>35</sup> Airakano Pairatemo someraka, “Ano Yu aporofapo. Nómo né fanasihoasimo nómo ní aporo ira Yu aporomo soko, pirisiti aporo káramo soko, né karikia pesapo. Nómo watikiaka rakisiane, makata yakapa watikiaka rakisiare?”

<sup>36</sup> Airakano Yasumo someraka, “Hauaka wo aporoane nómo unihaeaka asekea rekenafapo. Hauaka aporo ane nómo asekea unihaeaka rea satiki ano waseremakohoamo, nómo aporo hakása puramo Yu aporo sisimayaki weafunupo. Weakosapoko asiane hauaka wo ano unihaeaka rekeanafonosamo wesafapo.” <sup>37</sup> Airakano Pairatemo someraka, “Unihaeane tiki nerakanareapo.” Airakano Yasumo someraka, “Ano unihaeane nómo someraka ayapo. Nómo somerakane anoane somerakae. Kakaro some kakako ano hauaka wo pesapo. Kakaro some takua risia aporo hinamoamo nómo someane kakimaranapo.” <sup>38</sup> Airakano Pairatemo someraka, “Kakaro someane yakapare?” aisapo.

**Yasuaki kotafe topakamaraka hukurusuane oyapo.**

*Matiu 27:15-31; Maka 15:6-20; Ruki 23:13-25*

Pairatemo ipi apeane metakarikia pukua, Yu aporo sisimaki someraka, “E fanasihokosapoko asiane epo watikiaka rakisiafapo. <sup>39</sup> Ape Farimaresa Hemakapuko Hokono Akera maiya suamo aporo tipura kesa hakása meta nómo tonotaenapo. Tonotaenasamo nómo tonotaehokosapo. Yumo repo Yu aporomo unihaeane tonotaehoare?” <sup>40</sup> Airakano ipu sakepamo wáraka, “Wae. E tonotaehokopo. Parápase hákasa tonotaehoanie,” aisapo. Arirakano makata hakimokoakosakipoko aporo meta rurane Parápasepo.

**19** <sup>1</sup> Pairatemo Yasu karikia ipi apea pukua, ame aporoaki rusierakano sakomo rusuapo. <sup>2</sup> Arirakano unihae káramo hati kotesa karotapirapo. Asiamo Rome ame aporomo Yasuane mainamareraka sako keta risia weroweroraka hahaeraka unihae káramo hati murikimaka rakisiane Yasu wamoa karotapikia maresapo. Arirakano unihemo pasu susa kotesane Yasu osoraka marekea <sup>3</sup> mainamareraka someraka, “Yu aporomo unihaeane népo. Neane isiapo makararakanapo.” Aiyaka someaka eane ipu hokonomo rusuapo.

<sup>4</sup> Rurakano Pairatemo ipi apeane metakarikia, aporo sarimasaki someraka, “Repo asekeasimo efera hunia nómo Yasuane karikia perakanapo. Eane fanasihokosapoko asiane epo watikiaka rakiafareapo.” <sup>5</sup> Aihoane Yasu sako keta risiamo wamoa karotapikia marekea, unihemo pasu susa osoraka marekea, ayiáka Pairatemo apeane metakarikia yao takua perakano, Pairatemo someraka, “E aperane asesie. Kára ayiáka mayiakako asiare?”

<sup>6</sup> Airakano pirisiti aporo káramo soko, sikiriti aporomo soko Yasu aseraka sakepamo wáraka, “Eane ira matopesa paremarekea maporasie.

Eane ira matopesa paremarekea maporasie.” Airakano Pairatemo someraka, “Repo namina eane karikia pusie. Karikia pukua repo namina eane ira matopesa paremarekea maporasie. Epo watikiaka rakisiane nōmo hemakapurakarifapo.” <sup>7</sup>Airakano Yu aporo sisimamo someraka, “Isiapo somemane motoraka, ‘Koti mawakasemaraka somera aporoane rusua kukunie.’ Aíyaka somemane motosasamo Yasumo someraka, ‘Ano Kotimo hokosapo,’ aisakipoko eane rusua kukunie.”

<sup>8</sup>Aíyaka somerakano Pairatemo kairaka, kára namoraka reapo. Yasumo ipi someraka, “Ano Kotimo hokosapo,” aisapakano Pairate namoraka reapo. <sup>9</sup>Namoraka reke Yasu karikia ipi apea paripukua Yasuaki someraka, “Né hauaka maeyaka pesare?” Airakano Yasumo makata somerafaraka me kausapo. <sup>10</sup>Me kaurakano Pairatemo someraka, “Nómo anoaki makata somerakarifapo. Marirakanonare? Ne rusua kukusane soko né tonotaehokosane soko nōmo ayiakakosapo. Ane nōmo maroponapo. Nómo hemakapurakarifare?”

<sup>11</sup>Airakano Yasumo someraka, “Nómo ayakakosane nómo ni hemakapusua aeyaka ayiakakosapo. Kotimo aorakano nómo ayiakakosapo. Nómo ano hukurukua fanasihoasimo aporomo ano karikia pesane ipu watikisane kakaro kárapo.” <sup>12</sup>Airakano Pairatemo kaikia, Yasuane tonotaehoko hemakapusuapo. Tonotaehokosapo airakano, Yu aporo suamo wáraka, “Wae. Tonotaerakano Rome kamani unihae Sisamo né tákehokosafapo. Aporoamo someraka, ‘Ano unihaeaka rekenapo.’ Aisa aporoane Sisayaki yunuraka rekenapo. Asiamo aporoane nómo farimarakano Sisamo néaki yunuhokosapo.”

<sup>13</sup>Airakano Pairatemo kaikia Yasu karikia ipi apeane metakarikia, fanasihokosakipoko hukurura aporomo sea kayapo. Hukurura aporomo sea kaya ane, Yu aporo meaka yano motoraka Kapata yano motosapo. Namu meaka semeneseapo, aíyaka yano motosapo.

<sup>14</sup>Arirakano Ape Farimaresa Hemakapuko Hokono Keakosane rau ayiakakosasamo pipu aporo hinamo suamo makata su maroponapo. Asiamo maropoana maiya amo maiya tuaro (12) koroko paurakano Pairatemo Yu aporoaki someraka, “Repo unihaeane épo.” <sup>15</sup>Airakano ipu sakepamo wáraka, “E rusie. E rusie. Rukua ira matopesa paremaresie.” Airakano Pairatemo someraka, “Repo unihaeane ira matopesa paremaresie, aíyaka nōmo somehoasimore?” Airakano pirisiti aporo káramo someraka, “Isiapo unihae kárane kamani unihae Sisa ipi hákasapo.” <sup>16</sup>Airakano Pairatemo someraka, “Yasu ira matopesa paremareako karikia pusie.” Airakano ipu Yasu karikia pusuapo.

**Yasu ira matopesa paremaresane oyapo.**

*Matiu 27:32-44; Maka 15:21-32; Ruki 23:26-43*

<sup>17</sup>Yasu karikia puraka ira matopesane Yasumo ipi maka pusuapo. Pukua uni kiki hauaka á pauraka risiapo. Hauaka ane Hipuru meaka

yano motosa Kokóta hauakapo. <sup>18</sup>Hauaka á Yasu ira matopesa paremarekea maposapo. Maporaka aporomano rura aporo tetáne soko ira paremarekea, meta Yasu hokono tumuru takua maposapo. Meta Yasu hokono kasakai takua maposapo. Maporaka Yasuane tipia maposapo.

<sup>19</sup>Maporaka marekea Pairatemo makata popasapo. Popasane oyapo. “Yasuane Nasare aporopo. Yu aporomo unihaeane épo.” Aíyaka Pairatemo popasane ipi ame aporomo maka, Yasu unia kima yapura paremaresapo. <sup>20</sup>Yasu ira paremarekea maposane Yarusarame siti makeraka maposapo. Yarusarame siti makeraka paremaresasamo aporo hinamo yakaimo aseako peraka, popasane menosapo. Popasane Hipuru meaka soko, Rome aporo meaka soko, Kiriki aporo meaka soko me isiane su popasapo. <sup>21</sup>Popasane Yu aporo pirisiti aporo káramo menoraka Pairateaki someraka, “Yu aporomo unihaeane épo, aíyaka popahokopo. Úyaka popahoanie. ‘Ipi yiamo someraka, “Yu aporomo unihaeane anopo,” aíyaka somerakaswane épo.’ Aíyaka popahoanie.”

<sup>22</sup>Airakano Pairatemo someraka, “Nōmo popasane siapo. Kosohokosafapo,” aisapo. <sup>23</sup>Yasu ira matopesa paremaresa yia rekeno, ame aporomo Yasumo pasuane mokoia parakuraka i kitafasuaki kasapo. Yasumo pasu horopokarane yayia weroraka rakisia irihoanafonosa pasuane makosakipoko <sup>24</sup>ame aporomo someraka, “Pasuane koahoane siahoasifareapo. Asiamo pasuane aporo hakásamo mako, isiapo kaseraka enana ayiáka makata fete mokoasuraka napane asekea enahokosapo,” aisapo. Arirakano fana Kotimo sawia poparaka ayiakakosaposane aina ayapo. Fana popasane oyapo. “Nōmo pasuane mokoako aporomo parakuhokosapo. Arirakano nōmo pasu kara meta aporomo mako kaseraka enana ayiáka enahokosapo.” Aíyaka popasane kakaro aina ayapo. *(Buk Song 22:18)*

<sup>25</sup>Arirakano Yasu ira matopesa maposane makeraka ipi kaíyia soko, ipi aeya soko, Koropasemo hinamo Mariane soko, Makatara hinamo Mariane soko, i su pekea asekea risiapo. <sup>26</sup>Asekea risikino Yasumo ipi kaíyia soko, ipi aporo hakása pura hakása metane Yasumo himu tumurumo hemakapukua rea aporoane soko aseraka ipi amaki Yasumo someraka, “Hinamo neo, nómo ní hokosa hemaka apura ayiáka, aporoane nómo hemakapunie.” <sup>27</sup>Aíyaka ipi aporo hakása puraki Yasumo someraka, “Nómo ní ama asekea area ayiáka, nōmo amane nómo asekea rekeanie.” Aíyaka Yasu kusua maiyamo aporo hakása puramo Yasumo kaíyiane ipi apea karikia pukua asekea reapo.

#### Yasu kusuane oyapo.

*Matiu 27:45-56; Maka 15:33-41; Ruki 23:44-49*

<sup>28</sup>Arirakano Yasumo makata rakirane fasapo, aiyaka hemakapusuasamo Yasumo ipi someraka, “Ano he nariripo.” Aíyaka

Kotimo sawia popasa yine aina ayapo. <sup>29</sup>Asiamo merakia waene he kisa takamasane he watera asia waene hea kokomarekea, ira turua taporomarekea Yasumo akai kiria motosapo. <sup>30</sup>Motorakano Yasumo sareraka someraka, “Yiyapo.” Aiyaka Yasu ipi kukuko makehoramo wamo arupekea hemakapuraka, “Ano ho puane siahoasireapo.” Aiyaka hemakapukua kusuapo.

**Yasu ketayia takua ferepemo karesane oyapo.**

<sup>31</sup>Yu aporo sisimamo Pairateaki someraka, “Ira matopesa paremurisiane fatari mokoakosakipoko aporoane korake rukumosorasiehoanie.<sup>c</sup> Arirakano Ape Farimaresa Hemakapuko Hokono Keakosakipoko pipu makata nakosa sarimarakanapo. Asiamo rau fenena maiyamo aporo ira matopesa paremurisiane yia risiane siahoasifareapo.” Aiyaka aporoamo hemakapuraka Pairateaki somesapo.

<sup>32</sup>Aiyaka somerakano Pairatemo someraka, “Aporoane foaka kukusimo korakeane rukumosorasie,” aisapo. Airakano ame aporo pukua aporo takua paremaresane korake rukumosoraka, arirakano takua paremaresane soko korake rukumosoraka, <sup>33</sup>arirakano Yasuane korake rukumosorako aseane Yasu kakaro kusikeno asekea, ipi korakeane rukumososafapo. <sup>34</sup>Ame aporo hakasa metamo ferepemo Yasu ketayia karesapo. Kareane yapi soko he soko pusuapo. <sup>35</sup>Purakano aporomo asesapo. Asesa aporoamo sawi one popasapo. Epo asesasamo kakaro someaka popasapo. Repo kakimakasimo epo popasapo.

<sup>36-37</sup>Arirakano fana Kotimo sawia popasane oyapo. “E kiki suane hakasa meta soko rukumosohokosafapo.” Aiyaka popasapo.

*(Buk Song 34:20)*

Arirakano makata meta soko poparaka, “E ketayia karesane aporomo aseakosapo.” Aiyaka ayiakakosapo, aiyaka popasane yasiapo.

*(Sekaraia 12:10)*

**Yasu kunikia motosane oyapo.**

*Matiu 27:57-61; Maka 15:42-47; Ruki 23:50-56*

<sup>38</sup>Arirakano Arimatia aporo yano motosa Yosefemo Yasu kukusiraka rea maiya amo, e Yasu patera asesapo. Yu aporomo aserapaka namoraka tau Yasu patera asesapo. Yosefe pukua Pairateaki someraka, “Yasu kusuane kunikia nomo motoaere?” Airakano Pairatemo aosapo. Aorakano Yosefe pukua Yasu kusuane fatarimaka pusuapo.

<sup>39</sup>Arirakano Nikitimase fana ereamo Yasu aseako pusuane Yosefeyaki pukua, pauta wape yamona, meta yano motosa mua, meta yano motosa arose, tetapō moko pusuapo. Pauta sakepamo moko pusuapo. <sup>40</sup>Aporo

<sup>c</sup> 19:31 Foaka kukusimo korake rukumososapo.

tetá amo Yasu kusuane maka, pauta wape yamosane kaua soaeraka, pasumo taporaka, Yu aporomo aporo kusua kunikia motoakosakipoko taponā ayiáka taposapo.

<sup>41</sup>Arirakano ira matopesa maposane makeraka orofe hemo reapo. Hemo á kunikia reapo. Kunikia á fana aporo kusua motosafapo. <sup>42</sup>Yu aporomo yape fenena maiya makeraka taki awara maiyamo, kunikia makeraka reakipoko Yasu kusuane motosapo.

**Yasu kusua kunikia motosane fasekeno asesane oyapo.**

*Matiu 28:1-8; Maka 16:1-8; Ruki 24:1-12*

**20** <sup>1</sup>Yatipinumo<sup>d</sup> mituru fiahoko makehoramo Makatara hinamo Mariane pukua, Yasu kunikia motosa aseako pusuapo. Pukua aseane, eke tafeamo kunikia mapirisiane ropakataesekeno asesapo. <sup>2</sup>Aseane Yasu fasekeno aseraka foaka parihikia, Saemone Pitape Yasumo ipi aporo hakāsa pura hakāsa metane Yasumo himu tumurumo hemakapusua<sup>e</sup> aporoane soko, Mariamo tetāki someraka, “Unihae kusua kunikia motosane, aporo metakiramo maka pusesapo. Ma maka pusuarakapo.”

<sup>3</sup>Airakano tetā kunikia aseako foaka pukua, <sup>4</sup>aporo hakāsa pura metamo Pitane marokeraka fana foaka pukua kunikia pausapo.

<sup>5</sup>Kunikia yao taku aeyaka reke, weaka aseane, Yasu kusua pasumo taposane pasu hákasa yia wareke, Yasu fasekeno asesapo. <sup>6</sup>Arirakano Pita kesekea foaka pesa nine kunikia kakarua aseako forosoraka pusuapo. <sup>7</sup>Forosoraka pukua aseane pasumo e taposane yia wareke, arirakano pasu metamo wamoā taposane soko yia warekeno asesapo. <sup>8</sup>Arirakano aporo hakāsa pura meta fana pesane soko kunikia forosoraka pukua, pasuane aseraka ipi hemakapuraka, “Yasu kakaro turikia pureapo,” aiyáka hemakapusuapo. <sup>9</sup>Arirakano Kotimo sawia poparaka, “E kusuane turikia pukusapo.” Aisane fana tetapō koteaka hemakapusuafapo. Asekeasiraka hemakapusuafapo. <sup>10</sup>Yasu kunikia motosane fasekeno tetā apea poparihisiapo.

**Makatara hinamo Mariamo Yasu asesane oyapo.**

*Matiu 28:9-10; Maka 16:9-11*

<sup>11</sup>Kunikia yao takua Maria hiripuraka reke weaka aseane, <sup>12</sup>hepene aporo tetá pasu pakae ososa Yasu kusua motosa á, meta korake sapea, arirakano meta wamo sapea ayiáka tokeno asesapo. <sup>13</sup>Aserakano tetapō someraka, “Hinamo neo, marirakano hiripurakanare?” Airakano Mariamo someraka, “Unihae kunikia motosane ipu maka pusesapo. Ma

<sup>d</sup> 20:1 Isiapo yatipinu sereane Yu aporomo menopo aiyaka somerapo. <sup>e</sup> 20:2 Aporo hakāsa pura hakāsa meta Yasumo himu tumurumo hemakapusua aporoane Yonepo.

maka pusuarakapo.”<sup>14</sup> Aíyaka someaka faraka, ipi patera pariaseane Yasu rekeno asesapo. Aseraka, “Yasureapo,” aíyaka hemakapusuafapo.

<sup>15</sup> Asekea hemakapunafonorakano Yasumo someraka, “Marirakano hiripurakanare? Epa kope perakanare?” Airakano hinamoamo hemakapuraka, “Hemo wafayareapo,” aíyaka hemakapukua someraka, “Nómo e maka pukua ma motosare? Maka pukua motosane anoaki somesie. Nómo e mako pukusakipoko anoaki tarisie.”<sup>16</sup> Airakano Yasumo someraka, “Maria.” Airakano Yasumo meane hinamoamo kairaka rekeako pariraka aseane Yasu rekeno asesapo. Aseraka, “Tisao,” aisapo. Aíyaka somerakane Yu aporomo Hipuru meaka Raponai airapo.

<sup>17</sup> Airakano Yasumo someraka, “Ano kaua sakiraka maka rekeakopo. Ata rea hauaka ano hianafonosasamo, nómo ano maka rekeakopo. Nómo aporo hakāsa pura, nómo nī mae asiaki úyaka somehoanie. ‘Ata rea ano parihiakosapo. Nómo Atane soko repo Atane soko hakāsa yiyapo. Nómo Kotiane soko repo Kotiane soko hakāsa yiyapo. E rea ano parihiakosapo.’ Aíyaka iaki somehoanie.”<sup>18</sup> Airakano Maria parihikia aporo hakāsa puraki someraka, “Yasuane nómo asesapo.” Aíyaka Yasumo someaka maresane soko iaki some kasapo.

#### **Aporo hakāsa puramo Yasu asesane oyapo.**

*Matiu 28:16-20; Maka 16:14-18; Ruki 24:36-49*

<sup>19</sup> Sere hakāsa niné yatipinumo ereamo, Yasumo ipi aporo hakāsa puramo Yu aporo sisima perapaka namoraka ikia koro mapirikia toapo. Toakipoko ape á Yasu pekea iaki someraka, “Mapiraraka risikianie.”

<sup>20</sup> Aíyaka ipi hokono tetá ikokosa umuruane tarikia, arirakano ipi ketayia karesa umuruane tarirakano ipi aporo hakāsa puramo aseraka Unihaereapo, aíyaka hemakapukua sesesapo.

<sup>21</sup> Sesorakano Yasumo efera hunia someraka, “Sesoraka auaraka risikianie. Atamo ano pusiesa ayiáka, nómo reane pusie airakanapo.”

<sup>22</sup> Aíyaka Yasumo himu haraka i toakipoko akai fofoane makama asapo. Makama araka Yasumo someraka, “Ho Kotesane re himua rekeasimo masie.”<sup>23</sup> Aporomo watikiaka rakisia himu ra kayane hufitaerakano watikisane repo someraka, ‘Watikisane farakanapo.’ Airakano watikisane kakaro fanapo. Repo someraka, ‘Watikisane fasafapo.’ Airakano watikisane fanafapo.” Aíyaka Yasumo someaka faraka Yasu ipi yia reanine fasekeno asesapo.

#### **Tomasemo Yasu asesane oyapo.**

<sup>24</sup> Aporo hakāsa pura keno suane meta Tomase, ipi yano motosa meta Titimase, e iyaki hakāsa tokoanafonosasamo Yasuane asesafapo.<sup>25</sup> I toakipoko Tomase perakano ipu someraka, “Yasuane isiapo asesapo.” Airakano Tomasemo someraka, “Someane nómo kakimakosafapo. Yasu



hokono umuruane nōmo sakairaka ipi, ketayia umuruane sakairaka, nōmo himu hakásaraka hemakapukusapo,” aisapo.

<sup>26</sup>Arirakano soko hakása faraka, sere karimo i efera hunia sarimaraka apea toapo. Maiya amo Tomase soko iyaki hakāsa toapo. Ikia koro mapirikia toakipoko Yasu pekea iaki someraka, “Seseraka auaraka risikianie.” <sup>27</sup>Aíyaka Yasumo Tomaseaki someraka, “Nómo ano hokono asesie. Hokono umuruane sakairasie. Ketayia umuruane sakairasie. Himu tetáraka hemakapusuane metakarikia, himu hakásaraka hemakapukua rekeanie.”

<sup>28</sup>Airakano Tomasemo someraka, “Nōmo Unihaeo. Nōmo Kotio.” <sup>29</sup>Airakano Yasumo someraka, “Nómo ano asesasamo himu hakásaraka hemakapukua rekenapo. Arirakano aporo hinamo metakiramo ano asekeanafonosa aporo hinamoamo anoaki himu hakásaraka hemakapukua risike, i kakaro seseraka risikiakosapo.” Aíyaka Yasumo somesapo.

### Sawi one popasa kepoane oyapo.

<sup>30</sup>Maiya metamo aporo hakāsa puramo asekeasimo Yasumo makata wakapuaka rakira metakirane soko rakisiapo. Rakirakano aporo hakāsa puramo asesapo. Makata rakisia metakirane sawi wo popasafapo.

<sup>31</sup>Arirakano Kotimo unihaeaka rekeasimo murikimasa aporoane épo. Yasu ipiane Keresopo. E Kotimo hokosapo. Aíyaka repo kakimakasimo sawi one popasapo. “Yasu ipi Keresopo. Ipi Kotimo hokosapo.” Aíyaka repo hemakapukua kakimaka, Yasu yano motosane makama fanaraka hemakapurakano re yaiya risikiakosapo.

### Aporo hakāsa puramo efera hunia asekeasimo Yasu he Taipiriase fua pesane oyapo.

**21** <sup>1</sup>Aporo hakāsa puramo efera hunia asekeasimo Yasu he Taipiriase<sup>f</sup> fua pesane oyapo. <sup>2</sup>Saemone Pita soko, Tomase ipi yano motosa meta Titimaseane soko, Natanio ipi Kariri hauaka Kena taone aeyaka pesane soko, Sepetemo hokosa tetāne soko, Yasumo aporo hakāsa pura tetá metane soko, i su he fua risiapo.

<sup>3</sup>Risike Saemone Pitamo iaki someraka, “Pokoa mokoako purakapo.” Airakano ipu someraka, “Neyaki isu perakanapo,” aisapo. Aíyaka i kasua ripaka, rokoa hikia he numua kasipu makasuraka, kiraka mayane kasipua pokoa kesafapo. Ere hakāsa yiamo airaka risike, pokoa hakāsa soko masafapo.

<sup>4-5</sup>Mituru fiarakano maíya kawé aperamo, Yasu he fua pekea reke someraka, “Hameo, pokoa kasipua kesare?” Airakano ipu Yasureapo,

<sup>f</sup> 21:1 He Taipiriase airakane he Kaririaki aiyaka airakaripo.

aíyaka hemakapunafonoraka ipu someraka, “Wae, kesafapo.” <sup>6</sup> Airakano Yasumo someraka, “Hokono tumuru takua kasipu makasuhokane pokoa keakosapo.” Airakano ipu hokono tumuru taku aeyaka kasipuwane makasuraka, kihoane pokoa kára kesamo umirakano kihoasifareapo. <sup>7</sup> Kihoasifasekeno aporo hakása pura hakása meta Yasumo himu tumurumo hemakapusua aporoamo Pitaki someraka, “Isiapo Unihaereapo.” Airakano Saemone Pitamo pasu horomasane maka, osoraka hea makasuraka he tapukua pusuapo. <sup>8</sup> Purakano aporo hakása pura metakiramo kasipu kiraka mokoá risike, kasu rokoa he fe makesakipoko wane harote mita (100) rokoa pusuapo.

<sup>9</sup> Rokoa pukua he fea karimarekea, kita humarekea, kasu yia metakarikia peraka aseane Yasumo ira paikia rufirakano pokoa paikia, farawayaki taesekeno asesapo. <sup>10</sup> Aserakano Yasumo someraka, “Pokoa kasipua kawé kesane metakira mokoá peae.” <sup>11</sup> Airakano Saemone Pita paripukua, kasipuwane waseremaka he fea kirape hisiapo. Kasipua pokoa popake kesane menoraka wane harote fifti tiri (153) ayiáka kesekeno menosapo. Pokoa kára kesa nine kasipu potakahesafapo.

<sup>12</sup> Arirakano Yasumo someraka, “Makata nako peae.” Airakano ipu “Ne epare?” aisafapo. “Unihaereapo,” aíyaka hemakapusuapo. <sup>13</sup> Hemakapurakano Yasumo farawa taesane mokoá, pokoyaki kasapo. <sup>14</sup> Kasá sereamo Yasuane ipi aporo hakása puramo asekeasimo, yape tetá fana tarisiakipoko, yape isiane sereamo tarisia ayapo.

#### **Yasumo Pitaki somesane oyapo.**

<sup>15</sup> Makata nekea farakano Yasumo Saemone Pitaki someraka, “Yonemo hokosa Saemoneo. Nómo pokoa morane himu tumurumo hemakapurakanapo. Anoaki nómo himu tumurumo fanaraka hemakapurakanare?” Airakano Pitamo someraka, “Unihao, nómo né himu tumurumo hemakapusuane nómo ní hemaka apure.” Airakano Yasumo someraka, “Nómo saro sipi manoane nómo makata nakosa kakanie.”

<sup>16</sup> Aíyaka efera hunia yape tetámo Yasumo someraka, “Yonemo hokosa Saemoneo. Nómo ano himu tumurumo hemakapurakanare?” Airakano Pitamo someraka, “Unihao, ao, nómo né himu tumurumo hemakapusuane nómo ní hemaka apure.” Airakano Yasumo someraka, “Nómo saro sipiane koteaka asekea rekeanie.”

<sup>17</sup> Aíyaka efera hunia yape isiamo Yasumo someraka, “Yonemo hokosa Saemoneo, nómo ano himu tumurumo hemakapurakanare?” Aíyaka Yasumo yape isiamo somerakano asekea Pita ipi sesenafaraka someraka, “Unihao. Makata su nómo hemakapurapo. Nómo né himu tumurumo hemakapusuane nómo ní hemaka apure.” Airakano Yasumo someraka, “Nómo saro sipiane makata nakosa kakanie. <sup>18</sup> Nómo kakaro

somerakaripo. Né hokosa raua rea maiya amo, pasu kenare weraka terakae hikia, ni hemakapusua aeyaka pusuapo. Arirakano né sisimana maiya amo né hokono máfarakano aporo metamo neane taporaka, kiraka maka pukusapo. Kiraka maka purakano né hisihokosapo.”

<sup>19</sup>Aíyaka Yasumo takumeaka some kasapo. Pita ipi ira matopesa paremarerakano kukusane takumeaka some kasapo. Pita ira matopesa paremarekea kurakano, aporo hinamomo asekea Kotiane makarahokosapo. Asiamo Yasumo Pitaki someraka, “Ano patera asesie,” aisapo.

**Aporo hakāsa pura hakāsa metane Yasumo somesane oyapo.**

<sup>20</sup>Pitamo patera pariaseane aporo hakāsa pura Yasumo himu tumurumo hemakapusua aporoane kekemarape perakano asesapo. Yasu kukusiraka ipu makata nenaka toa maiya amo, aporo hakāsa pura meta uaka hikia Yasuaki someraka, “Unihaeo, epamo né parakehokosare?” Aíyaka somesa aporoane Pitamo asesapo. <sup>21</sup>Asekea Pitamo Yasuaki someraka, “Unihaeo, aporoane mayiakakosare?”

<sup>22</sup>Airakano Yasumo someraka, “E ayiakakosane nómo somehoane siahoasifareapo. Ano hikia pariaperamo ipi yia rekeno soko metao, ipi rekeanafonorakano soko metao, nómenafapo. Né ano patera asesie.” Aíyaka Yasumo somesapo.

<sup>23</sup>Aíyaka somerakano aporo hakāsa pura metamo metaki some, arirakano metamo metaki some, arirakano metamo metaki some aíyaka namina yia somepe pukua tipia Yasumo somesane metakarikia, “Aporoane kukusafapo.” Aíyaka some koaka marekea namina somepe pusuapo. Asiāne Yasumo someraka, “E kukusafapo,” aisafapo. “Ano pariapera maiya amo aporoane yia reke soko metao, rekeanafonoraka soko metao, nómenafapo,” aíyaka Yasumo somesapo.

**Sawi one popasa kepoane oyapo.**

<sup>24</sup>Yasumo somesane ano Yonemo kaisiapo. Arirakano Yasumo rakisiane soko nómo aseraka sawi one popasapo. Popasane isiapo menoraka hemakapuraka, “Makata su popasane kakarohoareapo,” aíyaka isiapo hemakapurakanapo. <sup>25</sup>Arirakano Yasumo makata metakira soko rakisiapo. Makata su epo rakisiane aporomo popasafapo. Yasumo makata rakisiane hakāsa hakāsaraka popasatiki sawi mukihoafunupo. Mukiraka hauaka wo sawi taesane siahoafunufapo.